

1958
14
清帝外记

道

后

外

神記

全



清外紀介言

帝紀
傳

參錄北平是報天津大公上海新聞等報

金息侯先生梁近輯清帝外紀清后外傳皆清室軼聞而事必覈之實錄正誤補缺誠信史也外紀所載首摘清史本紀列朝大事一覽了然次如記滿洲初名紅纓之國一太祖入貢再至明京二李成梁妻俗稱歪李媽媽誤爲萬歷媽媽三太宗兄弟臨朝同坐世號三尊活佛四莽古爾泰謀篡私刻金國皇帝之印五太宗崩後諸弟爭立陳尸五日方定嗣位六順治初始罷內監朝參七攝政王臣下羣稱王上八康熙中教皇遣使入貢九乾隆末英使入覲日記十皆足補正史所未詳又如世祖崩於養心殿王熙麻勒吉面撰遺詔可知遁迹五台之不確十一聖祖崩於暢春園諸皇子同承末命可知改十爲千之無稽十二高宗生於雍和宮先口報後奏報皆有定則可知陳氏易男之不經十三以一

及仁宗屢遇刺客。十四宣宗手落進戲。十五文宗重用漢臣。十六穆宗初親外使。十七德宗入嗣之預定。十八宣統繼立之異議。十九亦足正世俗所誤傳。至外傳所載首錄后妃傳目。列帝嬪妃位號。依次如辨孝莊下嫁之誕。二十關董妃傳說之妄。二一孔氏四貞並未選冊。二二香妃銀妃偶加號稱。二三四春非漢女子。二四慈禧封蘭貴人。二五老佛爺與老祖宗之異號。二六同道堂與御賞印之有別。二七紫光閣修鐵軌。二八豐澤園行火車。二九宮內演劇之外班戲。三十公使夫人之園游會。三一旁及恭六醇七病死情形。皆不隱晦。三二誠能正其誤。而補其缺。不媿爲信史者矣。輒之前出清宮史略。蘊洲秘檔。光宣小記。尤多奇異。可作清代十三朝秘史觀也。

又德宗遺事。另出一冊。王小航口述。王晉卿筆記。皆實錄本紀所不敢言。與外紀外傳。互相參證。亦不可不一觀也。

自叙

近人好談清代故事，多出傳聞，不盡可信，而誣罔尤多，實錄本紀，雖不免溢美之辭，然文獻足徵，自較野史爲核，此編專輯清宮軼聞，帝紀后傳，大抵以實錄爲本，聖祖嘗諭纂修明史諸臣，若不參看實錄，虛實何由盡悉，萬季野參修明史，事必核之實錄，余彙校刻清史，曾議總纂實錄，先撰本紀，然後分纂列傳並輯志表，惜爲所阻，史稿刊行，遂難盡一，此雖外紀外傳，不同正史，亦烏可遽違史例，故是非得失，必依實錄，兼采紀傳，誤者正之，漏者補之，凡官書無考，或習見他記者，皆不錄，余僅抄書爲糊口耳，若言著述，直當媿死，然亦必不忍隨俗媚世，以自辱焉。

甲戌春 金梁

清帝外紀目錄

太祖本紀	紅纓之國	聰睿貝勒	太祖復仇
歪李媽媽	唐烏哈	釋駒容	賞仇
龍虎將軍	破九國兵	太祖入貢於明	創制滿文
神武皇帝	<small>聖明皇帝</small>	青天太陽	定都瀋陽
褚英	太祖崩	太祖武皇帝	實錄隱圖
太宗本紀	太宗誕生	四貝勒	三尊活佛
設文縮一	徵征明	諭勿虐民	釋說射
不閱起居注	滿文加國點	金國皇帝之印	漢文史書多偽飾
獻玉璽	寬溫仁聖皇帝	范章京	夢入明宮

朝鮮國紀恩碑	松山香山之戰	洪承疇	明寶書請和
取北京如伐樹	無疾坐崩	敦達里安達里殉死	
世祖本紀	統一天下之主	五歲射鹿	六齡嗜書
議嗣立	登位行禮	元旦受賀	中國得眞主
罷內監朝參	龍衣異光	奏對筆記	皇父攝政王
黃應李三	闕通鑑	習騎射	觀耕賞農
停止命婦入侍	頤治大訓	宮中從無漢女	金之俊
此人必有品	眞才子	佳狀元	景運門直廡
素服禱雨	世祖御製書	世祖崩於養心殿	
聖祖本紀	聖祖誕生	福佑寺避痘	願效法父皇

慈訓	遼整拜	南嶺仁	樂舉經筵
撤藩	知行孰重	南書房	博學鴻儒
元宴唱和	瀚海將軍	蒙古生計	樂此不疲
御前作書	孝服用布	破吐總兵	寧壽新宮
取米一撮	天下第一清官	黃黎州	毛西河
天算貨驗	修路爲民	親征噶爾丹	眞神人也
績學參徵	蒙古書言黃河	親測河	獨立船頭射江豚
六旬萬壽	左手執筆	東睡問安	帝王最苦
尊號陋習	敬王遺悞入覲	好學不倦	聖祖崩
世宗本紀	世宗誕生	始居養心殿	密緘建儲

孫嘉淦

方苞

朋黨論

夕惕朝乾

阿其那

名教罪人

天賜奇臣

舅舅隆科多

李紱

軍機房

殺道士

編僧人

二十八經同函

世宗崩

高宗生雍和宮

可亭先生

高宗本紀

高宗誕生

高宗初政

博學宏詞

舊學受知

從祀元臣

深夜達覽

巡幸嵩洛

詩片

失一股肱

秦趙高

湖山神位

蘇祿國請內附

特擢七階

社稷臣

汗阿瑪

奴才

禁屈膝

戴震尙在否

聚珍版

四庫全書

侯朕綏綏酌辦

清帝外紀

清帝外紀

六

賜陀羅尼經被

古稀天子

十全老人

英使入覲

西洋人立宗

東洋人立宗

太上皇帝

乾隆六十年

高宗崩

仁宗本紀

仁宗誕生

聖主無過言

初政之美

伯相

首効和珅

釋戩得雨

三人同心

視如勳犬

風景何異言

為先帝推恩

屢朝雅頌

天賜醵兒

遇變自衷

朕與卿同歲

英使不行拜跪禮

風霾

滿洲故里

仁宗崩

宣宗本紀

宣宗誕生

養正四箴

松筠

汪師傳

十五老臣

湯金劍

兵船

潘世恩	何文通	步禱得雨	阮太傅
禁鴉片	議款	聲色貨利論	宜宗崩
文宗本紀	文宗誕生	帝者之言	斥退穆彰阿
文慶請用漢臣	求言納諫	勉倭仁	黜吳廷棟
怒賽尙阿	用會國藩	任肅順	誠勝保
朔方備乘	秋狩木蘭	四明園災	文宗崩於熱河
穆宗本紀	穆宗誕生	穆宗即位	穆宗典學
穆宗起居瑣記	穆宗大婚	穆宗親政	各國公使入覲
修圓明園	賁恭王	王慶祺	幸南苑
錢龍駒	代閱章奏	天花之喜	穆宗崩

清帝外紀

八

德宗本紀

德宗誕生

德宗即位

德宗典學

德宗起居瑣記

德宗親政

德宗大婚

親疾醇邸

宴見外使

面賜福字

甲午議戰

參預新政

手詔揚銳

開懋勤殿

釋疾

帝在瀛臺

西狩

回鑾祀天

德宗崩

宣統本紀

宣統外紀

清帝外紀

金 梁 輯

太祖本紀

太祖高皇帝。諱努爾哈齊。愛新覺羅氏。其先蓋金之遺部。始祖布庫里雍順。母曰佛庫倫。相傳爲天女感朱果而孕。定三姓之亂。衆奉爲貝勒。居長白山東。俄漠惠之野。鄂多理城。號其部族曰滿洲。數世至范察而衰。又數世。至都督孟特穆。是爲肇祖。移居赫圖阿喇。三傳都督福滿。爲興祖。傳子覺昌安。爲景祖。兄弟六人。稱寧古塔貝勒。景祖傳子塔克世。爲顯祖。生太祖。尼堪外蘭。誘殺景顯二祖。太親有遺甲十三。歲癸未起兵往討。尼堪外蘭入明邊。索斬之。始與明通。明以爲建州衛都督僉事。爾加龍虎將軍。太祖嘗再入貢於明。癸巳。葉赫糾約九

節合兵來犯。大破之。己亥。滅哈達。始裂國。丙午。蒙古喀爾喀會五部來朝貢。尊太祖爲神武皇帝。丁未。滅輝發。癸丑。滅烏拉。先後收滿洲、渾河、長白、嫩、殷、東、海、遼、集各部。於是歸德日盛。疆域益廣。丙辰。諸貝勒大臣。上尊號曰。覆育列國。英明皇帝。建元天命。定國號曰金。命次子代善爲大貝勒。弟子阿敏爲二貝勒。五子莽古爾泰爲三貝勒。八子皇太極爲四貝勒。以額亦都、費英東、何和禮、扈爾漢、安費揚古爲五大臣。同聽國政。建宮室。布教令。定兵制。令開礦。民間始有。觀。三年。伐明。以七大恨告天祭堂子而行。克撫順。四年。伐葉赫。明經略楊鎬督師二十萬。分四路進。梁之薩爾濱。覆其軍。遂滅葉赫。六年。大舉攻濟陽。連克遼陽、築東京。十年。定都瀋陽。是曰盛京。十一年。攻寧遠。袁崇煥固守不下。乃還。旋崩。初。盜武皇帝廟號太祖。後改高皇帝。葬福陵。右節清史稿太祖本紀。亦有增。

捕並爲之論曰。太祖生而神武。初以遣甲十三起兵討仇。既平諸國。大舉伐明。不數年間。遂成帝業。武功之盛。古未有也。定都瀋陽。毅然獨斷。不爲衆撓。謂西伐明。北征蒙。東定朝鮮。南收羣島。惟此獨扼形勢。一統之基。定於是矣。而假名進貢。兩入明京。視敵國若無人。其英才奇略。尤非常人所能及。嗚呼。豈不偉哉。

紅纓之國

本紀。滿洲起自鄂多里城。實錄。鄂多里城。在長白山東鄂漠惠野。距興京千五百里。盛京通志。富勒善河西岸。有鄂多理城。以地望準之。當在吉林邊境。按滿洲本爲部族之號。太祖初興。始稱滿洲國。初有紅纓蒙古之稱。亦曰紅纓之國。及天命建元。遂定國號曰金。其後易漢字爲清。而滿洲與蒙古。仍以部族分旗。如故稱也。

聰睿貝勒

實錄太祖母宣皇后孕十三月乃生。歲己未。爲明熹宗三十八年也。先是望氣者言。滿洲將有聖人出。裁定衆亂。統一諸國。而履帝位。太祖龍顏鳳目。偉軀大耳。聲若洪鐘。儀度威重。舉止非常。英勇蓋世。騎射超羣。時國人咸稱爲聰睿貝勒。

太祖復仇

實錄太祖十歲。母宣皇后崩。繼妃納喇氏。撫育寡恩。年十九。分居。予產獨薄。後顯祖知太祖有才德。復厚予之。辭不受。后妃傳往按黃道岡。博物典彙。謂顯祖有膽略。德建州都指揮王杲。屢爲邊患。總兵李成梁不能制。乃乞顯祖率兵討杲。往返八日擒之。李成梁相顯祖狀貌不類常人。詭請臨視。火攻設反機。致遇

害。時太祖方四歲。李成梁不能掩顯祖之功。哭之盡哀。迎太祖厚致餼養。太祖稍長。讀書有謀略。十六歲始出之建地。故兵端動。以復祖父讐爲辭。考景顯二祖。皆歿於古勒城。主阿太。章京之役。阿太。即明史李成梁傳之阿台。王杲。子尙景祖。長子禮敦女。是役爲萬歷十年。其明年。太祖以顯祖遺甲。始征尼堪外蘭。時年二十有五。安有方四歲爲李成梁迎養事。道周語誤。

歪李媽媽

本紀。古勒城主阿太。爲明總兵李成梁所攻。阿太。王杲之子。景祖長子禮敦之女。夫也。景祖挈子若孫往視。有尼堪外蘭者。誘阿太開城。明兵入殘之。景顯二祖皆及於難。太祖及弟舒爾哈齊。沒於兵閒。成梁妻奇其貌。陰縱之歸。始得脫。衆稱成梁妻曰歪李媽媽。誤爲萬歷媽媽。又以堂子歲祀佛立佛多鄂錫謨瑪。

瑪之神。遂訛傳爲祀萬歷媽媽矣。

唐烏哈

唐烏哈，犬名也。有乘夜陰晦，至太祖所居，欲拔柵潛入。唐烏哈四顧驚吠，太祖持刀叱曰：外至者誰也？既至，何不入？爾不入，我即出矣。因以刀柄擊窗，復奮足撼窗，爲由窗而出之狀。既而仍由戶出，賊乃遁。有近侍怕海宿窗下，被賊刺死。唐烏哈追賊噬其喉，賊亦死。見開國方略。

釋刺客

開國方略：太祖營悟軼倫，臨機應變，倉猝合度。嘗夜寢，聞戶外有聲，佩刀潛出，果見賊，遂以刀背擊仆之。呼縛，近侍曰：是欲害吾主也。殺之。何必縛？太祖曰：若殺此賊，其主必顯與爲難，倘加兵於我，衆寡不敵，乃佯詢曰：爾非盜牛來耶？賊

以盜牛應遂縱之去，又一夕，將就寢，忽心動，遂起，佯加廁，昏黑中，見隱然有人，如探伺者，乃控弦以待，俄而賊逼，射之，貫其足，踏地，詢其名，爲伊素，久謀仇害者，諸弟請殺之，太祖曰：「此非汝等所知，殺之適以啓釁，我又何肯以殺人爲他人藉口耶？」遂釋之。蓋御物深沈，有大度類如此。

賞仇

方略，甲申年，九月，攻翁鄂洛城，有鄂爾果尼者，潛射太祖，傷首貫胃，太祖拔箭還射，敵慮弦而踏，太祖被創，流血至足，猶盛戰不已，又有洛科者，突發一矢射太祖，砦然有聲，穿鎖子甲，護項，太祖拔之，鏃卷如鉤，血肉迸落，衆競趨而前，欲扶掖，太祖恐爲敵窺，諭止之，時項下血湧如注，下而迷仆，少甦，裹創，迷而復甦者數四，甦，頓飲水，凡一晝夜，血猶不止，創愈，復攻城，克之，獲鄂爾果尼及洛科。

諸臣請誅之。太祖曰：兩敵交鋒，志在取勝，彼爲其主，乃射我，今爲我用，不又將爲我射敵耶？如此勇敢之人，若臨陣死於鋒鏑，猶將惜之，奈何以射我故而殺之乎？遂授鄂爾果尼洛科各一半彘，隸三百人，衆皆願上大度云。

龍虎將軍

本紀已丑年，明以太祖爲建州衛都督僉事，甲辰年，復授龍虎將軍，乾隆四十二年，高宗諭有云：我祖宗曾受明龍虎將軍封號，亦無足異。我朝初起時，明欲與我修好，借此以結兩國之歡，我朝固不妨爲樂天保世之計。我朝乃明與國，當國賊擾亂，明社旣移，吳三桂迎逆王師，入關爲之報仇殺賊，然後世祖定鼎燕京，統一寰宇，是得天下之正，孰有如我本朝者乎？

破九國兵

實錄。癸巳秋。葉赫諸國來侵。上駐軍。夜就寢甚酣。妃富察氏呼之覺。謂曰。爾方寸亂耶。懼耶。九國兵來攻。豈酣寢時耶。上曰。人有所懼。雖寢不成寐。我果懼。安能酣寢。前聞葉赫兵三路來侵。因無期。時以爲念。既至。我心安矣。今我順天命。安疆土。彼不我悅。糾九國之兵。以戕害無咎之人。知天必不祐也。安寢如故。明日戰。大破之。

太祖入貢入明

本紀。戊戌年。十月。太祖入貢於明。辛丑年。十二月。復入貢。按太祖入貢。皆親至北京。意在窺測明廷舉動。相傳曾被監視。明神宗欲殺之。爲皇后解而免。此歲祀萬歷媽媽之說所由起也。已辨正於前。

創制滿文

本紀。己亥年。始創滿文。時國中文字。皆用蒙古字。太祖命巴克什額爾德尼穆
蓋。以蒙古字改制。國書。二臣辭以難。太祖曰。無難也。但以蒙古字。合我國之語
音。聯綴成句。即可。因文見義矣。吾等此已悉。何爲不可。遂以蒙古字。合之國語。
創立滿文。頒行國中。滿文傳布自此始。

神武皇帝

方略。丙午年。十二月。喀爾喀巴約特部貝勒達爾漢之子。恩格德爾。會蒙古五
部。再進駝馬來朝貢。尊太祖爲神武皇帝。自此蒙古各部。朝貢歲至。

發育列國英明皇帝

方略。丙辰年。正月朔。諸貝勒大臣。議上尊號。率羣臣集殿前。分八旗序立。太祖
體殿。登御座。諸貝勒大臣。率衆。臣跪進表章。宣讀表文。尊上爲發育列國英明

皇帝上乃焚香告天。行慶賀禮。建元天命。定國號白金。時上年五十有八。

青天太陽

方略。天命九年。二月。科爾沁部長奧巴。遣使齎書來請修好。稱太祖如青天之上。太陽當空。衆光盡斂。威震列國。臣民僭服。普天共主之英明皇帝。言嫩江水濱。科爾沁貝勒等。俱欽帝命。欲修好如約。太祖遣巴克什庫爾禪希福往會盟。刑白馬烏牛。告天立誓而還。

定都瀋陽

方略。天命十年。三月。定都瀋陽。初自赫圖阿拉。城介藩。復移遼陽。築東京。至是集議遷都。衆皆請止。太祖諭曰。瀋陽形勝之地。西征明。由都爾弼渡遼河。路直且近。北征蒙古。二三日可至。南征朝鮮。可由清河以進。且渾河蘇克素護河。願

流伐木以治宮室，供炊爨，不可勝用。時而出獵，山近多獸，河中水族亦可取用。朕譴之熟矣，汝等寧不計及耶？遂定都瀋陽。

褚英

褚英，太祖長子。實錄作諸燕，號洪巴圖魯，後號阿爾哈圖土門。己卯年，因事薨。按滿洲老檔，太祖晚年，委政褚英，刻薄寡恩，爲衆所怨。太祖召責之，褚英懼，作書詛上及諸弟，祝於天而焚之。太祖大怒，貸其死，幽於高牆，逾年遂歿。官書不詳，蓋諱之也。明御史翟鳳翀入遼疏，太祖長子洪把兔兒，一語罷兵，隨奪其兵，梟囚之，獄其言囚得之，而遂罪由則誤也。

太祖崩

實錄：天命十一年七月，上不豫，幸清河湯泉。八月，上大漸，自太子河還京，使人

召大妃。迎入渾河。距瀋陽城四十里。上崩。在位凡十一年。壽六十有八。上於國家政事。子孫遺訓。皆豫定告誡。臨崩不復言。入宮發喪。大妃以身殉焉。

太祖武皇帝實錄

故宮殿本書目。太祖武皇帝實錄四卷。太祖初本無謚。正紅旗牛叢章京許世昌。請謚先皇謚號。乃有武皇帝之謚。此奏在天聰九年。是年。先成太祖實錄圖。尙未用實錄體裁。亦似未有武皇帝之謚號。而武皇帝實錄。成於崇德元年。此錄首行書武皇帝之謚。而錄中亦不復見。又錄中一再稱太宗爲天聰皇帝。是知天聰亦非年號。與太祖之稱天命。皆示尊大之意。至崇德則眞爲紀元矣。錄中載朝鮮國王來書。猶稱爲建州衛馬法。足下。馬法乃會長之稱。猶言建州衛會長。此書載在天命四年。與神宗實錄萬歷四十七年所叙相合。後來一再修

改。盡刪所諱。康熙元年，改謚曰高，即改修高皇帝實錄，仍非定本。今尙存殘稿。與乾隆四年寫定本大異。如攝政王之母，爲太宗及諸王等逼令殉葬，武皇帝實錄稱后，康熙重修本，則稱大福金，而猶不沒其事實。至現存之高皇帝實錄定本，則稱大妃，而又去其強迫之迹矣。按天命天聰，確爲年號。有城門題額爲證。且曾鑄錢，今尙有流傳者。至實錄圖，原題滿洲實錄職圖，奉天故宮所藏本，可考也。

實錄職圖

太祖實錄職圖，詳見宮史。乾隆四十六年，高宗敬覽乾清宮所藏太祖實錄職圖，乃盛京舊本，特命依式重繪，一貯尙書房，一恭送盛京尊藏，爲高宗重繪之本。清漢文合璧，字句已有修改。今乾清宮所貯原本，不知已落何所。藏上書房

者亦不可得。藏盛京者。經通志館印行。可以比較實錄一再修改。至定本而多失其眞矣。節殿本書曰。

太宗本紀

太宗文皇帝諱皇太極。太祖第八子。即位。紀元天聰。設八固山額眞。分領八旗。十六大臣贊理庶政。元年。征朝鮮。歲大饑。多盜賊。上惻然曰。民飢爲盜。可盡殺乎。令鞭而釋之。仍發帑賑民。三年。設文館。初試生員。親征明。逼燕京。凡七致書。與明議和。不報。克永平。灤州。遷安。遼化。四城而還。遣阿敏等駐守。四年。阿敏等棄城歸。上大怒。幽之定。緝審壯丁例。五年。鑄紅衣大砲。成。鐫曰。天佑助威大將軍。攻錦州。毀大凌河城。上曰。大凌河。城中人相食。猶死守。豈非讀書知盡忠乎。昔阿敏等棄永平。皆不學無術所致。自今。凡子弟八歲以上。皆令讀書。設六部。

承政。定朝服，及官民常服制。六年，新定朝儀，征察哈爾林丹汗走死。七年，孔有德耿仲明尙可喜來降。八年，考取舉人，征明至宣化大同。九年，林丹汗子額哲，繫傳國玉璽。十年，外藩蒙古十六國四十九貝勒，請上尊號，改元崇德。定有天下之號曰大清。上征朝鮮，國王李倧出降。二年，置議政大臣。三年，設理藩院。上諭諸王大臣曰：自古建國，皆立制度，辨等威。今定制皆不遵行，何耶？昔金太祖太宗兄弟一心，克成大統，朕當創業之時，爾等願不能同心一體乎？諸王皆引異。四年，征明自北京至山西，復至山東，破濟南，還攻錦州。六年，大敗明援兵於松山杏山。七年，擒明總兵洪承疇等，克錦州。祖大壽再出降。八年，諭曰：治生者在節用，治國者重在土地人民，其各勸農桑，以敦本計。上崩，葬昭陵。諭曰：太宗內修政治，外勸討伐，神武出於天縱，而惟不嗜殺，尤以養人爲急務。旣遇明都

重惜民命。惟務息和。卒之天命攸歸。逾年。世祖入關定亂。即成統一。蓋帝之貽謀遠矣。

太宗誕生

開國方略。太宗母孝慈高皇后。葉赫貝勒揚吉努之女也。壬辰年十月二十五日。生上於赫圖阿喇。即興京。天表奇偉。面如赤日。嚴寒不用暖耳。龍行虎步。威儀端重。一聽不忘。一見即識。神勇善射。用兵如神。性嗜典籍。披覽勿倦。自幼穎悟過人。甫七歲。委以家政。不煩指示。即能贊理。鉅細悉當。太祖甚鍾愛焉。

四貝勒

太祖建元。以次子代善。及弟之子阿敏。五子莽古爾泰。八子太宗。並爲和碩貝勒。國中稱代善爲大貝勒。阿敏爲二貝勒。莽古爾泰爲三貝勒。太宗爲四貝勒。

太祖上賓。大貝勒等謂四貝勒才德冠世，深契先帝聖心，當即登大位。翌日，遂合詞請太宗即位。太宗辭至再三，自卯至申，衆堅請不已，然後從之。集誓告天，始即位。太宗率諸貝勒，向代善、阿敏、莽古爾泰三拜，不以臣禮待之。

三尊活佛

太宗即位，仍以兄禮事代善、阿敏、莽古爾泰，同坐受朝。及阿敏獲罪，凡朝會，皆三人南向正坐，聽政受禮。時稱之爲三尊活佛。至天聰六年，定朝儀禮，部議不當並坐，代善曰：我等奉上居大位，又與上並列而坐，本非此心所安。自今以後，上南面中坐，我與莽古爾泰，皆坐於側，外國蒙古諸貝勒，坐於我等之下，方爲允協。衆皆曰善。太宗始獨坐臨朝。

設文館

天聰三年。上命儒臣分爲兩直。榜式達海及剛林等。繕譯漢字書籍。榜式庫爾
纏及吳巴什等。記注本朝得失。名曰文館。上躬秉聖明之資。復樂聞古典。故分
命儒臣。欲以歷代帝王得失爲鑑。並記國家政事。以昭信史云。

親征明

天聰三年。上親統師征明。至北京。傳諭議和。上立德勝門外。審視虛實。諸貝勒
俱請攻城。上曰。朕仰承天眷。攻城必克。但所慮者。僅失我一二良將。即得百城。
亦不足喜。我親兵丁如子。惟善撫我兵。蓄養精銳。不戰而勝。自無敵於我軍者
矣。遂止弗攻。還克永平等城而旋。

諭勿虐民

天聰四年。上自北京。還克遼化永平深州。遷家。命衆留守。諭曰。明之土地人民。

天已與我。即我之上地人民也。以我之人民而虐害之。則已收之疆宇。豈非我有。他處人民。亦無復有來歸者矣。爾等宜嚴飭軍士。毋虐害歸順之民。違者治罪勿貸。

釋誤射

天聰四年冬。上至扎木谷行獵。從臣譚泰等。躡追射中之麇獻之。上曰。此非朕所射也。朕嘗禁人強取人物。而復自強取乎。令給厥射者。大貝勒代善。部下蒙古猛克射麇。誤中御衣。代善大驚。欲射殺猛克。上曰。此誤射耳。釋之。時嚴寒。隨獵之人。俱畏寒。垂帽護面及耳。上御窄帽。手不入袖。控縱馳射。若不知寒。衆皆稱異。

太宗不閱起居注

本紀。天聰五年。太宗幸文館。入庫爾經。直房。問所修何書。對曰。記注所行政事。上曰。如此。朕不宜親。又諭文館諸臣。記載太祖政令。曰。朕嗣大位。凡皇考行政用兵之大。不一一詳載。後世子孫。何由而知。豈朕所以盡孝道乎。

滿文加圈點

清史稿。達海傳。天聰六年三月。太宗諭達海曰。國書十二字頭。無識別。上下相同。幼學習之。尋常言語。猶易通曉。若人姓名及山川土地。無文義可尋。必且舛誤。爾其審度字旁。加以圈點。使音義分明。俾讀者易曉。達海承命。尋釋字旁加圈點。又以國書與漢字對音。補所未備。謂舊有十二字頭爲正字。新補爲外字。猶不能盡協。則以兩字合音爲一字。較漢文翻切尤精當。國書始大備。按初製無圈點之滿文。後遂不傳。僅盛京故宮藏有滿洲老檔爲舊體字耳。

金國皇帝之印

實錄。天聰九年。冷僧機首言。莽古爾泰與其女弟莽古濟格格逆謀。莽古爾泰中暴疾。不能言而死。籍其家。獲所造金國皇帝之印。以叛逆實狀。曉諭中外。莽古爾泰。太宗異母弟也。

漢文史書多飾詞

天聰九年。上諭文館諸臣曰。朕觀漢文史書。殊多飾詞。雖全覽無益也。今宜於遼宋金元四史內。擇其勤於求治而國祚昌隆。及所行悖道而統緒廢墜。與其用兵行師之方略。以及忠良奸佞有關緊要者。彙譯成書。用備觀覽。至漢文通鑑之外。野史所載。如交戰幾合。逞施法術之語。皆係妄誕。此等書籍。傳至國中。無知之人。信以爲真。應停翻譯。

獻玉璽

天聰九年，貝勒多爾袞等，征察哈爾凱旋，獻玉璽。先是歷代傳國玉璽，自元順帝携至沙漠，後崩於應昌府，遂失。越二百餘年，有牧者見一羊以颺掘地，發之，得此璽，歸於元裔博碩克圖汗，後爲察哈爾林丹汗所得。多爾袞等聞璽在蘇泰太后所，索之，觀其文，乃漢篆制誥之寶四字，以二交龍爲紐，實舊寶也。遂歸獻，上焚香告天受之。

寬溫仁聖皇帝

天聰十年，外藩蒙古十六部，四十九貝勒，及大貝勒諸貝勒大臣都元帥等，恭上尊號曰寬溫仁聖皇帝，上辭而後受，並建國號曰大清，改元崇德，內院奏定御用儀仗數目，太宗曰：儀仗止以肅觀瞻，非有益於國有利於民也，其酌量裁

定以聞。

范章京

范文程傳崇德元年以文程爲內秘書院大學士。文程所典皆機密事，每入對，必漏下數十刻始出，或未及食息復召入，上重文程，每議政必曰：「范章京知否？」脫有未賞，曰：「何不與范章京議之？」衆曰：「范亦云爾。」上輒畧可。文程嘗以疾在告，庶務壞，委命待范。章京病已幾決，撫諭各國書敕，皆文程親草，初上猶省覽，後乃不復詳審，曰：「汝當無謬也。」文程迎父侍養，嘗入侍上食，有珍味，文程私念父所未嘗，遂巡不下箸，上察其意，即命徹饌賜其父。文程再拜謝，世祖立，禮遇尤厚。文程疾，嘗親調藥，俱以賜，遣畫工就第圖其象，藏之內府，又以文程形貌，願偉，命特製衣冠，求其稱體，賜之。

夢入明宮

方略。崇德二年，太宗夜夢至明國宮中，明帝欲贈以珍寶，而轉顧其人，又非明帝，乃金代神像，出書一冊，曰：是爾先代金國史書，太宗受而讀之，夢忽覺，次晨召語諸臣，諸臣奏曰：皇上前夢入朝鮮王宮，將朝鮮王舉之而起，未幾果臣服朝鮮，今夢入明宮，見明主，及金人授以金史，是天意將以明國圖籙，授皇上也。

朝鮮國王紀恩碑

崇德四年，朝鮮國王李倬，勒紀恩碑，以碑文進呈，略云：大清崇德元年冬，寬溫仁聖皇帝，以敗和自我，始赫然怒，以武臨之，直擣而東，莫敢有抗者。既爾南漢，復入江都，宮眷王子暨卿士眷屬，俱被俘獲，皇帝以不殺爲武，惟布德是先，大沛恩典，小邦君臣，及被獲眷屬，復歸於舊，區宇既亡而復存，宗社已絕而復續。

漢水上游，三山渡口，即皇帝駐蹕之所也。壇場在焉。我寡君爰命增而大之，伐石勒碑，以彰皇帝之功之德，並爲銘曰：有石巍然，大江之頭，萬載三韓，皇帝之休。

松山杏山之戰

崇德六年八月，上以明洪承疇等率兵十三萬來援錦州，親統大兵征之。陳師松山杏山之間，諸王貝勒大臣共議圍敵策，上大笑曰：朕但恐敵人潛遁耳，朕破此敵，如縱犬逐獸，必令爾等易於進取，不至勞苦也。及臨戰，上神謀奇略，破明兵十三萬，如摧枯拉朽，指顧而定，卒獲承疇，並降祖大壽。

洪承疇

崇德七年五月，太宗御崇政殿，命陣獲明總督洪承疇等朝見，召入殿內，洪承

噤叩首。泣涕請罪。賜宴崇政殿。先是。既獲承疇。命送盛京。張存仁奏。承疇歡然。倖生。是能審天時。達時務。仰慕皇上。爲有福眞主。雖平挺身拔頂。既倖得生。必思見用。我國宜令其剃頭。在官任使。寧完我亦奏。請勿殺而留用。范文程並有惜衣。必不肯死之語。均分見東華錄。老檔。則承疇之降。固不待勸也。

明寶書請和

崇德七年。上命諸王貝勒等議明請和事。諭云。朕自與明搆兵。不忍傷民。屢欲和好。奈明朝君臣。妄自尊大。終不欲和。及師圍錦州。十三萬兵盡沒。始懼而求和。諸王以來。書無明主御寶。拒回。又齎御寶書札至。朕閱所用皇帝之寶。大而稍偏。初疑未信。乃以示洪承疇。云。此寶札果眞。此來請和。決非虛語。蓋迫於不得和耳。朕意欲允成和事。共享太平。進取與和好二者孰善。宜各陳其所見。

勿隱。

取北京如伐樹

崇德七年九月，諸臣請以兵直取北京，上曰：取北京如伐大樹，從旁斫之，則大樹自仆，我先克關外四城，再克山海關，則北京自可得矣。

無疾坐崩

崇德八年八月，上御崇政殿，回宮，是夜無疾坐南榻而崩，在位十七年，壽五十四有二。

敦達里安達里殉死

太宗既崩，章京敦達里安達里二人，以幼蒙恩養，不忍永離，遂以身殉。安達里臨殉時，謂諸王貝勒等曰：若先帝在天之靈，問及後事，將何以應。諸王貝勒等

對曰：我等豈戴冲主，嗣位承基，務當實心輔理，儻邀在天之靈，垂鑒呵護，是所願也。按是時，嗣位未定，而二臣臨殉，以此爲請，其後卒立世祖，豈徒死哉？

世祖本紀

世祖章皇帝諱福臨，太宗第九子，即位，紀元順治，以鄭親王濟爾哈朗、睿親王多爾袞輔政。元年，命睿親王爲奉命大將軍，入定中原，至山海關，明守將吳三桂乞師討李自成，入塞，大潰，直趨而西，定都燕京，迎車駕，至十月朔，上御殿受賀，頒詔天下，加封多爾袞爲叔父攝政王，以英親王阿濟格、率師西討李自成。豫親王多鐸征江南，二年，克西安，自成走死，明福王降，江南平，定難髮令。及頂戴式，命大學士洪承疇招撫江南，三年，肅親王豪格征張獻忠於四川，殲之。平浙江，走魯王，定福建，殺唐王，四年，下廣州，殺紹武王，桂王走桂林，五年，命平西

王吳三桂。鎮漢中。六年。改封孔有德。定南王。耿仲明。靖南王。尙可喜。平南王。征兩廣。七年。攝政王鼐。八年。上始親政。御太和殿。召見巡按各省御史。賜坐。諭曰。朕命爾等巡按各省。原爲民生計也。其爲朕愛養人民。使得安享太平。諭畢。賜茶。遣之。十二年。諭曰。今天下漸定。朕將興文教。崇儒術。以開太平。願御製資政要覽。十四年。詔求遺書。十六年。雲貴平。命三桂移鎮。明桂王入緬甸。鄭成功犯江寧。敗遁。十八年。上崩。葬孝陵。諡曰。順治初。睿王攝政。入關定鼎。迨帝親政。孜孜求治。清賦役。定律令。勤政愛民。省躬自責。至遣詔罪己。不啻禹湯云。

統一天下之主

實錄。世祖章皇帝。母孝莊文皇后。崇德戊寅。正月三十日。誕上於盛京大內永福宮。后方娠時。有紅光繞身。衣裾間。如有龍盤旋狀。女侍皆驚以爲火。近視之。

不見。如是者屢，衆皆大異。誕之夕，后夢神人抱一子，授曰：此統一天下之主也。既寤，以語太宗，曰：是異祥。次日誕生，頂中髮一縷，聳然高起，與別髮迥異。是日紅光照耀宮闈，經久不散，香氣彌漫數日。

五歲射鹿

世祖五歲時，隨太宗獵於噶哈嶺，射中一鹿，衆皆稱異。

六歲嗜書

世祖六歲，即嗜觀書，嘗曰：父皇平日讀書，予亦欲讀書。每披覽所及，一目輒數行下，不出師教，解悟旁通，若天授焉。

議鬪立

清史稿索尼傳：太宗崩後五月，睿親王多爾袞詣三官廟，召索尼議鬪立。索尼

曰。先帝有皇子在。必立其一。他非所知也。是夕。圖賴告索尼。定立皇子。黎明。兩黃旗大臣。盟於大清門。令兩旗巴牙喇兵。張弓挾矢。環立宮殿。率以詣崇政殿。諸王大臣。列坐東西廡。索尼及鄂拜。首言立皇子。睿親王令暫退。英郡王阿濟格。豫親王多鐸。勸睿親王即位。睿親王猶豫未允。豫親王曰。若不允。當立我。我名在太祖遺詔。睿親王曰。肅親王亦有名。不獨王也。豫親王又曰。不立我。論長當立。禮親王曰。睿親王若允。我國之福。否則當立皇子。我老矣。能勝此耶。乃定議奉世祖即位。

登位行禮

實錄。上即位。甫六歲。初出宮時。寒甚。侍臣進貂裘。上視裘。卻勿御。將升輦。乳媪欲同坐。上曰。此非汝所宜乘。勿許。上御殿。願侍臣曰。諸伯叔兄朝賀。宜答禮乎。

宜坐受乎。對曰：不宜答禮。於是行禮。禮畢，上起立，面讓禮親王先行。始升輦，入宮，謂侍臣曰：適所進袋，若黃裏，朕白衣之，以紅裏，故不服耳。

元旦受賀

順治元年元旦，上御殿受賀，令禮親王代善勿拜，行禮時，上願見諸藩使臣，有跪拜參差者，問侍臣曰：此何國人，行禮若是。奏曰：此北方投誠阿疎喀爾喀使臣也，尙未入我版圖，是以未媚禮節，乃置不問，舉朝皆稱上之明察有容云。

中國得眞主

順治元年九月，世祖發盛京，至燕京，自正陽門入宮，十月朔，御殿受賀，儀範端凝，見者僭服，羣慶爲中國得眞主云。

罷內監朝參

順治二年，禮部奏，內監仍故明例。每遇朝參行禮，在文武諸臣之前，於禮制未合。嗣後內監人員，概不許與朝參，亦不必排班伺候，從之。

龍衣異光

順治七年正月，朔織造龍衣機上，有異光。三日不止，欽天監占。皇上統一天下，致治文明之瑞云。

奏對筆記

奏對筆記，世祖勦於政事，幸內院，進諸臣，從容諮訪。范文程陳對，最爲上所重。洪承疇以奏對筆記進。上命錄付攝政王覽之，諭曰：此洪大經略奏對筆記也。朕詳加披覽，所論溯本窮源，洞悉國家利病。若觸類引伸，推而廣之。治天下之要道，亦不外乎是矣。當即擇其尤爲切要者數百條，密飭內史另錄一編，以授

王。王其留意覽之。特諭。按奏對筆記。光緒初年坊刻本。官書無考。

皇父攝政王

睿親王多爾袞。號墨勒根代青。稱九王。順治元年。入關攝政。崇封皇叔父攝政王。五年。加對皇父攝政王。七年薨。追封成宗義皇帝。八年。追諭攝政王罪狀。詔曰。鄒親王等。合詞奏言。太宗崩時。臣等扶立皇上。並無欲立攝政王之議。惟伊弟豫郡王。陵詞勸進。彼時皇上。曾將朝政。付伊與鄒親王共理。逮後。獨擅威權。不令鄒親王預政。以親弟豫郡王。爲輔政叔王。自稱皇父攝政王。又親到皇宮院內。以爲太宗帝位。原係奪立。以挾制皇上。又逼死肅親王。遂納其妃。凡批票本章。概用皇父攝政王旨。不用皇上之旨。又悖理入生母於太廟。伏請重加處治。又伊近侍蘇克薩哈等。首言伊王在日。私造帝服。設匿御用珠寶。曾向何羅

會，商議欲背皇上等語，朕即令諸王大臣審問，皆實據，看謀篡果真，謹告天地，宗廟社稷，將伊母子並妻，罷追封，撤廟享，停其恩赦，布告天下，咸使聞之。后妃傳注：按睿忠親王，由叔父攝政王，崇封皇父，官書失載，實錄順治五年，詔曰：叔父攝政王，治安天下，有大勳勞，宜增加殊禮，以崇功德，及妃世子，應得封號，部院諸大臣，乘議具奏，禮部議定，攝政王稱號，凡文移書皇叔父王，常稱則云父王，或當時已擬崇封議而未行，而王遂自稱尊。

黃隲李三

順治九年十二月，殺京師大豪李三。帝幸內院，諭大學士等曰：黃隲李三，一細民耳，住居之外，復多造房屋，何也？洪承疇對曰：其房屋分照六部，或某人至某部有事，即入某部房內，毋敢攙越。帝曰：以一細民而越分，妄行如此，故天使之。

敗也。帝又曰：李三爲民大害，諸臣畏不敢言，鞠審之日，寧完我陳之，違，默無一言。鄭親王詰之，再三之，違始謂誅之則已，倘不行正法，必被陷害，豈非重身家性命者乎？見清史綱要。

閱通鑑

本紀。順治十年正月，上幸內院，閱通鑑。問漢高祖、唐太宗、宋太祖、明太祖孰優。陳名夏對曰：唐太宗似過之，上曰：不然，明太祖立法可垂永久，歷代之君皆不及也。

習騎射

順治十年三月，幸南臺較射，上執弓曰：我朝以此定天下，朕每出獵，期練習騎射，今綜萬幾，日不暇給，然未嘗忘也。

觀耕賞農

實錄順治十一年四月。上幸南苑。鑾輿所過。郊外農民耕耘不輟。上覽之大悅。願謂侍臣曰。去年旱潦爲災。小民甚苦。今如此辛勤。待秋成後。自獲享有年之樂矣。命以銀八十兩。賞農夫百八十餘人。

停止命婦入侍

順治十一年。諭歷代無命婦入侍之例。朕欽遵皇太后懿旨。將隨侍皇后及王貝勒等福金命婦。俱著停止。大朝日期。大臣命婦。照例上朝。

順治大訓

順治十二年。御製資政要覽及勸善要言成。皆親爲序。又諭大學士額色黑等。將歷代經史所載。凡忠義孝廉貞烈及奸貪鄙詐愚不肖等。分別門類。勒成一

書以彰法戒名曰順治大訓並頒賜御製資政要覽範行恒言勸善要言八臣
儆心錄十三年命編通鑑全書孝經衍義及上仰承皇太后慈訓製爲內則衍
義並爲序文恭呈慈覽

宮中從無淡女

順治十二年給事中季開生奏近開奉旨往揚州買女子乞速收成命得旨初
無買女子之事祖制宮中從無淡女且朕素奉皇太后慈訓豈敢妄行即天下
太平之後尙且不爲何況今日朕雖不德每思效法賢聖之主朝夕焦勞屢次
下詔求言上書禁勿稱聖惟恐所行有失若買女子入宮成何如主耶

金之俊

清史稿金之俊傳順治十二年之俊病乞休上不允遣畫工就邸圖其象諭諸

大臣曰。君臣之義。始終相維。爾等今後毋以引年爲請。爾等豈忍違朕。朕亦何忍使爾等告歸。昨之俊病。朕遣人問其容。念彼已老。惟恐不復相見。不勝眷戀。朕簡用之人。欲皓首相依。不忍離也。之俊泣謝。

此人必有品

國朝先正事略。奏松齡。順治十二年進士。選庶吉士。世祖召試。詠鶴詩。有鳴高常向月。善舞不迎人之句。上指示閣臣曰。此人必有品。置第一。

真才子

尤侗事略。順治十五年。王學士熙侍經筵。偶談及先生文。上立索覽。親加圈點。歎爲真才子者再。他日。又摘集中討蚤。徵示學士曰。此奇文也。又有以所著讀離騷樂府獻者。上亦讀而善之。令梨園子弟。播之管絃。以比清平調云。康熙年。

召試博學鴻儒。聖祖見其名曰：此老名士。先生刻二語於堂楹曰：真才子，章皇天語。老名士，聖上玉音。見者榮之。

佳狀元

徐元文傳。元文學。順治十六年進士第一。世祖召見乾清門。還啓皇太后曰：今歲得一佳狀元。從幸南苑。賜乘御馬。嘗命撰孚齋說。孚齋上讀書所也。覽之稱善。命刊行。

景運門直廡

實錄。世祖勸學崇儒。經訓史策。不離左右。數幸內院。與諸臣討論古今。建直廡於景運門。令翰林官分番入直。以備顧問。披覆章奏。每至夜分。勤求民瘼。喜聞闕失。皆出之至誠云。

素嚴禱雨

實錄。順治十七年六月久旱，上以禱雨，率諸王文武羣臣，素服，步至南郊齋宿。是日早，四際無雲，頃之陰雲密布，甘霖大霑。次日以禱雨祀天於闕丘，又大雨。

世祖御製書

殿本書目考。世祖御製勅纂諸書，現存十五種，如人臣做心錄、資政要覽、內則衍義、孝經衍義、大清律集解附例、此六種。宮史及四庫均載錄，如易經通注、孝經注、道德經注。此三種。宮史不載，四庫已錄，如上皇太后萬壽詩、內政輯要、太上感應篇注、講筵恭紀、勸學文、範行恒言。此六種。宮史四庫均未載錄。清史稿藝文志，尚有牛戒彙鈔、吳松隣刻有御製孝獻皇后行狀。按石渠寶笈，於世祖一字一畫均詳列之，何於御纂書籍轉多遺漏，或謂感應篇注等於善書，講筵

恭紀。未成卷帙。所以未列。豈其然乎。史臣贊世祖御製御纂諸書。皆洞澈事宜。昭宣理要。又曰。在位十八年。深仁厚澤。淪浹人心。前縱太宗之緒。後啓列聖之承。等語。今觀諸書。洵非溢美。又勸善要言。原祇清文。咸豐年譯刻。光緒年重刻。有德宗諭旨。

世祖崩於養心殿

實錄。順治十八年正月壬子。上不豫。丙辰。大漸。丁巳。崩於養心殿。年二十有四。宣示遺詔。清史。王熙傳。上大漸。召熙至養心殿。撰遺詔。熙伏地。飲泣。筆不能下。上諭。勉抑哀痛。即御榻前。先草第一條。以進。尋奏移乾清門。撰擬。進呈者三。皆報可。是夕。上崩。韓爌。大學士。王熙。行狀。辛丑。世祖不豫。自元旦。至五日。屢入請安。榻前。面奉天語。密有奏對。初六日。滯三下。召入養心殿。諡曰。朕勢將不起。爾

可詳聽朕言，速撰詔書。公俯伏泣，筆不能下。世祖諭抑悲痛，即於榻前起草。公拭淚吞聲，先成第一條以進，恐聖躬過勞，奏移乾清門下西園屏內撰擬。凡三次進覽，皆即報可。日入始脫稿，而世祖竟於是夕上賓。又清史，庶勒吉傳，上大漸召，庶勒吉與學士王熙撰擬遺詔，付內廷侍衛賈卜嘉進奏。上命庶勒吉懷詔草，俟上更衣畢，與賈卜嘉奏知皇太后，宣示諸王貝勒。是夕上崩，庶勒吉違旨將事，觀此王熙庶勒吉親承末命，可知吳偉業清涼山讚佛詩，別有寄託。何闕正史，後世浮議，更不足論矣。

聖祖本紀

聖祖仁皇帝，諱玄燁，世祖第三子，即位。紀元康熙，索尼蘇克薩哈必隆鰲拜輔政，誅內監吳良輔，詔停各省進獻，吳三桂等奏報大軍入緬，緝人執明桂王以

獻元年。命三桂總管雲貴。六年。帝親政。八年。命行南懷仁推算歷法。逮鰲拜。論罪。詔部院科道言民間疾苦。九年。詔訪隱逸。十年。東巡。至盛京。謁陵。後凡三巡。十二年。吳三桂等請撤藩。許之。三桂反。命順承郡王勒爾錦等師討。十三年。耿精忠據福建立反。十五年。尙之信。刼其父可喜。以廣東變。精忠之信。旋皆乞降。十六年。上御便殿。召大學士等。賜坐。論經史。始設南書房。十七年。三桂僭號。死。十八年。御試博學鴻詞。二十年。平雲南。三桂子世藩自殺。二十二年。幸五台山。命提督施琅征臺灣。鄉克塽降。二十三年。南巡。閱河。後凡五巡。皆至杭州。二十四年。命公彭春。赴黑龍江。攻雅薩克城羅刹。破之。二十七年。武昌兵變。討誅之。命內大臣索額圖等。赴尼布楚。與鄂羅斯定邊界。二十九年。噶爾丹犯邊。裕親王福全。敗之。烏爾希通。三十二年。鄂羅斯祭漠汗來貢。上曰。外藩朝貢。固屬盛事。

傳至後世，未必不因而生事，惟中國安寧，則外患不生，當培養元氣爲根本耳。三十五年，上親征噶爾丹，敗遁，勒銘昭莫多而還。三十六年，復親征，次狼居胥山，噶爾丹仰藥死，班師。四十二年，西巡，至西安。四十三年，命侍衛拉錫，覲河源。至星宿海。四十九年，再廢皇太子允禔。五十年，普免錢糧。五十一年，詔嗣後滋生戶口，永不加賦。五十三年，御製律呂淵源成。五十六年，詔曰：帝王以敬天法祖爲本，合天下之心以爲心。公四海之利以爲利，嚮治於未亂，保邦於未危，夙夜兢兢，所以圖久遠，今雖未敢謂家給人足，俗易風移，而欲使民安阜，物之心，始終如一，但天下大權，常統於一，爲天下得人難，是以朕垂老而倦倦不息也。五十七年，命十四子允禵，視師青海。五十九年，命年羹堯等，分道入藏。六十年，臺灣朱一貴倡亂，捕誅之。六十一年，乾清宮賜千叟宴。上崩，葬景陵。諡曰：聖祖。

早承大業，寰宇一統，雖曰守成，實同開創，聖學高深，幾暇格物，審貫天人，尤爲古今所未觀，而久道化成，風移俗易，克致太平，道盛德至善，民不能忘，爲人君止於仁，嗚呼，聖矣哉。

聖祖誕生

實錄，聖祖，母孝康章皇后，順治十一年，三月十八日，誕上於景仁宮，先是后詣慈寧宮問安，將出，衣裾若有龍繞，太皇太后見而異之，問知有娠，願謂近侍曰：朕曩孕，皇帝時，左右嘗見朕襜裙間，有龍盤旋，赤光燦爛，今妃亦有此祥，生子必膺大福，至上誕降之辰，五色光氣，充溢庭戶，與日並耀，見者咸稱奇瑞云。

福佑寺避痘

聖祖御製文集，皇考世祖，因朕年幼時，未經出痘，令保姆護視於紫禁城外，父

母膝下。未得一日承歡。此朕抱恨之處。今西華門外。福佑寺後殿。供奉神牌。書聖祖仁皇帝大功德佛。額爲慈容殿在。相傳共寺爲當日保姆護御之邸。

願效法父皇

本紀。聖祖天表英俊。雙瞳隆準。耳垂聾洪。六齡偕弟兄。問安。世祖問所欲。皇二子福全言願爲賢王。帝言願效法父皇。世祖異焉。八齡踐阼。太皇太后問以何欲。曰。惟願天下乂安。生民樂業。共享太平而已。

慈訓

康熙元年。尊聖祖母爲太皇太后。御製文。庭訓。朕自幼齡學步。能言時。即奉聖祖母慈訓。凡飲食。勸履言語。皆有矩度。雖平居獨處。亦承敬罔敢越軌。少不然。即加督過。賴是以克有成。八齡。續承大統。聖祖母作書訓誡。教以爲君難。必深

思得衆則得國之道。使四海咸登康阜。愷乃威儀。謹爾出語。夙夜恪勤。以祇承祖考遺緒。朕仰戴斯言。大懼弗克。遂茲丕訓。惟曰。庶其自強不息。以日新厥德。

述鰲拜

本紀。康熙八年五月。詔逮輔臣鰲拜。交廷鞫。上久悉鰲拜專橫亂政。特慮其多力難制。乃選侍衛拜唐阿。年少有力者。爲撲擊之戲。是日。鰲拜入見。即令侍衛等摺而繫之。於是。有善撲營之制。王大臣議罪。請族誅。詔貸其死。籍沒拘禁。

南懷仁

南懷仁傳。康熙八年。上從南懷仁言。新法測驗。改正閏月。節氣占候。悉用其說。改造觀象臺儀器成。擢南懷仁監正。自是。欽天監用西洋人。累進爲監正。監副。相繼不絕。聖祖嘗言。當歷法爭議未已。已所未學。不能定是非。乃發憤研討。卒

能深造精微，極其闢奧，爲天下主，庶已。竊學如是云。按南懷仁日侍左右，每有巡幸，亦必扈從。蓋聖祖潛心天算，隨時隨地，常有召對云。

肇學經筵

熊賜履事略：康熙十年，肇學經筵大典於保和殿，以公爲講官，知經筵事。頃之，聖祖以春秋兩講，爲朔疏闕，遂命公日進講宏德殿。聖祖日益勤學，有疑必問，尤盡心於堯舜義孔之道。暨周程張朱五子之學，咨諏討論，達於改事，融會貫通。其甥緒白公發之。

撤藩

康熙十二年，吳三桂請撤藩。帝自少時即以三藩勢熾日熾，不可不撤，遂從其請。三桂反，舉朝震驚。帝不爲動，立下其子吳世熊於獄，旋誅之。三桂聞報，驚曰：

上年少乃能是耶。爲之氣奪，遂不振。又初議撤藩，米思翰堅持乃定，及三藩皆叛，有追咎主議諸臣者，上曰：此出自朕意，豈因其叛，譏過於人耶。卒平之。

知行執重

葉方藹傳：康熙十六年，進講中庸，上問知行孰重，對曰：朱熹之說，以次序言，則知先行後，以功夫言，則知輕行重，上曰：畢竟行重，若不能行，知亦虛知耳。

南書房

張英傳：康熙十六年，聖祖命擇詞臣教誨有學者，日侍左右，設南書房。命英入直，賜第西安門內，詞臣賜居禁城自此始。時方討三藩，軍書旁午，上日御乾清門聽政後，即幸懋勤殿，與儒臣講論經史，英率辰入暮出，退或復宣召，輟食趨宮門，慎密恪勤，上益器之，又高士奇傳以明珠薦，入內廷供奉，賜居西安門，上

嘗願侍臣曰。朕初讀書。內監授以四子本經。作時文。得士奇。始知學問門徑。初見士奇。見古人詩文。一覽。即知其時代。心以爲異。未幾。朕亦能之。士奇無戰陳功。而朕待之厚。以其裨朕學問者大也。又王士禛傳。上留意文學。皆從容問。今世博學善詩文者。皆以士禛對。召入對。賦詩稱旨。改翰林院侍講。入直南書房。漢臣自邵曹改詞臣。自士禛始。又沈荃事略。聖祖召入內殿。論古今書法。嘗諭李光地曰。朕初學書。沈荃實侍。屢指陳得失。至今每作書。未嘗不思荃之勩也。又本紀。聖祖嘗諭曰。山東人性多偏執。好勝尋仇。惟王士禛無之。又高士奇屢被劾。既放歸。復召還。恩眷不衰。乃近見士奇書畫。藏目底本。內分三等。手注精者。自留玩賞。次者可供贍餽。劣者專備進呈。見者皆斥其居心不可問云。

康熙十七年，詔舉博學鴻儒，內外諸臣各舉所知，膺薦人員陸續到京，諭各量給銀米。因天寒晷短，復諭天氣融和，定期考試。十八年三月初一日，太和殿行禮，領題，禮仁閣下考試。上諭：爾等皆係天下有才學之人，必考試乃得各見所長。今賜爾等宴，歷來殿試及散館大考，皆無賜宴之事，此係曠典，爾等知之。試卷進呈，皆親加批覽，取彭孫適等五十餘人，分別授官，並著纂修明史。鶴徵錄。周清源未遇時，嘗宿于忠肅祠，夢忠肅誦王昌齡吳江詩，末句：壺字易衡字。清源曰：非衡字。忠肅答曰：衡字好，若壺字便不好。及召試，賦題爲：璿璣玉衡。心竊喜之。果以是入翰林，累擢少司空，蒙賜一片冰心在玉壺印章，竟卒於官。又朱彝尊，上久知其名，御試時，遣侍衛索草進閱，擢翰林，入直南書房。

元宴唱和

康熙二十一年正月。上元。上御乾清宮。賜宴。命諸臣歡忭。暢飲。笑語無禁。復命近御前觀燈。更賜卮酒。既撤筵。諸臣以次出。上命羣臣有宿辭者。令內官扶掖而行。並做拍梁體賦詩。御製首句云。麗日和風被萬方。羣臣集太和殿下。以次賡和焉。

靖海將軍

施琅傳。康熙二十二年。琅統兵平臺灣。自海道報捷。疏至。正中秋。上賦詩旌琅功。復授靖海將軍。靖封海侯。琅辭侯封。乞賜花翎。部議謂非例。上命毋辭。並如其請。賜花翎。及入覲。上諭琅曰。當時尙有輕爾者。惟朕深知爾。待爾甚厚。海寇據臺灣。朕特加擢用。爾能不負任使。舉六十年難靖之寇。殄滅無餘。或有言爾恃功驕傲。當留勿遣者。朕思寇亂之際。尙用爾勿疑。況天下已平。反疑而勿遣。

耶。今命爾復任，宜益加敬慎，以保功名。

蒙古生計

本紀。康熙二十三年。上幸古北口。諭曰。朕視外旗蒙古。與八旗一體。今巡幸之次。見其衣食困苦。深用惻然。即傳諭所過地方。蒙古無告者。許其來見。便詢生計。於是蒙古扶老携幼。叩首行宮門。上詳問年齒生計。各給銀兩布疋。

樂此不疲

康熙二十三年。上製五臺山碑文。召示廷臣曰。近人每一文出。不樂人點竄。此文之所以不工也。又十一月。南巡。泊舟燕子磯。讀書至三鼓。侍臣高士奇。請少節養。上曰。朕自五齡受書。誦讀恆至夜分。樂此不爲疲也。

御前作書

陳元龍事略。康熙二十四年入直南書房。明年侍班乾清宮。聖祖頗謂曰。朕素知爾工書。其作大字一幅。命就御前作書。上嘉獎。賜以御書闕里碑文示之。嘗陳請父之闈。年逾八十。擬愛日堂三字額。上御書賜之。上南巡。猶詢其父。賜御書南陔日永額。按聖祖賜元龍父題額。而世竟指爲高宗。賜世伯母。遂多誤傳。孝服用布

康熙二十六年。太皇太后崩。帝擗踊哀號。割辮布服。舊制。國有大喪。自宗室公以上。服素帛。今令孝服俱改用布。又欲於宮中行三年喪。羣臣議不可。帝不允。其後太學生劉棫、桂等五百餘人。屢請循古制。以日易月。帝不得已。勉從之。

破肚總兵

藍理事略。征澎湖時。中敵。拖傷血戰。臺灣平。爲首功。康熙二十六年。入覲。上召

至前，問血戰狀，解衣視之，爲撫摩傷處，嗟歎良久，又引見皇太后，曰：「此破肚總兵也，視若家人父子。」每奏對，皆侃侃直陳，或手舞足蹈不已。上嘉其直率，不爲罪，御書所向無敵額賜之。

寧壽新宮

康熙二十八年，諭：朕因皇太后所居寧壽舊宮，歷年已久，特建新宮，比舊更加宏敞輝煌，今已告成，應即恭奉皇太后移居寧壽新宮。

取米一撮

本紀：康熙二十八年，南巡，上駐揚州，詔曰：朕觀風問俗，爾織不設，屢從僅三百人，頃駐揚州，民間結綵盈衢，雖出愛敬之誠，不無少損物力，其前途經過郡邑，宜悉停止，還次蘇州，江南百姓，籲留停蹕，獻土物爲御食，委積岸上，令取米一

撮果一枚，爲留一日。

天下第一清官

施世綸，事略。康熙二十八年，擢守揚州。上南巡，召對良久。顧左右曰：「此天下第一清官也。」調江寧，以父憂去官。乞留者萬人，不得請。乃人授一錢，建雙亭於府署前，名一文亭。

黃黎州

黃宗羲，事略。祖表章，循術。康熙二十九年，徐尙書乾學侍直，上談及遺獻，以先生對，且言曾經臣弟元文疏薦。老不能來，上曰：「可召至京，朕不授以事，即欲歸，可遣員送之。」徐公對以篤老無來意，上歎息不止。

毛西河

毛奇齡事略。聖祖精音韻學，剖晰精微。先生著古今通韻進呈，上覽之稱善。上南巡，進樂本解說，詔傳至行在，獎勞。上謁禹陵，迎駕西陵渡，上遙見，遣侍衛勞問，及三巡江浙，先生謁行宮，年老矣，命起立勿跪，且賜御書，時皇太子隨駕，亦賜書屏聯，其蒙恩遇如此。

天算實驗

本紀，康熙三十一年正月，上御乾清門，出示太極圖，五音八聲八風圖，因言律呂新書徑一圍三之法，用之不合，徑一尺，圍當三尺一寸四分一釐，積至百丈，所差至十四丈外矣，帝可用耶，惟隔八相生之說，試之悉合，又論河道，閘口流水，晝夜多寡，可以數計，又出示測日晷表，晝示正午日影至處，驗之不差，諸臣皆服。

修路爲民

康熙三十三年五月。步軍統領凱音布奏。天壇新修之路。禁人往來。上曰。修路以爲民也。若不許行。修之何益。後若毀壞。令步兵隨時葺治。又上幸畿甸。閱視河隄。諭扈從衛士。魚貫而行。勿踐田禾。

親征噶爾丹

康熙三十五年正月。上親征噶爾丹。次滾諾。大雨雪。上露立。俟軍士結營畢。乃入行帳。軍中畢炊。乃進膳。至燕圖庫列圖駐營。其地素乏水。至是山泉湧出。次克魯河。噶爾丹不信六師猝至。登孟納爾山。望見黃幄網城。大兵雲屯。沒無涯際。大驚曰。何來之易耶。棄其廬帳宵遁。

眞神人也

康熙三十六年。上巡幸塞外。厄魯特丹濟拉來歸。上獨御鹿臺召見之。丹濟拉出語人曰。我罪人也。上乃不疑而獨賜見。真神人也。

績學參徵

梅文鼎事略。康熙四十一年。聖駕南巡。李文貞光地扈駕。有旨取先生所著書。遂以天學疑問。呈求聖誨。奉旨。朕留心歷算多年。此事朕能決其是非。留覽三日。諭云。昨所呈書。甚細心。且議論亦公平。此人用力深矣。朕帶回宮中細閱。文貞因求親加御筆批正。明年復南巡。發回原書。中間圈點塗抹。及籤貼批語。皆上親筆也。諭文貞。借來見尋。伏迎河干。召對御舟中。從容垂問。凡三日。上諭文貞曰。天象算法。朕最留心。此學今鮮知者。如文鼎。實僅見也。臨辭。特賜績學參徵四字。又命其孫毅成。入內廷學習。並諭將律呂正義。寄去令看。指出錯處。謂

古帝王有都兪吁咈咈字，後來遂止有都兪，即朋友亦不喜人規勸，此私意也。可將此意寫與汝祖知之。

獨立船頭射江豚

本紀：康熙四十五年十月，諭曰：今天下承平日久，曾經戰陣大臣已少。知海上用兵者益少。他日臺灣不無可慮。朕申子惠巡，由江甯登舟至黃天蕩。江風大作，朕獨立船頭射江豚，了不爲意。迨後渡江，漸覺心動。去歲渡江則心悸矣。皆年爲之也。問之宿將亦然。今使高年奮勇，何可得耶。

蒙古書言黃河

康熙四十八年十月，上與李光地論水脉水源。秦岱諸山自長白山來，凍水伏流，黃河未到積石，亦是伏流。蒙古人有書，言之甚詳。江源亦自崑崙來，至於岷

山乃不伏流耳。

親測河

康熙五十年正月。上親通州河隄。次河西務。登岸步行二里許。親置儀器。定方向。釘椿木。以紀丈量之處。諭曰。用此法。可以測量天地日月交食。算法原於易。用七九之奇數不能盡者。用十二二四之偶數。乃能盡之。即取象十二。時二十四氣也。

六旬萬壽

康熙五十二年。上六旬萬壽。諭朕。昨見各處爲朕保釐乞福者。不計其數。實覺愧汗。萬國安。即朕之安。天下福。即朕之福。朕老矣。臨深履薄之念。與日俱增。敢請假乎。上還宮。各省臣民。夾道俯伏歡迎。上駐輦慰勞之。直省祝壽老人。賜宴。

於揚春園年過八十以上者扶掖至御前親視飲酒諷之曰古以養老尊賢爲先使人人知孝知弟則風俗厚矣稱耆老當以此告之鄉里昨早大雨沾足爾等速回無誤農時各賜白金。

左手執筆

康熙五十四年十月上諭大學士賚右子病不能寫字用左手執筆批答奏摺期於不滯洩也。

東顧問安

實錄康熙五十六年孝惠皇太后病上足背浮腫不能轉移用手帕纏足乘輦輿詣寧壽宮請安捧皇太后手慘切異常以聖體不能支持出在芥炭門內設帷幄以居皇太后崩內大臣等奏滿洲舊例年老疾者皆以孝服爲忌今皇上

壽近七旬，又適抱恙，不必行割辯之禮，得旨爾等各有父母，勿過勸阻，朕當力疾盡禮，上拊膺哀號，即行割辯，孝服用布，慟哭不已，諸皇子屢次叩請始回蒼震門內。

帝王最苦

本紀：康熙五十七年，詔曰：朕八齡踐阼，今年近七旬矣，天下和樂，四海乂安，而欲使民安物阜之心，始終如一，殫竭思慮，耗敝精神，殆非勞苦二字所能盡也。古帝王享年不永，世每譏評，不知天下事煩不勝其勞慮也，人臣可仕則仕，可止則止，年老致歸，優游自適，帝王仔肩，無可旁委，洪範五福，終於考終，命以壽考之難得也，易遜六爻，不及君主，人君無退讓之地也，昔人每云帝王當舉大綱，不必兼綜細務，朕不謂然，一事不謹，即貽四海之憂，一念不謹，即貽百年之

患朕從來蒞事，無論鉅細，莫不愼之又愼。惟年既衰暮，賦罷五十七年，憂勤惕勵之心，墮於末路耳。大小臣工，其體朕心，他日遺詔，備於此矣。

好學不倦

實錄。聖祖徇齊天縱，好學不倦。凡帝王政治，聖賢心學，六經要旨，無不洞徹原委。至孝性成，奉事太皇太后、皇太后，竭誠盡敬，勵精求治，日理萬幾，六十餘年，孜孜如一日。戶口繁增，風俗醇美，闢前古未聞之封疆，服從來未服之方國。巡閱河工，指授方略，淮黃底定，且允文允武。多藝多能，著作吟咏，細楷隸篆，莫不精妙。挽弓十五鈞，用矢十三握，左右騎射，發必中的。至聖學高深，御纂經史性理，以至天文歷數、樂律、圖繪，尤古所未有。又史事舉要云：聖祖於古今中外學術，無不習，且無不創立新法。中國舊以天元術爲最高算法，後失傳，自西洋天

算輸入。帝譯代數曰：供根方，梅穀成謂與天元名異實同。由是天元復顯。以湯若望爲欽天監正。南懷仁爲副。時憲書始用西法。前此輿圖不施經緯線。紀里多誤。帝緝皇輿全覽圖。命使臣測量極度。極高差一度。爲地距二百里。又於山脈河流考其源委。故精密亦過前代。又聖祖於希臘拉丁文字。無不兼通。實集古今中外學術之大成云。

教王遣使入覲

康熙五十九年十二月。西洋教王遣使嘉樂奉表入覲。先是四十四年。羅馬教王格勒門第十一遣使多羅來。華人覲。聖祖派沙岡安白晉赴羅馬答拜。中途召回。至是教王復遣嘉樂等奉表章及禁約二件。至京請覲。初賜見於九經三事殿。親進表章。行三跪九叩禮。賜宴。上親賜酒。並念天寒。外國衣薄。賜御用貂

檄一作嘉樂進獻教王所貢方物。上復有頒賜。再見於清溪書屋。又召至淵鑑齋。辨論教理。諭令寄字教王。不准傳教。並遣回西洋。嘉樂著有來朝日記。又前有德理格馬國賢等。上教王書。略云。每蒙召對。驚仰聖聰。與人不同。中國古書極多。無一不背誦。西洋來書雖廣。無一不精通。反爲西洋人之師。中國書與西洋書。古人之所未及者。俱發明之。聖德聖學。可知矣。西洋人所聞者。不過萬分之一耳。按西人崇敬聖祖。詳見所著康熙大帝一書。各國皆有譯本。而本國知者轉少。亦可歎也。

尊號陋習

本紀。康熙六十年。三月。羣臣請上尊號。上不許。曰。加上尊號。乃相沿陋習。不過將字面上下轉換。以欺不學之君耳。本朝家法。惟以愛民爲事。不以景星慶雲。

芝草甘露爲瑞，亦無封禪改元之舉。今西陲用兵，兵久暴露，民苦轉輸，朕方修省經營之不暇，何賀之有。

聖祖崩

康熙六十一年十一月，帝不豫，自南苑回駐暢春園。命皇四子雍親王、恭代祀天，疾大漸，召皇四子於齋宮，召皇三子誠親王允祉、皇七子淳郡王允祐、皇八子貝勒允禩、皇九子貝子允禰、皇十子敦郡王允禛、皇十二子貝子允禩、皇十三子允祥，尚書隆科多，至御榻前，諭曰：皇四子人品貴重，深肖朕躬，必能克承大統，著繼朕登基，即皇帝位。皇四子聞召馳至上，告以病勢日臻之故。是日，上崩，壽六十有九。按聖祖崩時，諸皇子同承末命，詎容假借，乃有傳位十四皇子之謠。大抵因皇子行次，初冠於上，如四皇子、十四皇子等，是至世宗時始改書

爲皇幾子。如皇次子皇六子等是。而改十爲子之謠於是起矣。

世宗本紀

世宗憲皇帝諱胤禛。聖祖第四子。即位。紀元雍正。命貝勒允禩。皇十三弟允祥。大學士馬齊。尙書隆科多。總理事務。元年。頒詔訓飭督撫提鎮以下文武各官。又訓內閣大學士等。及諭八旗等。除山西陝西樂籍。改業爲良民。旋並除紹興惰民丐籍。永禁徽寧等處伴當世僕名色。二年。青海平。封年羹堯一等公。岳鍾琪三等公。三年。以固安官地二百頃。爲井田。議年羹堯罪。賜死。四年。雲南總督鄂爾泰。請苗疆改土歸流。宣皇八弟允禩等罪狀。設浙江觀風整俗使。五年。與鄂羅斯定界於恰克圖。定官員頂戴之制。議隆科多罪。議延信罪。俱禁錮。減浙江嘉湖田賦十之一。永爲例。並免江蘇額徵浮糧。七年。刊大義覺迷錄。命傅爾

丹征準噶爾始設軍機房。十年策凌敗準夷於額爾得尼加超勇名號。削傅爾丹職。岳鍾琪逮京。十一年諭州縣設立社倉。十二年議遣使準噶爾宣諭。十三年準噶爾賚表進貢。勅令定界。詔地方立保甲。必願輿情。爲政以得人爲要。不得其人。雖良法美意。徒飾觀聽。於民無濟也。上崩。遣命莊親王允祿。果親王允禮。大學士鄂爾泰。張廷玉。輔政。葬泰陵。論曰。聖祖政尙寬仁。世宗以嚴明繼之。勵精求治。朝乾夕惕。無一日寧。嘗歎曰。爲君難。夫知爲君之難。敬天憂民。勤勞無逸。天下尙有不治者乎。

世宗誕生

實錄。世宗母孝恭仁皇后。康熙十七年戊午十月三十日寅時誕生。有夢月入懷之兆。舉止端凝。日光炯照。性尤孝友。他二阿哥罪廢。衆議當幽禁。上獨涕泣

不能起。聖祖爲之動容。平日無私交。無黨援。巖然自守。聖祖嘗諭諸大臣曰。朕萬年後。必擇一堅固可託之人。與爾等作主。蓋天心默定。神器攸歸久矣。

始居養心殿

世宗初即位。諭云。朕思乾清宮。乃皇考六十餘年所御。朕即居住。心實不忍。意欲居於養心殿。著將殿內略爲葺理。務令樸素。朕居養心殿。守孝二十七月。以盡朕心。按自後遂以養心殿爲寢宮。

密織建儲

本紀。雍正元年。召王大臣九卿。而諭曰。建儲一事。理宜夙定。去年十一月之事。倉卒之間。一言而定。聖祖神聖。非朕所及。今朕親寫密封。織置錦匣。藏於正大光明扁額之後。諸卿其識之。

孫嘉淦

孫嘉淦事略。世宗初立。公官檢討。上封事三。曰親骨肉。曰停捐納。曰罷西兵。上召諸大臣示之。賁翰林院掌院學士曰。爾翰林乃容此狂士。學士叩頭謝。朱文端在側。徐對曰。此生誠狂。然臣服其膽。良久。上大笑曰。朕亦不能不服其膽。即召對。授國子監司業。他日。上手指公示九卿曰。朕即位以來。孫嘉淦每事直言。極諫。朕不惟不怒。且嘉悅焉。爾等當以爲法。

方苞

方苞事略。初以戴名世案被罪。雍正元年。世宗以覃恩首免之。後召見。足弱不能行。命二內監扶掖至養心殿。願視嗟歎久之。有先帝持法朕原情之諭。賜芽茶二罇。命仍充武英殿總裁。

朋黨論

實錄。雍正二年。上以諸王大臣互爲朋黨。自即位至今。一年以來。此風猶未盡除。因頒示御製朋黨論一篇。令羣臣洗心滌慮。詳玩熟體之。

夕楊朝乾

本紀。雍正三年三月。年羹堯表賀日月合璧。將朝乾夕惕。寫作夕楊朝乾。詔切責之曰。年羹堯非粗心者。是直不以朝乾夕惕許朕耳。則年羹堯背海之功。亦在朕許與不許之間。未可知也。顯係不敬。其明白題奏。旋以欺罔貪殘大逆。不道論罪。賜自盡。

阿其那

實錄。雍正四年二月。諸王大臣合議。允禩不孝不忠。悖亂奸惡。請即行正法。上

御勤政殿特召諸王大臣及允禩入，諭曰：允禩乃皇考之子，太祖太宗之孫，朕之弟也。今日之舉，列祖皇考在天之靈，昭鑒於上。儻允禩不應正法，而爾等妄行陳奏，以殘害列祖皇考之子孫，而陷朕於不義，爾等之罪，尚可追乎。朕曾降旨，斷不治允禩之罪。今令離宗，亦因伊指天發誓，詛咒一家，此萬不得已耳。旋命圍禁高牆，又命改名詢問允禩，自改名阿其那，改伊子弘旺名菩薩保。又允禩改名塞思黑，並允禩等，皆禁錮。

名教罪人

本紀：雍正四年三月，侍講錢名世，授詩年義，堯事發，革去職銜，上親書名教罪人四字，懸其門，並令文臣作爲詩文刺惡之。

天賜奇臣

清帝外紀

鄂爾泰事略雍正四年。署雲貴總督。貴州苗亂。奏欲百年無事。非改土歸流不可。欲改土歸流。非大川兵不可。宜悉令獻土納貢。違者勦。疏上。盈廷失色。世宗大悅。曰。此奇臣。天賜朕也。命進呈生年月日。手鐫三省總督印。以賜苗平。陞見領軍機。受世宗非常之知。每人朝。盡三鼓方出。語秘外。莫能知。上嘗云。朕有時。自信不如信鄂爾泰之專。事無大小。必命平章以聞。

舅舅隆科多

實錄。世宗初立時。以隆科多受顧命。謚稱舅舅。隆科多。蓋孝懿仁皇后弟也。雍正五年。隆科多獲罪。命王大臣會鞫。以聖祖升遐。隆科多妄言身藏匕首以防變。又自稱白帝受命之日。即死期將至之時。上躬祀壇廟。妄謂防刺客。令搜查神案。上謁陵。妄奏諸王心變。具獄辭。罪凡四十一款。帝召議政大臣內閣九卿。

等。諱曰。隆科多所犯各款。實不容誅。但皇考升遐之日。召朕之兄弟及隆科多入見。面降諭旨。以大統付朕。是大臣之內。承旨者。惟隆科多一人。今因罪誅戮。朕心有所不忍。免其正法。於暢春園外。築屋三楹。永遠禁錮。

李紱

李紱。事略。雍正七年。謝濟世供出。昔參田文鏡。由李紱蔡廷授意。世宗大集廷臣。命公隨入。跪階下。親詰責之。天顏甚厲。聲震殿角。近臣皆股栗。公奏對如常。無乞憐語。世宗知公深。特惡其倔強。欲痛有所摧折。仍滌洗而復用之。兩次決囚。命縛公與蔡尙書。同至西市。兩手反接。刀置頸。問此時知田文鏡好否。對曰。臣愚。雖死。不知田文鏡好處。乃宣旨赦還。卒寬免。

軍機房

張廷玉傳，雍正七年，上以西北用兵，命設軍機處，除宗門內，以怡親王允祥，廷玉及蔣廷錫領其事，嗣改稱辦理軍機處。廷玉定規制，諸臣陳奏，常事用疏，自通政司上，下內閣擬旨，要事用摺，自奏事處上，下軍機處擬旨，親御硃筆批發。自是內閣權移軍機處，大學士必充軍機大臣，始得預政事，日必召入對，承旨，參與機密。廷玉周密勤慎，尤爲上所倚，上偶有疾，獎廷玉等翌贊功，予世職，遣詔命他日配享太廟。

殺道士

清史綱要，雍正八年，河南道士賈自芳，偕居京師，白雲觀，以薦入宮治病，口誦經咒，有天地聽我主持，鬼神歸我驅使之語，帝惡而殺之。

錮僧人

龔鑑事略初知甘泉縣事。世宗晚習禪悅。僧明慧者。曾與內廷法會。干謁遍大江南北。一日以書幣關白於君。君杖其使而遣之。事竟上聞。上召明慧還京。錮之。不許復出。

二十八經同函

雍正十三年。校刻金剛圓覺等二十八經。及御選語錄等十二種。名曰二十八經同函。又有歷代禪師前後集等。皆御製序言。自畧則明居士略云。朕少年時。喜閱內典。因師章嘉。梵行精純。圓通無礙。滌邸清朗。時接茶話。曾延僧衆。隨喜同坐。兩日。共五枝香。即潤達本來。叩問章嘉。乃曰。若王所見。如針破紙。竄從隙窺天。雖云見天。然天體廣大。計隙中之見。可謂徧見乎。朕復著力參求。晚經行次。出得一身透汗。桶底當下脫落。始知實有重闢之理。乃復證問。章嘉云。雖進

一步。譬猶出在庭院中觀天矣。然天體無盡。究未悉見。至次年靜坐。無意中。忽搨末後一闕。方達三身四智合一之理。物我一如本空之道。慶快平生。詣章嘉所禮謝。國師望見。即曰。王得大自在矣。此朕平生參究因緣。章嘉實朕證明恩師也。其他禪侶。迦陵性音輩。不過曾在藩邸往來。曾與法會耳。又御製當今法會序。朕選輯語錄。聽政餘暇。嘗與在廷王大臣言之。未及半載。而王大臣之能徹底洞明者。遂得八人。豈非法會盛事。因取王大臣所著述。擇編一集。錫名當今法會。至在內焚修之沙門羽士。亦有同時證入者六人。其所作亦附刊云。

世宗崩

本紀。雍正十三年八月。上不豫。時駐蹕圓明園。皇四子寶親王。與和親王弘晷。朝夕謹侍。疾大漸。召莊親王允祿。果親王允禮。大學士鄂爾泰。張廷玉。領侍衛

內大臣豐盛額訥親、內大臣戶部侍郎海望、入受願命、宣旨傳位皇四子。次日崩、壽五十有八。奉大行皇帝還宮、啓雍正元年、立皇太子、密封、宜詔即位。張廷玉傳召莊親王等至寢室、鄂爾泰、張廷玉、恭捧御筆、親書密旨、命皇四子寶親王爲皇太子、即皇帝位。鄂爾泰事略、世宗晚年、常召公宿禁中、逾月不出。是夜召受願命者、惟公一人。公捧遺詔、從園深夜馳入禁城、擁高宗登極、宿禁中七晝夜、始出。人驚、公左袴紅濕、方知夜馳時爲菴所傷、公竟不覺也。以上所述略異、倉卒傳聞、不免參差。惟世宗之崩、相傳修煉餌丹所致、或出有因。至傳位之詔、元年密緘、曾見明諭、無可疑也。

高宗本紀

高宗純皇帝諱弘曆、世宗第四子、即位紀元乾隆、修明史成、元年、御試博學鴻

詞。次年讀試。四年，叙張廣泗經略苗匪功。八年，命奉宸院試行區田法。東巡謁陵。後凡四巡，皆至盛京。十三年，幸魯，謁孔林，以傳恒爲經略，統金川軍務。十四年，大金川莎羅奔郎卡乞降。十五年，巡幸嵩洛。十六年，南巡至杭州。後凡五巡。十八年，蘇祿國王請內附，并入貢。二十年，命班第阿睦爾撒納等，征準噶爾。克伊犁，獲達瓦齊，準部平。阿睦爾撒納叛，討之。二十三年，命兆惠等征回部。次年，平。二十六年，賜功臣畫像。紫光閣。三十三年，征緬甸。旋緬酋稱臣納貢。三十八年，詔修四庫全書。四十一年，以平定兩金川，賞阿桂等功，復賜圖像。四十六年，暹羅國長鄒昭請入貢，以御史劉天成奏，諱曰：均田之法，勢必致貧者未富，富者先貧，不可行。五十年，舉千叟宴。五十二年，臺灣林爽文作亂，擒誅之。五十三年，命孫士毅征安南。次年，安南國王阮光平乞降，並入覲。五十六年，命福康安

海蘭察等。征廓爾喀。次年廓人乞降。五十八年。英吉利貢使馬瑟爾尼等。入覲。各省奏報民數三萬七百四十六萬有奇。較康熙四十九年。增十五倍。上諭曰。生之者衆。食之者寡。勢必益形拮据。各省督撫。及有牧民之責者。務當勸諭化道。俾皆儉樸成風。服勤稼穡。借物力而盡地利。共享昇平之福。六十年。立嘉親王爲太子。以明年爲嗣皇帝。嘉慶元年。行傳位禮。尊爲太上皇帝。四年。崩。葬裕陵。論曰。高宗揆文奮武。開疆拓宇。於斯爲盛。享祚之久。同符聖祖。而壽考則過之。三代以後。未嘗有也。惟耄期倦勤。蔽於權倖。爲可歎焉。

高宗誕生

本紀。高宗。母孝聖憲皇后。康熙五十年。辛卯。八月十三日子時。誕上於雍邸。隆準。順身。聖祖見而鍾愛。令讀書宮中。過日成誦。木蘭從獵。命侍衛引射鹿。甫上

馬熊突起，上控轡自若。聖祖御鉛鎗，熊入武帳，顧語溫惡。皇太妃曰：是命貴重，福將過予。高宗御製獅子圖詩注：予十二歲，蒙皇祖命養育宮中。是年，皇考詣皇祖幸本園進膳，皇祖指予謂皇妣：孝敬憲皇后曰：帶其生母來見。皇祖連謂之有福之人，即今仰窺皇祖恩意，似已知予可以付託。因欲豫觀聖母福相也。

高宗生於雍和宮

高宗生於雍邸，即雍和宮。富察敦崇《皇室聞見錄》有辯誣云：俗謂雍正存落邸時，王妃誕生一女，恐失王眷，適有隣居海寧陳氏，恰生一男，命太監取而觀之。既送出，則易女矣。男即乾隆也。夫以雍正之英明，豈能任後宮以女易男。且皇孫誕生，應由本邸差派太監，面見內奏事，先行口奏，再由宗人府專摺奏聞，以備命名。豈能遲至數日數月，方始聲報耶。其誣可知。

可亭先生

朱軾傳。高宗初典學。世宗命軾爲師傅。設席懋勤殿。行拜師禮。軾以經訓進講。眞稱賈董宋五子之學。高宗深重之。懷舊詩。稱可亭朱先生。可亭。軾號也。

舊學受知

梁詩正事略。初公直上書房。侍高宗及誠和兩親王講讀。以舊學受知。自言嘗爲高宗作學窠大字。適憲皇帝駕至。諸臣鶴立以俟。憲皇帝命竟其書。墨漬袍袖。又命高宗曳之。今藏此衣三十年。他時服以就木。庶存殉志君恩也。

從祀元臣

張廷玉傳。高宗即位。特命進二等伯。賜號勤宣。尋謚本朝文臣。無爵至侯伯者。廷玉爲例外。命自兼。不必令子若滿襲。又謚。廷玉年已過七十。不必向早入朝。

炎暑風雪，無強入。若徯卒，上以廷玉入內廷，須扶掖，命次子庶吉士若澄，直南書房。十三年，以老病乞休，上諭曰：卿受兩朝厚恩，且奉皇考遺命，配享太廟，豈有從祀元臣，歸田終老，即以朕十餘年眷待，亦不當言去，朕且不忍令卿去。卿願能辭朕去耶？然廷玉實老病，言受上恩，不敢言去，願得暫歸，上乃許。廷玉致仕，命待來春冰泮，舟行歸里，親製詩三章以賜。廷玉入謝，言蒙世宗遺命配享，乞上一言爲券，上意不懌，猶爲頒手詔，申世宗成命。次日遣子若澄入謝，上以廷玉不親至，遂發怒，命削伯爵，罷配享，盡繳歷年頒賜諸物，及卒，命仍遵世宗遺詔，配享太廟，終清世。漢大臣配享太廟，惟廷玉一人而已。

高宗初政

洪亮吉上成親王書，乾隆初年，純皇帝宵旰不臯，勤求至治，其時如鄂文端、朱

文端張文和孫文定等皆侃侃老成。亮吉恭修實錄。見每日硃筆細書。折成方寸。或詢張鄂。或詢孫朱。曰。某人賢否。某事當否。日或十餘次。諸臣亦皆隨時隨事奏片。質語直陳。是上下無隱情。純皇帝固聖不可及。而亦衆正盈朝。前後左右皆嚴憚之人故也。

博學宏詞

本紀乾隆元年九月。試博學宏詞。鶴徵錄。雍正十一年。詔薦博學宏詞。至是始試。故事。給扎體仁閣下。上以雪後。特命保和殿考試。題皆御筆硃書。試卷進呈。欽定甲乙。一等十五人。十月五日。養心殿引見。天顏溫霽。獎勵授職有差。並賜日知會說各一帙。是日引見時。雙鵲噪殿香良久。上頽而色喜。劉繪。山。鵝舞鏡詩。有句云。可能對語便開闔。上深嘉許。親拔爲第一。

詩片

汪由敦事略，高宗天才敏捷，日課數詩，皆用丹筆作草。令內監持出，付公及劉文正，用素楮楷繕之，謂之詩片。上以公老於文學，尋常碑記之作，每命公屬草。及進呈，經御筆刪改，往往出意外，然後知聖學尤不可及也。按公與于文襄，當代御筆作書，公筆意圓渾，尤相似，幾不能辨也。

失一股肱

劉統勳事略，公少直南書房，每日鷄鳴入，上已遣中使，捧御製詩文稿至。命公錄於冊上。公對燭書之，多者千餘言。比日射，飯稜已寫訖，恭進。蓋十餘年如一日也。及薨，上親臨其喪，見室無長物，寒氣襲人。上大恸，回蹕，哭至乾清門，流涕。謂樞臣曰：朕失一股肱矣。

深夜達覽

陳大受事略乾隆十三年充軍機大臣，兼直上諭處，時金川用兵，上憂勤方略，軍書如織，雖深夜必達覽，公日數被召對，夜宿直廬，凡樞密重事皆與焉。

巡幸嵩洛

實錄乾隆十五年巡幸河洛，上登嵩山，巡撫鄂容安奏恭迓，幸河南，通省紳民情願捐輸，共收銀五十八萬餘兩等語，上諭：朕時巡方岳，一應道路橋梁等費，皆准開銷正項，從無絲毫累民之事，曾何藉於尊將，鄂容安此奏，殊失政體。著傳旨申飭，所有紳民樂輸之項，俱著發還。

蘇祿國請內附

本紀乾隆十八年蘇祿國王遣使勞獨萬奔刺請內附，下部議，實錄十九年蘇

祿國王。蘇老丹。噶味。麻安。柔律。噶。遣使表進方物。請入附版圖。得旨。覽王奏。進貢方物。具見。惻憐。爾國遠隔重洋。輸誠向化。良可嘉尚。所請將疆土人丁戶口。編入中國之虞。部議。毋庸齎送圖籍。已有旨了。按。蘇祿國表文二道。一左行洋文。一繙譯漢文。均黃綾本。舊存內閣大庫。余曾見之。

特擢七階

本紀。乾隆二十二年。四月。直隸總督方觀承。劾奏。巡檢張若瀛。擅賣內監僧人。上斥觀承爲不識大體。仍諭內監在外生事者。聽人責懲。未幾。張若瀛。特擢七階。

秦趙高

高宗。裁抑宦官。奏事處太監。皆賜改王姓。使無從識別。免內外交結。並賜御前

太監姓曰秦趙高以示傲揚。

湖山神位

李衛傳高宗南巡見西湖花神廟衛自範象並及其妻妾號曰湖山神位諭曰衛仰借皇考恩眷任性騷縱初非公正純臣託名立廟甚爲可異命撤象燬之。

奴才

清史綱要乾隆二十三年諭滿洲大臣奏事稱臣稱奴才不一清傳諭嗣後頒行公事摺稱臣請安謝恩尋常摺奏仍稱奴才以存滿洲舊體。

禁屈膝

又乾隆二十八年禁部院司官見堂官屈一膝及因有懇求之事免冠叩首又途次相遇有彼此乘馬屬官竟行下馬者旋又命蒙古王公見各大臣不得屈

膝。

社稷臣

傳恒傳。乾隆三十四年。傳恒卒。上親臨其第。酌酒。及賦懷舊詩。許爲社稷臣。傳恒直軍機二十餘年。日侍左右。以勤慎得上眷。故事。軍機諸臣。不同入見。乾隆初。惟訥親承旨。傳恒自陳不能多譏。乞請大臣同入見。上晚膳後。有所諮訪。又召傳恒獨對。時謂之晚面。又軍機大臣既承旨。退自屬草。至傳恒始命章京具稿以進。

汗阿瑪

福隆安傳。傳恒子福隆安。尙高宗女和嘉公主。授和碩額駙。御前侍衛。擢兵部尙書。軍機處行走。襲一等忠勇公。按福隆安尙主。爲高宗所寵眷。摺奏稱上曰。

汗阿瑪。譯言父皇也。

四庫全書

本紀。乾隆三十八年。命修四庫全書。上年先詔訪經籍。送京備閱。後朱筠奏輯永樂大典。劉統勳謂非急務。于敏中仰窺上意。力贊其事。派員開館。並諭書成名曰四庫全書。十載始成。全書三萬六千冊。先繕四部。分藏文淵文源文津文溯四閣。後繕三部。頒藏文宗文匯文瀾三閣。別輯四庫全書薈要。凡一萬二千冊。一貯大內擗藻堂。一貯圓明園味腴書室。宮史。四庫全書。大而經訓史法。細而博物考名。權衡綱領。莫不上秉睿裁。詳節年所頒諭旨。又嘉慶年。復命將高宗御集。及典略等書。續繕尊藏。亦歸入全書云。

侯朕綏綏酌辦

清帝外紀

朱筠事略，朱筠既請輯大典，復請校正十三經文字，勅石太學。高宗手諭曰：候朕緩緩酌辦，入四庫館，上嘗稱許朱筠學問文章殊過人，于敏中言朱筠辦書過遲，上曰：可令促之，不以資也。及出督學政，猶獎勵有加。

戴震尙在否

戴震事略，詔開四庫全書館，以薦入，首校水經注，高廟褒嘉，御製詩題卷首，及校刊石經，上猶命小璫，問兩書房諸臣，戴震尙在否，對曰：已死，上歎息久之。

聚珍版

乾隆三十八年，高宗聚珍版詩序云：校輯永樂大典內之散簡零編，並蒐訪遺籍，彙爲四庫全書，擇刻流傳，第種類既多，付雕非易，董武英殿事金簡，以活字法爲請，既不濫費瓊梨，又不久淹歲月，用力省而成功速，至簡且捷，考昔沈括

筆談記宋慶中有畢昇爲活版。以膠泥燒成。而陸深金粟紀聞。則云毘陵人初用鉛字。視版印尤巧便。斯皆活版之權輿。顧埏泥盪。鑄鉛質。俱不及鋅木之工。茲刻單字計二十五萬餘。雖數百十種之書。悉可取給。而校讐之精。今更有勝於古所云者。第活字之名不雅馴。因以聚珍名之。按此爲乾隆木刻聚珍版。康熙年先有銅活字。高宗題武英殿聚珍版詩。注云。康熙年間。編纂古今圖書集成。刻銅字爲活版。排印。工貯之武英殿。歷年既久。銅字或被竊。缺少。司事者懼干咎。適值乾隆初年。京師錢貴。遂請毀銅字。供鑄。所得有限。而所耗甚多。已爲非計。且使銅字尙存。則今之印書。不更事半功倍乎。深爲惜之。按康熙銅活字。既毀於鑄錢。乾隆木活字。久貯武英殿。後亦爲直殿宿衛。焚以取煖。遂皆無存云。

賜陀羅尼經被

于敏申傳。乾隆四十一年卒。賜謚文襄。准入祀賢良祠。敏中初爲軍機大臣。敏捷過人。承旨得上意。後以內監高雲從溺洩。殊批謂敏中曾向探問。詔切責之。又數年病卒。史論高宗英毅。大臣有過失。不稍假借。世傳敏中以高雲從事。失上意。後有疾。令休沐。遂賜陀羅尼經被。遂以不起。復下罷祠之詔。至引嚴嵩爲類云。按陀羅尼經被。向用賜殮。今因病賞此。蓋不啻賜死也。

古稀天子

乾甸四十五年。七旬萬壽。撰古稀說。刻古稀天下之寶。又刻五福五代堂古稀天子寶。及八旬。又刻八徵耄念之寶。皆御製有記。並詩。注曰。三代下諸帝。登七十者。僅六見。六帝之中。以梁武帝宋高宗元世祖爲年高。而梁武帝自貽傾覆。

宋高宗忘恥偷安，皆所素鄙。惟元世祖，乃創業大有爲之君，然踐阼非早。建號僅三十五年，亦不能如今五世同堂之盛。是則予之仰荷天眷，至爲深厚。不特云稀，且自古所未有也。按余藏有古稀天子之寶，五福五代堂古稀天子寶，各一方。白玉方五寸，交龍鈕，甚精。又藏八徵耄念之寶，石刻，方二寸，雲龍鈕，微有裂損。

九世同居

本紀。乾隆四十九年，河南偃師縣任天篤，九世同居。上賜御製詩，御書扁額，稱爲人瑞云。

十全老人

乾隆五十七年，御製十全記，令繕寫四體字。建蓋碑亭，以昭武功。十全者，兩平

準噶爾定回部。再定金川。靖臺灣。服緬甸安南。並降廓爾喀也。又鑄十全老人之寶。並爲說曰。十全本以紀武功。而老人之十全。則尙未全。蓋君人之職。豈止武功一事哉。

英使入覲

本紀乾隆五十八年。七月上。駐蹕避暑山莊。英吉利貢使至。上御萬樹園大帳。英吉利國正使馬戛爾尼。副使斯當東等。入覲。近譯英使馬戛爾尼入覲日記云。余等於闕門下車。步至大天幕內。約待一時。鼓樂聲作。報龍輿已近。出見帝坐輿上。十八人抬行。有持傘者。有捧大小旗者。百官扈從。中國臣民皆俯伏。余等以一膝屈拜禮迎之。待其已就寶座。余持英王信箱。由側面石階而上。捧呈於帝。帝交首相。置繡墊上。於是帝以贈英王之玉如意授余。而述願與英王親

善之意，又贈余以綠色玉如意。余捧呈金銅石珪瑯時表二。帝閱後，交與首相。余副斯當東，亦行一屈膝拜禮，捧呈美麗空氣鎗二。帝亦賜以綠色玉如意。余等乃離御座，就列於帝左邊之席。後召余出坐，賜以御手所斟之酒，各一杯。此時頻頻問答，帝威儀凜然，而親愛謙讓之德，流露於外。待遇余等，可謂殷勤。觀其風神，年雖八十三歲，望之如六十許人。精神矍鑠，可以凌駕少年。飲食之際，次序規則，極其嚴肅。殊堪驚異。其儀式靜穆而莊嚴，頗似聖餐式之典禮。御座設圓形天幕之內，直徑不過二十四五碼。而樹柱甚多。有鍍金者，有漆色者，窗戶位置，器具配布，懸掛之物，鋪設之品，色彩調和壯麗巧妙。縱覽一過，頗覺愉快。次日，賜遊萬樹園。遇帝想出，御日覽及余等，即命停止。親與余等談話。帝之態度，雖對下位，毫無倣傲色。實可稱揚云。

西洋人之記高宗

英國大使馬亞爾尼日記云。乾隆皇帝。每日上午三時起牀。入塔拜佛後。覽奏疏。七時朝餐。次召首相。御朝辦事。午後三時。食後。赴劇場。或從事於他種娛樂。或讀其所愛之書。其就寢時間。無逾七時以後者。皇后一人。第一級之妃二人。第二級者六人。宮女百人。后所生皇子數人。妃及宮女所生者又有數人。皇女數人。均嫁於韃靼王公大臣。未有一人嫁漢人者。彼有才能。有學識。自信力厚。勤勉仁慈。對其臣下。叮嚀溫和。對於其敵。復仇之念甚強。當其地位偉大。勢力隆盛。意氣飛揚。若少招失敗。即痛恨不已。無論何事。墮落人後。不甚信任諸大臣。一旦震怒。不易安慰。皇子有達四十餘歲者。尚不參預密議。亦不與以重權。太子屬諸何人。不得而知也。

東洋人之論高宗

白人所著清朝全史云。乾隆帝。雖惡滿人。感染漢習。而在已則甚耽漢人之文化。御製詩。至數萬首。常誇其博雅。每一詩成。使儒臣解釋。不能即答者。許其歸家。涉獵。往往翻閱萬卷。而不得其解。帝乃舉其出處。以爲笑樂。又好鑒別書畫。收藏甚多。其書法雖妙。似少氣魄。而康熙帝則骨力有餘。豐潤不足。至雍正之書。有才有氣。不類王者筆跡。各見其長。關於語學。雖不聞如康熙帝之常學拉丁。但精於滿蒙梵文。殆可深信。惟帝之異於康熙者。在西洋科學知識之缺乏。是也。對於西洋畫法之趣味。兩帝所同。觀焦秉貞之畫耕織圖。可以知康熙之性格。觀郎世寧所畫準噶爾貢馬圖。可以窺乾隆之嗜好。康熙乾隆。時雖並稱。而細思之。一爲創業之君。開拓國運。一爲守成之主。坐享太平。譬如一家。前者。

自田間奮起，經營產業，有備嘗甘苦之象。後者則否，生爲貴公子，長爲富家翁，席豐履厚而已。

太上皇帝

本紀乾隆六十年，宣示立皇太子，以來歲元旦，傳位皇太子，爲嗣皇帝，並諭曰：朕於明年歸政後，凡有繕奏事件，俱書太上皇帝，其奏對稱太上皇，宮史命鐫太上皇帝之寶，爲欽定喜字第一號玉所製。嘉慶丙辰元旦，行內禪禮，先於寧壽宮皇極殿御案，左陳太上皇帝之寶，右陳十全老人之寶，說玉冊，備東朝鉅典，屏尊號虛文，實爲受福延洪之殆基云。按寶譜載太上皇帝之寶，碧玉方七寸，厚三寸六分，交龍鈕，高二寸四分，四周鐫聖製詩，此爲第一號玉寶，尙有大小多方，余亦藏有太上皇帝之寶一方，碧玉方五寸，交龍鈕，四周未鐫詩。

乾隆六十一年時憲書

高宗丙辰元旦詩注。予紀號乾隆。慶周六甲。詔以丙辰爲開皇帝嘉慶元年。頒朔中外。嗣皇帝懇請時憲書仍用乾隆年號。因允每年備乾隆紀年憲書百帙。以爲頒賜宮庭及御前親近王大臣等之用。其通行天下者。俱用嘉慶年號。按自是至四年。皆照行。故宮中有乾隆六十一二三四年時憲書。余亦曾各藏有一册。

高宗崩

高宗既爲太上皇帝。軍國重務。仍秉訓裁決。大事降敕旨。嘉慶四年。崩於養心殿。壽八十有五。

仁宗本紀

仁宗睿皇帝，諱顯琰，高宗第十五子，嘉慶元年，高宗傳位，上奉太上皇帝訓政，湖北教匪起，平湖南苗亂，二年，乾清宮災，四年，太上皇帝崩，上始親政，大學士和坤，以罪賜死，詔申軍紀，七年，以陝楚教匪平，賞額勒登保、德楞泰、勒保等功，十年，查禁西洋人刻書傳教，上詣盛京謁陵，十三年，詔獎湖南辰沅永靖道傅鼐治苗有法，加按察使，十四年，海盜蔡牽平，追贈李長庚，及賞王得祿等功，十六年，禁西洋人潛居內地，十八年，申嚴販食鴉片烟律，教匪林清黨犯闕，下詔罪己，平滑縣教匪，賞那彥成等功，十九年，命開墾伊犁吉林荒地，二十年，頒製官箴，百齡以捕獲逆犯，督三等男，二十一年，英吉利遣使表貢，二十三年，風霾再詣盛京，詔曰：國家臨御日久，宜加意於人心風俗，而人心之正，風俗之醇，則繫於政教之得失，從嚴從寬，必準諸理，施行所及，乃能大畏民志，民志定，民心

正矣。潛移默化，整綱飭紀，正人心以正風俗。凡我君臣，其交勉之。二十五年崩。
葬昌陵。諡曰仁宗。初逢訓政，道躬蒞萬幾，鋤奸登善，削平逋寇，捕治海盜，崇儉
勤事，闢地移民，皆爲治之大原也。

仁宗誕生

實錄：仁宗母孝儀純皇后。乾隆二十五年庚辰十月初六日丑時誕上於御園
之天地一家春。上自六齡時，隨駕至木蘭。高宗巡視江浙，祇謁闕里，及歲行秋
獮，恒侍行帳，定省之暇，懋學稽古，所居書室五楹，取三餘之義，顏以味餘。喜讀
諸史通鑑，製有全史詩。初封嘉親王。高宗以周甲歸政，先冊爲皇太子，遂傳位
於上云。

聖主無過言

董誥傳嘉慶元年授受禮成詔米珪來京將畀以閣務仁宗賀以詩屬稿未竟和珅取旨高宗謂嗣皇帝欲市恩於師傳高宗色動願誥曰汝在軍機刑部久是於律意云何誥叩頭曰聖主無過言高宗默然良久曰汝大臣也善爲朕輔導之乃以他事罷珪之召

初政之美

米珪傳嘉慶四年正月高宗崩仁宗即馳驛召珪至京哭臨上執珪手哭失聲命直南書房時召獨對用人行政悉以諮之珪造膝密陳不關白軍機大臣不沾恩市直上傾心一聽初政之美多出贊助十年拜體仁閣大學士以老乞休溫詔慰留賜玉鳩杖命天寒間二三日入直未幾召對乾清宮眩暈扶歸第卒上親奠哭之慟

伯相

本紀嘉慶四年正月。太上皇崩。和坤被劾議罪。詔中外陳奏。直達朕前。不許副封。開會軍機處。初和坤專權。凡內外章奏。皆令錄副。先達軍機。遇事擅專。橫溢無檢。甚至延寄前行。專署已銜姓。天下稱伯相。見吳熊光事略。至是一切盡復舊制。

首劾和坤

廣興傳嘉慶四年。廣興首劾和坤罪狀。爲上倚任。廣興亦慷慨直言。召對每逾晷刻。上曰。汝與初彭齡。皆朕信任之人。何外廷怨恨乃爾。廣興頰首謝。數奉使。赴山東河南按事。益作威福。中外側目。內監鄂羅哩者。自乾隆中充近侍。年七十餘。嘗至朝廊。與廣興坐語。以長者自居。廣興粲然曰。汝輩閹人。當敬謹侍立。

安得與大臣誇世誼乎。鄂羅哩恨次骨，思有以中之。適內庫給宮中綉緞，不知數且竄敗。鄂羅哩言由廣興尅減，上即命傳諭。鄂羅哩出而沒言之，廣興不知爲上旨坐而與辯。鄂羅哩入奏其坐臆諭旨，上怒。一日，面詰廣興，廣興言總管太監孫進忠與庫官勾通，欲交外省織造，藉途需索之計，上以其不能指實庫官何人，挾詐而欺，下廷臣議罪，尋寬之。罷職家居，於是與廣興不協者，益起媒孽其短，被劾議絞。上親廷訊，尙欲緩其獄，廣興未省上意，抗辯無引罪語，而臟私有實據，上益怒，遂置之法。

釋戍得雨

洪亮吉傳。嘉慶四年，上書軍機王大臣言事書達成親王，以上聞。上怒其語褻落職，下廷臣會鞫，面諭勿加刑。亮吉感泣，引罪擬大辟，免死，遣戍伊犁。明年京

師旱。上禱雨。未應。命清獄囚。釋久戍未及期。詔曰。罪亮吉後。言事者日少。豈非因亮吉獲罪。鉗口不復敢言。朕不聞過。下情復壅。爲害甚鉅。即傳諭釋亮吉回籍。詔下而雨。御製詩紀事。注謂本日親書諭旨。後子時甘霖大沛。天鑿捷於呼吸。益可感畏。亮吉至戍。甫百日而放還。

三人同心

清史稿。勅保額勒登保。德楞額。泰傳。論曰。仁宗親政。以三省教匪久未定。卜於宮中。繇曰。三人同心。乃奏府功。後事平。叙勞。額勒登保第一。德楞額次之。勅保又次之。豈偶然哉。

魂如燭火

本紀。嘉慶八年閏二月。上自圓明園還。入頤貞門。奸人陳德。突出犯蹕。定親王

等擒獲之。詔曰：陳德之事，視如獬犬，不必窮鞫。所愾，惡者德化未昭，始有此警予事耳。嗣按律擬，陳德及其二子，伏誅。按自和珅獲罪，外傳類此之事尚多。聞一日近侍進茶，仁宗未飲而出，有小太監撤下，飲之立死。仁宗亦置不問也。

風景何足言

吳熊光傳：嘉慶十年，仁宗東巡，熊光迎駕，與董誥、戴衢亨同對。上曰：道路風景甚佳，熊光越次言曰：皇上此行，欲稽祖宗創業艱難之迹，爲萬世子孫法。風景何足言耶？上有頃，又曰：汝蘇州人，朕少扈蹕過之，其風景誠無匹。熊光曰：皇上所見，乃剪綵爲花，蘇州惟虎丘稱名勝，實一墳堆之大者。城中河道逼仄，糞船擁擠，何足言風景。上又曰：如汝言，皇考何爲六度至彼？熊光叩頭曰：皇上至孝，臣從前侍皇上謁太上皇帝，蒙諭：朕臨御六十年，並無失德，惟六次南巡，勞民

傷財作無益害有益將來皇帝如南巡而汝不阻止必無以對朕仁聖之所悔言猶在耳仁宗爲之動容同列皆震悚壯其敢言後熊光告人墳堆糞船兩語乃乾隆初故相訥親奏疏所言重述之耳

爲先帝推恩

紀昀事略嘉慶十年公薨初修高宗實錄成館臣請甄叙或言其過優仁宗以問公公不置可否但云臣服官數十年無敢以苞苴進者惟戚友請臣爲其先人題主或銘墓雖厚幣輒受之上默然曰然則朕爲先帝推恩何不可之有

熙朝雅頌

鐵保事略嘉慶中手輯八旗詩上溯崇德至乾隆年止得詩數百家爲白山詩介表上之蒙賜嘉名曰熙朝雅頌集睿廟親爲製序洵足彰右文之盛治矣

天賜麟兒

百齡事略。嘉慶十六年。仁宗萬壽之辰。召見樞臣。面奏公得子。公壯歲有子不育。屢荷垂詢。至是。上喜甚。下詔曰。百齡年逾六旬。望子甚切。連年任事。有裨封疆。故上蒙天佑。老年得子。朕甚爲欣悅。可賜名扎拉芬。公奏謝。手詔優答。有天賜麟兒語。雖家人父子之誼。不是過也。

過變自責

本紀。嘉慶十八年。九月。教匪犯關。既定。詔曰。朕紹承大統。不敢暇逸。不敢爲虐民之事。自川楚教匪平後。方期與吾民共享承平。乃大內突有非常之事。漢唐宋明之所未有。朕實惡焉。然變起一朝。禍積有素。當今大患。惟在因循怠玩。雖經再三誥諭。舌敝筆禿。終不足以動諸臣之聽。朕惟返躬修省耳。諸臣願爲忠

良。即盡心力。匡朕之咎。正民之志。切勿依前尸位。益增朕失。通諭知之。

朕與卿同歲

楊遇春傳。嘉慶十九年。滑縣教匪平。遇春封男爵。陛見。仁宗慰勞有加。命至御前。執其手曰。朕與卿同歲。年力尙強。將來如有軍務。卿須爲朕獨當一面。手賜珍物。見遇春長壽。稱美者再。

英使不行跪拜禮

本紀。嘉慶二十一年。蘇楞額等。以帶領英吉利貢使。不諳事體。不克入覲。俱黜降。孫玉庭事略。英吉利入貢。其使不能行三跪九叩禮。仁宗不懌。公適入覲。以公嘗撫粵。悉夷情。召見。垂問。公奏。乾隆年。英使已不能効中國跪拜之禮。其大班曰司當東。於廣東撫署領帝賞。弓身俯伏。臣親見之。謂俯伏者。即夷禮之免。

冠頓首也。今貢使即司當東。如妄有干求。自當折以天朝之法度。若歸心恪頌。不必拘以中國之儀。又反復開陳。睿廟大悅。優旨褒之。

風竄

本紀。嘉慶二十三年。四月。京師風竄。詔曰。初八日。酉初三刻。暴風自東南來。塵霾四塞。室中燃燭。始能辨色。其象甚異。朕心震懼。欽天監疏言。天地竄。君臣乖。大旱。又主米貴。正與之同。惟朕恪遵成憲。日日召見臣工。前席周諮。似不致於乖離。但此其迹也。其實與朕同心望治。有幾人哉。不敢面證。退有後言。貌合而情睽。是即乖也。其於同寮。不爲君子之和。而爲小人之同。是亦乖也。我君臣其交微焉。

滿洲故里

富俊傳嘉慶二十四年富俊復調吉林將軍雙城堡旗丁屯田富俊巡歷三屯疏陳比屋環居安土樂業有井田遺風中屯開墾在先麥苗暢發男耕女饁俱極勤勞仁宗大悅報曰滿洲故里佃田宅洵善事也續議三屯應增事宜詔嘉賞心任事

仁宗崩

嘉慶二十五年仁宗崩於避暑山莊壽六十有一祖制初不立嗣先密書名藏正大光明殿扁額上並別藏小金匣常以自隨時事出倉卒未奉遺命從官多皇戚失措軍機大臣托津、戴均元、存內臣檢御篋十數事最後近侍得小金匣鎖固無鑰托津、戴金鎖發匣見嘉慶四年四月初十日卯初立皇太子殊論一紙始合各大臣奏奉宣宗成禮乃發喪中外宴然見包世臣戴均元墓碑

宣宗本紀

宣宗成皇帝諱旻寧，仁宗次子即位。紀元道光元年，張格爾作亂，命慶祥赴喀什噶爾勦之。三年，萬壽節，玉潤堂賜十五老臣宴，繪圖。七年，克喀什噶爾。八年，獲張格爾，以再定回疆賞長齡、楊芳、揚遇春等功，賜功臣圖形紫光閣。九年，詣盛京謁陵。十一年，新疆始行屯田。十五年，諭科道馮贊勳等，擢任京卿，所以廣開忠諫，務於民生國計，用人行政闕失，仍隨時直陳。十八年，命林則徐查辦廣東海口事件。十九年，英船入廣東海港，擊走之。英人連犯沿海各口，陷城。二十二年，入江甯，命議欵，定約通商，罔是意。大利米、利堅等國繼請通商，皆許之。二十九年，江蘇浙江安徽水災，陸建瀛奏辦賑，及水退情形，諭臣民之福。即朕之福。仍飭妥籌振濟。三十年，上崩，葬慕陵。諡曰宣宗恭儉寬仁，守成令主，遠人賀。

易搆毀興戎。當事大臣。先之以操切。繼之以畏蕙。遂貽宵旰之憂。而國步之瀕。亦肇於此矣。

宣宗誕生

本紀。宣宗。母孝淑容皇后。乾隆四十七年。壬寅。八月初十日寅時。誕上於攝芳殿中所。十歲時。高宗行圍格威遜爾。上引弓獲鹿。高宗大喜。賜黃馬褂花翎。嘉慶十八年。教匪犯闕。賊入內右門。至養心殿南。欲北竄。上御鎗斃二賊。餘潰散。亂始平。封上爲智親王。號所御鎗曰威烈。諡稱忠孝兼備。上謙冲不自滿假。謝恩奏言。事在倉卒。又無禦賊之人。勢不由己。事後愈思愈恐。其不矜不伐如此。

養正四箴

上宅心澹定。珍奇玩好之物。略不關懷。定省餘閒。日與詩書相砥礪。祇承訓誨。

身體力行，著主敬存誠，勤學改過四箴，以自勵，名曰養心四箴。

松筠

松筠傳：松筠素以忠諫見重，凡燕游贊御之事，乘間直言無避，屢起屢蹶，既屢忤旨，由尙書迭降爲驍騎校，仁宗崩於熱河，梓宮回京，宣宗步行於班寮中見之，扶而哭，翌日擢左都御史，其復起也，甚負時望，然卒不安於位，未一月出爲熱河都統。

汪師傳

汪廷珍事略：公直上書房最久，爲總師傳，宣宗在潛邸，公盡忱啓迪，非法不道，登極後，獻納尤勤，道光二年，上臨雍講學，手敕汪廷珍、蒙皇考簡爲總師傳，與朕朝夕講論，考古證今，言皆中道，使朕通經義，辨邪正，受益良多，眷懷舊學，特

沛恩施。可加太子太保。用示崇儲重道之意。

十五老臣

道光三年八月。上幸萬壽山玉瀾堂。錫宴十五老臣。踵千叟宴故事。庶歌繪圖。與宴諸臣。以和碩儀親王爲首。次賽冲阿。託津。曹振鏞。錢均元。孫玉庭。黃鉞。穆克登。額。初彭齡。富俊。松筠。哈達爾。阿那保。伯麟。穆克登布。宣宗嘗賦詩紀其事。

湯金釗

湯金釗事略。道光七年奉使山西。宣宗在位久。熟於情僞。自京師以及十九布政司。民風吏治之醇雜。莫不周知。凡細民含冤負釁。嗷號而赴闕者。上必立遣重臣。馳傳回歷窮治。以申枉鋤強。而公以公廉強直。屢蒙委任。自此始。

長齡

長齡傳。道光八年。回疆平。捷聞。上大悅。錫封長齡二等威勇公。賜寶石頂。四圍
龍補服。紫氍。檻送張格爾於京師。上御午門受俘。磔於市。長齡回京。命親王。大
臣迎勞。行抱見禮於勤政殿。正大光明殿。賜凱宴。恩禮優渥。並用乾隆朝故事。
時稱盛焉。

潘世恩

潘世恩事略。直樞廷幾三十年。回疆平。命與凱宴。八十生辰。賜額曰三朝耆碩。
宣宗嘗手諭云。潘世恩精勤襄贊。一德一心。夙夜在公。勤勞備至。朕實難以盲
喻。公直樞密。造膝所陳。多不形諸章牘。雖子弟不獲聞。惟上知之深。倚之最切。

何文通

何凌漢事略。道光十年。立春日。循例進春。上召問春牛顏色。起於何時。公奏。月

令稱出土牛，並無顏色。宋時頒行土牛經，支幹各色，略與今同。始於景祐間。上嘉其博洽，嘗因病賜假，公子紹基以經修給直，召對，上詳詢進藥狀，且曰：聞汝善能讀書，何以不知醫？紹基惶恐伏謝，上笑曰：藥方難恃，朕所賞參朮，真老山種，固不易得，乃荆芥大黃，亦有作僞者，故用藥不可不慎也。及薨，予盜文通，國初有得此盜者，後皆追奪，二百年來，至公乃蒙恩特證，異數也。

步禱得雨

本紀：道光十二年六月，久旱，上步詣社稷壇祈雨，又自齋宮，步詣園丘，行大雩禮，是日雨。

阮太傅

阮元事略：道光十三年陞見時，年七十矣，上賜壽，二十三年，公壽八十，復拜御

書聯額及尙方珍幣之賜。二十六年，以重宴鹿鳴，加太傅，公疏謝，上手詔報曰：願卿福壽日增，以待三赴鹿鳴之盛事也。致本朝大臣生前，加太傅者，自金文通，洪文襄、范文肅、鄂文端、曹文正、長文襄外，得公而七公以後，惟潘文恭世恩而已。

禁鴉片

林則徐事略：道光十八年，議禁鴉片。公條上利害，深切著明，宣廟嘉焉，命以欽差大臣，蒞廣東，查辦海口事務，旋補兩廣總督，奏虎門收繳英吉利躉船鴉片，及奏請剿撫兼施，手敕報曰：既有此番舉動，若再示弱，則大不可。朕不虛卿孟浪，但誠卿等不可畏葸，先威後德，控制之良法也。尋請停貿易，又諭曰：該夷自外生成，是彼曲我直，中外咸知，尙何足惜。公前後所陳，皆稱旨，爲忌者所中傷。

卒不安其位。而天下自此多故矣。

議款

本紀道光二十二年七月。普英奏與英兵官瑪禮遜等議罷兵。諭曰。朕以民命爲重。令妥議。嗣與議定和約。請鈐御寶。諭朕因億萬生靈所繫。允所請。穆彰阿傳。初禁烟議起。宣宗意銳甚。特命林則徐赴廣東查辦。責繳烟。盡焚之。兵燹既開。沿海騷然。英艦抵天津。授書總督琦善。言由則徐啓覺。穆彰阿窺帝意移。乃贊和議。罷則徐以謝。一徇故意。不設備。兵燹復起。英兵且由海入江。穆彰阿當因。主和議。爲海內所叢詬。上既厭兵。從其策。終道光朝。恩谷不喪。

聲色貨和論

實錄。上躬行節儉。爲天下先。願聲色貨利論。垂戒方來。萬方作貢。裁汰過半。

宣宗崩

本紀道光二十九年十二月，皇太后崩，上居倚廬，廣地寢苫，諸王大臣請還宮，不允。皇太后梓宮移綺春園迎暉殿，上居愷德堂，苦次。次年正月，上疾，崩於苦次。壽六十有九，距皇太后喪僅月餘耳。

文宗本紀

文宗顯皇帝諱奕訢，宣宗第四子，即位。紀元咸豐，下詔求賢，洪秀全起事金田，大學士穆彰阿視職。元年，洪秀全入永安，建號太平天國，由岳州至武昌及安慶。三年，入江寧，據爲天京，連擾山東、直隸、河南、江西、浙江、福建、四川、兩廣等省。捻起江淮。五年，雲南回民杜文秀踞大理。六年，胡林翼克武昌。七年，英人入廣東省城，劫總督葉名琛以去。八年，英法兵船入大沽，俄人占黑龍江左岸各屯。

十年。英法兵陷天津。遂至通州。上幸木蘭。四明國災。撫局成。設總理各國通商事務衙門。十一年。詔曰。各處辦捐。取民者多。歸公者寡。近年軍餉浩繁。不得已而借資民力。似此徵求無藝。陵薄民生。尙復成何政體。各大臣督撫。其嚴查削除。以副朕意。上崩於熱河行宮。奉梓宮回京。葬定陵。論曰。文宗奄忽一紀。內孽競作。外強要盟。遂無一日之安。而能任賢擢材。洞觀肆應。治軍慎持。馭衆賦民。首杜頽苛。向使假年御宇。安有後來之伏患哉。

文宗誕生

寶鐸。文宗。母孝全成皇后。道光十一年辛卯。六月初九日丑時。誕上於御園之湛靜齋。後更爲基福堂。上在潛邸時。與恭親王奕訢。朝夕講肄。陳經偶環。練藝習勞。嘗製槍法二十八勢。曰棗華協力。刀法十八勢。曰寶鐸宣威。皆宣宗賜名。

帝者之言

杜受田傳，充上書房總師傳，文宗六歲入學，受田朝夕訓誨，必以正道。宣宗晚年，以文宗長且賢，欲付大業，猶未決。會校獵南苑，諸皇子皆從，恭親王奕訢獲禽最多。文宗未發一矢，問之，對曰：「時方春，鳥獸孳育，不忍傷生，以干天和。」宣宗大悅曰：「此真帝者之言。」立儲遂密定。受田輔導之力也。文宗即位，國家大政，及進退大臣，必諮而後行。卒，特謚文正，謂其公忠正直，足當正字而無愧。上親奠，燕棺哭甚哀。

斥退穆彰阿

文宗即位，斥退穆彰阿。詔曰：「穆彰阿保位貪榮，妨賢病國。我皇考若早燭其奸，則必立置重典，夷務之興，如達洪阿姚瑩之盡忠宣力，必欲陷之。耆英之無恥，

衷良，必欲全之。朕親政之初，遇事模稜，漸施佞備。潘世恩等保林，則徐、伊屢言病不堪用，及朕派林則徐往粵剿匪，又言未知能去否，僞言熒惑，貽害國家，第念三朝舊臣，著從寬革職，永不叙用，詔下，天下稱快。

文慶請用漢臣

文慶傳：文慶謹醇，持大體，文宗知之深，倚眷不萎。粵亂日熾，文慶言當重用漢臣，彼多從田間來，知民疾苦，熟諳情僞，豈若吾輩未出國門，懵然於大計者乎。嘗密請破除滿漢畛域之見，不拘資格以用人。曾國藩初任軍事，屢戰失利，忌者沮抑之。文慶獨言國藩負時望，能殺賊，終當建非常之功。嘗與胡林翼同典試，服其才略，屢密薦。由貴州道員，一歲之間，擢至湖北巡撫，凡所奏請，上無不從，後卒得諸人力，以戡定大難焉。

求言納諫

文宗初年。大理寺卿倭仁。應詔陳言。上嘉其直諫。副都御史文瑞。疏陳四事。並錄進。乾隆元年。大學士孫嘉淦。三習一弊。疏。禮部侍郎曾國藩。疏。陳用人三事。均嘉納之。給事中蘇廷魁。疏。請推誠任賢。慎始圖終。並嘉納。內閣學士勝保。疏。言游觀之所。煥然一新。小民竊議。有累主德。上優容之。太僕寺少卿徐繼畬。疏。陳釋服之後。宜防三漸。一土木之漸。一宴安之漸。一壅蔽之漸。得旨。置諸座右。時時省覽。

戒倭仁

倭仁傳。倭仁上言。既手詔褒勉。尋命充葉爾羌幫辦大臣。田雨公疏。言用違其才。上曰。邊疆要任。非授閒置散也。若以外任皆左遷。豈國家文武兼資內外並

重之意乎。咸豐二年，倭仁復上敬陳治本一疏，上謂其意在實難陳善，尙無不合。惟惟泛語治道，因勉以留心邊務，勿託空言。四年，王茂蔭等請命會辦京師圍練，上以軍務非所長，尋命直上書房。

懋吳廷棟

吳廷棟傳，咸豐初年，召對，廷棟詳陳治道之要，言利之害，君子小人之辨，上首肯。因詢廷棟讀何書，廷棟以程朱對，上曰：學程朱者每多迂拘。對曰：此不善學之過。程朱以明德爲體，新民爲用，天下未有有體而無用者，上聽之。

怒賽尙阿

賽尙阿傳，廣西匪亂，方熾，文宗憂之，以賽尙阿親信近臣，命爲欽差大臣，赴湖南防堵，特賜邊必逢刀，給庫帑二萬萬兩，備軍餉，督師屢失利，縱匪出，犯長沙。

亂益張。文宗怒。逮京治罪。

用會國藩

會國藩事略。初上敬陳聖德疏。言過切直。上怒。捽其摺於地。召見軍機。諸臣稱主聖臣直者再。於是上意解。且優詔褒答。尋內憂歸。命辯團練於長沙。克武昌。文宗大悅。手敕曰。覽奏。感慰實深。獲此大勝。殊非意料所及。朕惟兢業自持。叩天速救民劫也。郡徭藻傳。湘軍初起。肅順力言其可用。上嚮之。徭藻意不謂然。屢稱病。會國藩克湖北。捷至。文宗喜形於色。謂軍機大臣曰。不意會國藩一書生。乃能建此奇績。徭藻對曰。國藩以在籍侍郎。猶匹夫耳。匹夫居閭里。一呼籲起。從之者萬餘人。恐非國家福也。文宗默然變色者久之。

任肅順

肅願傳。文宗初。以其敢任事。漸擢用。時寇亂方熾。外患日深。文宗憂勤。要政多下廷議。肅願恃恩眷。日益驕橫。者英罪擬絞候。肅願獨請正法。上雖斥其言過當。仍即賜自盡。柏蔭擬大辟。上念舊臣。欲寬之。肅願力爭。遂垂淚命斬。駕幸熱河。事多出肅願贊畫。又力阻回鑾。文宗之信任。久而益專。臨崩。與載垣等同受顧命。贊襄政務。太后回京。議罪。斬於市。原諡曰。文宗厭廷臣習於因循。乏匡濟之略。而肅願以敢任特見倚用。其贊畫軍事。所見實出在廷諸臣上。削平寇亂。於此肇基。功不可沒也。又諡道光以來。科場請託。習爲故常。自柏蔭大辟。司文衡者。悚悚畏法。科場清肅。實文宗用重典之效也。祺祥故事。文宗信肅願專。遇事必口問六爺。六爺者。肅願爲鄉親王第六子也。

誠勝保

本紀。咸豐七年。督辦三省剿匪副都統勝保。奏請皖兵悉歸節制。得旨。勝保尙屬勇敢。若平其躁氣。斂其驕心。可爲有用之才。何庸自行泣請。文宗頗賞勝保才。次年。即命爲欽差大臣。督辦安徽軍務。

朔方備乘

咸豐十年。刑部主事何秋濤。呈進所纂北徵彙編。上嘉與之。賜名朔方備乘。命入直懋勳殿。

秋狩木蘭

本紀。咸豐十年。八月。洋兵至通州。上幸木蘭。自圓明園啓鑾。駐蹕避暑山莊。九月。恭親王奕訢。奏洋人退至天津。籲請廻鑾。詔天氣漸寒。暫緩。十一月。示期廻鑾。二月。詔曰。前經降旨。訂日廻鑾。旬日以來。體氣未復。緩俟秋間。再降諭。

旨。三月，恭親王請赴行在。詆叩起居，上手詔答之曰：別經半載，時思握手而談。惟近日咳嗽不止，時有紅痰，尙須靜攝，且俟秋間，再爲面話。實錄：上每月披覽章奏，引對臣工，指示周詳。軍興以來，奏報尤繁，自朝至於日中，及不遑暇食。孜孜求治，勞神焦思，聖體違和，多由於此。及狩熱河，乃日益增劇云。又日人所著清朝全史，咸豐帝晚湯聲色，據薛福成所記，導帝於邪僻者，實爲怡親王載垣。鄭親王端華及端華之弟肅順，而肅順尤善迎合帝意，干涉大政，自帝駐蹕熱河，出入宮廷，誘以聲色，不允回鑾，皆見阻於此三人云。

四明園災

本紀：咸豐十年，上狩木蘭，四明園災。徐樹鈞四明園詩序云：文宗初，粵寇踞金陵，東南數省，蹂躪無完土。上旣憫蒼生顛沛，復歎左右無人。九年冬，郊宿齋宮。

夜分痛哭，侍臣凄惻。大考翰詹，以宣室前席發題，憂心焦思，久傷禍亂，後乃稍自抑解，寄於文酒，以宮中起居有節，尤喜園居。時園中傳有四春之寵，皆漢女分居亭館，所謂杏花春、武陵春、牡丹春、海棠春者也。十年，英夷逼通州，上自園幸熱河，園被火，三晝夜不熄，管園大臣文豐、搜福海死，園遂荒蕪，鞠爲茂草，頽垣斷瓦，零亂榛蕪，訪守園者得董監年七十餘，白道光初入侍園中，今秩五品。居福園門旁，導從瓦礫中，循出入賢良門而北，指勤政、光明、壽山、太和四殿遺址。至前湖，圓明寢殿、五楹，後爲奉三無私殿，九州清宴殿，各七楹，壞壁猶立，拾級可登。東爲天地一家春，后居也。西爲安樂和，諸妃嬪貴人居也。洞天深處，皇子居也。清輝殿，爲文宗重建，與五福堂、朗吟閣、鑊月開雲臺，皆不可復識。鑊月開雲，即牡丹春也。東渡湖爲蘇隄，長春仙館，藻園，又北爲月地雲居，舍衛城，日

天琳宇。水木明瑟。灑溪樂處。僅約略指視所在。東北至香雲廊。復渡橋。循福海西行。爲平湖秋月。望瓊島瑤宮。島上殿宇。猶存數楹。西北至雙鶴齋。又西過窺月橋。登綺吟堂。經采芝徑。折而東。仍出雙鶴齋。園中殘燬幾遍。獨存此爲劫灰之餘。亂草侵階。窗牖宛在。尤動人禾黍悲爾。東過碧柳書院。地跨池。東爲金鰲。西爲玉藻。坊楔尙存。又東去。皆敗壞難尋。遂不復往。昔國之盛時。純皇勤記。必殷殷踵事之戒。仁宗始罷臨幸。宣宗尤憂國難。聞慈安太后。在文宗時。有脫簪之諫。關雎車窳。實中興之由云。

文宗崩於熱河

實錄。咸豐十一年七月癸卯。文宗賓天。時文宗巡幸熱河。駐蹕避暑山莊。上侍母后皇后。聖母從焉。文宗聖躬不豫。上侍疾。烟波致爽殿。壬寅。文宗疾大漸。召

御前大臣。載垣。端華。景壽。肅順。軍機大臣。穆蔭。匡源。杜翰。焦祐瀛。承寫硃諭。立皇長子爲皇太子。軍機處密札。十六日午後。暈厥。囑內中緩散。至晚甦醒。始定大計。子初三刻見時。傳諭清楚。各位請丹毫。諭以不能執筆。著寫來述旨。故書承寫字樣。八位共矢報効。極爲和衷。大異以前局面。母后頗有主見。垂簾輔政。蓋兼有之。自願命後。至今十餘日。所行均愜人意。以上密札數通。皆軍機處自行在所寄。今存。見后妃傳注。

穆宗本紀

穆宗毅皇帝。諱載淳。文宗長子。即位。以擅改諭旨。力阻垂簾。治載垣。端華。肅順等罪。改元同治。奉慈安皇太后。慈禧皇太后。垂簾聽政。命恭親王奕訢爲議政王。曾國荃復安慶。元年。命僧格林沁。統豫魯軍務。督剿捻匪。設同文館。二年。李

鴻章復蘇州。三年。左宗棠復杭州。曾國荃復江寧。以江南平。賞曾國藩等功。諭江南新復。民生凋敝。有司招徠撫恤之。新疆回亂。四年。設機器局於上海。五年。回匪陷伊犁。設造船廠於福州。六年。派美使蒲安臣。往有約各國辦理交涉。東捻平。七年。西捻平。九年。命曾國藩查辦天津教案。十年。俄據伊犁。十一年。全黔戡定。十二年。帝親政。克大理。賞岑毓英等功。克肅州。閉內齋。清定各國使臣覲見禮節。十三年。法越和議定。日本攻臺灣番社。議款。籌海防。上崩。葬惠陵。諭曰。穆宗冲齡踐阼。母后垂簾。國運中興。十年之間。大亂平定。中外乂安。非夫宮府一體。將相協和。何以臻茲焉。

穆宗誕生

實錄。穆宗。母孝欽顯皇后。咸豐六年丙辰。三月二十三日。未時。誕上於撈秀宮。

文宗三旬萬壽。上甫五齡。稱觥祝壽。儀度備嫻。特命出見廷臣。凡瞻仰天表者。莫不稽首懽呼焉。

穆宗即位

本紀。文宗疾大漸。召王大臣承寫硃諭。立皇長子爲皇太子。命載垣等贊襄政務。文宗崩。奉上繼位。定年號祺祥。上奉大行皇帝梓宮回京。兩宮皇太后。宣示載垣等罪狀。上御太和殿。行即位禮。改祺祥爲同治。府倉筆記。兩太后避京。召見王大臣。數載垣端華肅頤等三人之不法。泣數行下。幼帝頤太后曰。阿彌。奴輩敢如此負恩。可斬其頭。遂定肅頤等之罪。詳見慈禧外傳。

穆宗典學

本紀。同治元年。二月。皇帝典學。命邵葆藻翁心存倭仁李鴻藻。均在弘德殿授

讀首讀大學，並以倭仁所進古帝王事蹟，及古今臣工奏議，陳弘德殿講肄。李鴻藻傳，一日，穆宗學書，故作戲筆，鴻藻立前捧上手曰：皇上心不靜，請少息。穆宗改容謝之。四年，命翁同龢在弘德殿行走，進講治平寶鑑，翁同龢日記故事。授讀諸臣，皆得旁坐，潛讀。達則立而口授。龢遂入坐，上每日功課，才五六刻，讀書勤，無嬉戲，無惰容。仰見我皇天資粹美矣。讀聲清朗，字亦端楷中正。又七年，龢對曰：天臨南極近，上應彗曰：星共北辰明。又初覓上詩稿，如寒梅詩，百花皆未放，一樹獨先開，皆佳句。又八年，上開筆作論，題曰：任賢圖治，上從容揮灑，論曰：治天下之道，莫大於用人。然人不同，有君子焉，有小人焉，必辨別其賢否，而後能擇賢而用之，則天下可治矣。寫畢，不過四刻，諸臣竊喜，忭，是真初見雲章第一篇矣。又詩題爲松風，上得句云：南薰能解慍，長在舜琴中。余等歎美，得未

曾有也。又上初習射，設射侯於庭中，上西嚮立，三發，中其二，羣臣皆欣忭。又近來上性多急躁，故諸臣議以靜鎮之，其實讀書無可議也。按同龢爲師傅，上親政後，入讀如常，至上崩始退。

穆宗起居瑣記

翁同龢日記，同治五年正月，聞上除夕，誤食金錢一枚，三日始下，宮內年例，煮餠餠，中置金如意等，以取吉利。北方風俗皆然，亦殊鄙俗。周禮於飲食服用，織屑畢，詳大哉聖人之規畫也。又七年二月，聞兩宮及上幸御花園，挑選八旗秀女。自去年行文各省，旗官有女應挑者，限期到京，後年將舉行大婚矣。又九年八月，上論天津教案，因曰：若得僧格林沁三數人，把截海口，不難盡滅此輩。愈將就，愈出。又詞氣甚壯，又上至大高殿禱雨，雨立至，上行禮如常，左右進蓋。

却之。冠服盡濕。又皇太后病。上侍醫藥。玉容爲減。又上偶疾。常戒近侍。毋得報兩宮。恐勞屢念。聖孝如此。

穆宗大婚

實錄。同治十一年。九月。甲午。以大婚冊立皇后。前期遣官祭告天地宗廟。乙未。寅刻。上御太和殿。閱視冊寶。遣惇親王奕誼爲正使。貝勒奕劻爲副使。持節奉冊寶。詣皇后邸。冊封阿魯特氏爲皇后。遣大學士文祥爲正使。禮部尙書靈桂爲副使。持節並冊印。封富察氏爲慧妃。申刻。慈安皇太后。慈禧皇太后。御慈寧宮。上詣行禮。禮畢。御太和殿受賀。遣惇親王奕誼爲正使。貝子載容爲副使。持節詣皇后邸。行奉迎禮。丙申。子刻。皇后由邸升鳳輿。鑾儀衛陳儀仗車輅。鼓樂前導。由大清中門。行御道。至乾清宮。降輿。上具禮服。候於坤寧宮。丑刻。行合巹

禮。丁酉，上率皇后詣壽皇殿行禮，詣皇太后前行禮，上御乾清宮，皇后率慧妃以下行禮。戊戌，皇后朝皇太后於慈寧宮，盥饋禮饗如儀。己亥，皇太后御慈寧宮，上率諸王大臣行慶賀禮，上御太和殿，率臣慶賀，頒詔天下，覃恩有差。

穆宗親政

本紀。同治十二年正月，上親政，詔遼慈訓敬天法祖，勤政愛民，下詔修省，求直言，諭直省舉賢才，杜侵竄，翁同龢日記。甲戌六月，回京，入對於乾清宮西暖閣，上問汝身體好，又問沿途年成，江南民情，取道運河否，按此可知穆宗親政後，每日在乾清宮視事，又七月，至昭仁殿書齋，殿制略同弘德，侍臣直廬，則在門外東廊，按此似書房已移昭仁殿，又是日引見稍早，而召見樞廷甚遲，蓋拔貢單今日始下也，按此可知穆宗對於拔貢單等，皆細閱，故召對因此較遲也，又

上至書房講論語，是日作詩甚妥。按此可知穆宗親政後，書房照舊。又余以讀史論略進講，並以召對匠工，天語太簡爲言。其他語甚多，上皆納。又八月，出試御史題，上與徐桐商定，天語昭然。於是非賢奸辨之甚晰。又九月，祥姪蒙召見於乾清宮，招近御榻，得聆玉音。又十月，五兄入內請訓，蒙召見，垂問一切，並盡實心實力去做。按觀此各節穆宗親政，辦事情形，可略見矣。

各國公使人觀

本紀同治十二年六月，日英俄美法公使，入覲於紫光閣，是爲外使入覲之始。日使副島種臣適清記略，是日六時，至天安門天元閣暫息，復集於福華門外。明代所建之天主堂，進茶菓於衆使曰：皇上賜茶菓。七時，入候於紫光閣之行儀。帝八時出宮，九時御紫光閣，大臣引余等，由左階升，進門，斜見御座，即除帽。

作第一揖，復進，正中。向御座作第二揖，又進立於御前黃案之下。作第三揖是謂謁見三揖禮。皇帝高坐寶座，恭親王及御前大臣侍立座之左右。軍機大臣及文武顯官分立黃案兩旁。余置國書於黃案上，一揖陳述來意，恭親王跪奉國書於帝，即降至黃案前，宣旨曰：貴國大皇帝的國書朕收到了。余揖，恭親王復班。帝又有勅語，恭親王跪承之。復降至黃案前，宣旨曰：貴國大皇帝安康。兩國交際事宜，可由總理各國事務衙門公平商議。余揖退。復三揖如前。帝乃賜宴於總署。是日午，余赴宴，各公使以筭辭，實則惡清廷之不宴於宮內也。

修圓明園

本紀。同治十二年，修圓明園。御史沈淮疏請緩修，諭令內務府，僅治安佑宮爲駐蹕殿宇，餘免興修。次年，停修園工。翁同龢日記，甲戌七月，聞園工事，未能遽

止。爲承歡太后，故不敢自擅，允轉請，蓋旨也。又召對。因園工事，責諸臣何以不早言。與恭醇兩王，往復辨難。且有離間母子把持政事之語。兩王叩頭申辨不已。上曰：待十年。或二十年，四海平定，庫項充裕時，園工可許再舉乎。則皆曰：如天之福，彼時必當興修，遂定停園工。修三海而退。申初，硃諭數恭王之失。革去親王世襲。

賁恭王

本紀。同治十二年七月，諭賁恭親王召對失儀，奪親王世襲。降郡王，仍爲軍機大臣。並革其子載澂貝勒郡王銜。旋奉懿旨，復恭親王世襲。及載澂爵銜，訓勉之。翁同龢日記，硃諭一道，封下交軍機文祥等四人，微聞恭王革爵，有跋扈離間。欺朕之幼，奸弊百出，日無君上，等語。文祥等請見不許，遞奏片請改。不許。次

日兩宮皇太后御弘德殿宣諭諸臣念恭王有任事之勤一切賞還上侍立亦時時跪而啓奏旋有明發云云按恭王以爭園工作旨翁記甚明清史綱要謂時帝與載灃戲因微故失歡故有是命實誤相傳載灃日侍左右尊帝嬉戲爲恭王所責並嚴束不令入直帝大不懌傳飭恭王仍命載灃入侍與此事不相涉也。

王慶祺

本紀同治十三年正月命緝修張英麟檢討王慶祺弘德殿行走十二月侍講王慶祺有罪概職張英麟傳英麟入直五日即乞假退後王慶祺終獲咎翁同龢日記甲戌九月上至講書畢余等先退已而中官傳旨獨召王某入寫詩一首而退又上至臣與王慶祺偕入而令臣下取詩本既而命臣作菊影七律一

首與王君同賦，寫進，遂散。又十月，有旨掌院保南齋翰林，口敕與王慶祺商酌。次日，特召王公見於乾清宮。按翁記於王慶祺，頗有微詞。世傳導帝遊宴，皆由慶祺，想以陳彝奏劾，有上年爲河南考官，出闈後，微服冶遊等語，遂附會及帝。然慶祺輔導無狀，自不能辭其責也。

幸南苑

本紀同治十三年八月，上幸南苑。翁同龢日記，甲戌八月，上詣南苑，后妃皆從。蹕路出大清門，后妃則出神武門，東安門，由御河橋而南。

鐵龍駒

實錄同治十三年九月，諭榮全所進黑花馬一匹，朕乘騎甚穩，著賞鐵龍駒名號。

代閱章奏

本紀同治十三年十月上不豫命李鴻藻代閱章奏恭親王代繕批答清文摺件清史綱要時帝好微行遊宴遂以致疾按微行之說實無可證清代家法至嚴微行出遊勢所不許即在宮廷偶有嬉戲亦多禁阻而傳說紛紛亦可畏也

天花之喜

同治十三年十一月穆宗不豫翁同龢日記初九日聞聖體發疹辰至東華門內傳蟒袍補褂上有天花之喜易花衣以紅絹懸於當胸入詣安道天喜有頃傳興軍機御前同見至養心殿東暖閣兩宮皇太后俱在御榻上持燭令諸臣上前瞻仰伏見天顏溫暉偃臥向外花極稠密目光微露略奏數語皆退次日又叫起上起坐頭面皆灌漿飽滿聲音有力上首諭恭親王天下事不可一日

稍懈，擬求太后代閱摺件，並諭當敬事如一，語簡而厲。二十九日，復入見。上據坐榻上，天顏甚粹，日光炯然，猶有一半未落。上謂胸中覺熱，退至明閣。太后諭以流汁過多，精神委頓，問諸臣可有良法，聖慮焦勞，涕泗交下，退復傳勿散。有頃，傳諸臣皆入。上側臥，御醫搗芥藥，擠臍，色白而氣腥，漫腫一片，視之可駭。初二日，召入，上平臥，兩頰腫甚，唇鼓，色紅。一二語，遂巡而退。初五日，聞方案內，有神氣漸衰，勢恐內陷等語。日落，忽傳急召，馳入，御醫李德立，方奏事急。太后哭不能詞。諸臣奔東暖閣，上扶坐，瞑目。臣上前望視，已彌留矣。哭踊而退，按穆宗病狀，同餘親睹詳記，足以闡世傳之妄矣。

穆宗崩

本紀同治十三年十二月，上崩於養心殿。年十九。皇太后召王大臣等，入奉懿

旨。以醇親王之子承繼文宗爲嗣皇帝。

德宗本紀

德宗景皇帝諱載灃。文宗嗣子。穆宗從弟也。本生父醇賢親王。爲宣宗第七子。穆宗崩。迎上於潛邸。入即位。紀元光緒。奉皇太后聽政。二年。復烏魯木齊。四年。新疆平。賞左宗棠劉錦棠等功。五年。日本滅琉球。七年。曾紀澤與俄改訂新約。歸還伊犁。九年。法脅越南立新約。詔彭玉麟督防。敗法兵於諒山。十一年。與法議和。設海軍衙門。英滅緬甸。十三年。上親政。十四年。太和門災。十五年。太后始歸政。籌辦蘆漢鐵路。十六年。議藏印條約。以哲孟雄歸英。十七年。頤和園成。太后始臨幸。俄侵帕米爾。十八年。英人入坎巨提。二十年。日侵朝鮮。下詔宣戰。海陸軍皆敗。連陷奉魯各城。並陷澎湖。二十一年。命李鴻章赴日議和。定朝鮮自

作望主約，割臺灣。初設新建陸軍。二十三年，德兵輸入膠澳。二十四年，德租膠州灣。俄租旅順大連。英租九龍威海衛。法租廣州灣。詔定國是。議變法。太后復詔政。二十五年，以溥儀爲大阿哥。二十六年，義和拳亂。德奧美法英義日俄八國聯軍入京師。兩宮西狩。命李鴻章議和。定大綱十二條。俄占東三省。二十七年，上奉太后。回鑾。二十八年，與俄定交收三省約。二十九年，以日俄構兵。宣諭中立。三十一年，詔廢科舉。中日新約成。滿洲撤兵。三十二年，宣諭預備立憲。更定官制。三十三年，命各省立諮議局。舉議員。三十四年，上崩。葬崇陵。諭曰：德宗親政，奮發自強，維新變法，垂簾再出，外侮之來，數自內作，屢經厄逆，怵鬱摧傷，奄致殂落，而國運亦自此微矣。

德宗誕生

本紀。德宗。醇親王奕譞長子。母葉赫那拉氏。孝欽顯皇后女弟也。同治十年。六月二十八日。誕上於太平湖邸第。按德宗實生於六月二十六日。以是日爲國忌。故移後三日行慶祝禮。

德宗 嗣位

東華錄。穆宗崩。上入嗣大統。甫四齡。即日由邸第移禁中。趨詣御榻前。稽顙號慟。辨踊無算。扈從諸臣。遵奉懿旨。奉上即正尊位。翁同龢日記。戈什愛班奏迎嗣皇帝禮節。大略。蟒袍補褂。入大清門。從正道入乾清門。至養心殿。謁見兩宮皇太后。方於後殿成服。亥正。遣御前大臣及孚郡王等。以暖輿往迎。寅正。聞呼門。則籠燭數枝。入自門矣。近人筆記。太后既指定德宗嗣位。命榮祿等往迎入宮。雖事出倉卒。而預製御用冠服皆備。蓋太后早謀定於中也。

德宗典學

本紀，光緒二年，德宗典學。命翁同龢、夏同善等授讀。御批慶宮讀書，翁同龢日詔。二年二月二十一日，上於養心殿東暖閣，見侍學諸臣。上南嚮坐，設矮案，舖紙，素筆作書。臣餘以墨染筆，即寫天下太平四字，又書正大光明四字，楷端正。臣等以朱書仿格進。上運腕稍澁。臣餘引袖書四字訖，伯王等以清字條子阿字授。上略觀，即應聲曰阿。臣等以帝德二字進。上亦應口誦數四，又以帝鑒國說進。上甚會意，引手指帝堯大舜，若甚喜者，並命臣書帝德二字，恭親王又接書如天二字。玩視良久，凡三刻許乃退。次日，上依南憲坑上坐，余等立侍。昨所認皆能憶。上記憶故事，頗喜筆墨也。四月二十一日，上始行入學禮，卯正。至毓慶宮。上御後殿明間寶座，余等三跪九叩畢，上降。臨軒向諸臣揖，余等皆跪答。

從入西間。伯玉等先拉弓。後授蒙古語及滿洲字頭。余點書。上字號。讀甚順。又一日。上指書內財字曰。吾不愛此。又曰。吾喜儉字。此真天下之福也。又講人道心之分。上曰。吾作事皆依道心也。是年方五歲。又三年。余偶講逸詩。上即緜述而不作注內。孔子刪詩書一句爲證。此注從未講過。不知上何以領會至此。又太后諡云。實在好學。行立坐臥。皆誦書及詩。又請以青天屬對。對曰紅日。又上讀詩經。自書曰。岐豐之化大矣哉。用易經句法可喜。又七年。上要開國方略。即檢入。命講。至午。下座。再來。則無意讀書。百方激厲。直至申正。終不開口。近日近侍有語言違拂處。上屢述之。不平之意居多。臣等云。將啓奏。亦毫不介意。此關係聖德者大矣。今年彗。占曰。天子廢圖史。能無懼哉。又上點讀史論略。批云。唐之所以亡者。宦官而已。懿宗以後。更無法度。故亡。是年十一歲。又九年。上初

雪詩四句。極順。又作史論。亦通暢。又十年。懿旨。功課甚好。但須照弘德殿舊試。立功課簿。以便稽查。上意悚然。頗自振也。又作詩。題爲漢章帝。上援筆立書曰。白虎親臨幸。諸儒議五經。惜哉容寶憲。諍諫未能聽。每日臣侍側。不免檢韻。或講典故。今日離案觀書。未發一語。眞雲章第一篇也。喜而敬識。又上先習馬架。初試馬於東長街。從容攬轡。極可喜也。又十五年。上大婚後。至書齋。功課較平時爲多。天顏溫霽。和氣盎然。又上看馮桂芬抗議。挑六篇。裝訂一冊。題簽交閱。足見留意講求。可喜。又十七年。上命奕劻。帶同文館教習。講洋文。於西文極用意也。又二十年。十一月。慈諭命撤滿漢書房。上謂正典學。奈何輟講。次月。改傳滿功課及洋字均撤。漢書不輟。二十二年。正月。慈旨傳撤書房。按同餘直書房最久。爲上所倚恃。至是太后命撤書房。蓋有深意存焉。

德宗起居瑣記

翁同龢日記。光緒三年。上祁雪。雪降。上於雪中。不張蓋。不准人揮雪。曰。是輩不知余心。如長沮桀溺。不知聖人指意所在耳。時七歲。又記。耀雲舫。由進士而九列。上在藩邸時。病痢幾危。賴其鍼灸得安。又四年。旱。上祁雨。盼甚切。至書房曰。宮中茹素五日矣。汝等亦應茹素。遂傳素食。又五年。萬壽。上在寧壽宮。未嘗入座聽戲。仍到書房。云。鐘鼓雅音。此等皆鄉聲。不願聽也。聖聰如此。豈獨侍臣之喜哉。又八年。上意畏雷。方讀聞雷。遂甚不怡。百方開譬。以人聲雜濁。始讀畢。又十年。太后萬壽。長春宮演劇。上只在後殿。抽閒弄筆墨。太后出御臺前黃座。上未出。又十一年。以眼鏡一枚進。上索之切。自昨至今。無詞可復也。又上昨夜未睡。云守庚申。並學洋人以手持飯。係得之張師傳云云。問子騰。則前一節渺不

知。後一節微有影響。初未嘗謂當爾也。力白止之。按張師傅名家驥。字子騰。與同餘同直隸慶宮。又養心殿修溝。上以隳慶宮東室爲寢室。有扁曰妍秘書屋。修畢。移回。又十二年。燕九。上倚太后。御紫光閣。賜宴外藩。此次添傳小過堂跳駝等戲。小過堂者。健火兩營小兒。五人一排打鎗者也。上最厭打鎗。數日切切於此。傳聞尙有烟火。舊例在山高水長。道光十七年撤。又上奉太后謁陵。太后賜上黃馬褂。即於途次御之。又上垂問召見匠工。當用何語。遂略擬以呈。批摺尙用意。按是時。摺件呈上。試批。皆同餘侍擬。故得預聞朝政也。又上初祀南郊。御前大臣。咸稱舉止嚴重。肅穆雍容。不勝欣幸。又十五年。邴年殿災。上憐然良久。云。變不虛生。又十六年。六月。久雨。上以秋禾爲念。憂形於色。又十七年。五月。是日有引見。雨大。雷轟然。內殿喧譁。盜簦祭以亂。雷車也。此新樣。雨過。上始出。

回宮。又二十年三月，諭借孫家驛。同至昭仁殿，檢點天祿琳瑯藏書。上留意古籍，常以宋元書畫賜觀。又五月，上意欲移蹕南府。臣謂南府何地，豈宜爲帝王之居，力爭數四。後以立山等估費約六百萬，始停止。聖德如天，感誦不已。又二十二年八月，太后召見於玉瀾堂。堂即上寢殿也。命十八十九聽戲，並諭皇帝暫在園辦事。省跋涉。又九月，召對時，論練洋法兵三十萬。上詞氣奮發，似言京外不能通力合作，致此因循。此眞天下之幸也。又二十四年正月，上索日本國志，又命索康有爲所進書。又上諭今宜多講西學，飭擬旨。又四月，殊論翁同龢開缺回籍。次日，赴宮門叩辭，趨出。急在道右，碰頭。上回顧無言。臣亦黯然如夢。按同龢獲咎，亦出太后命。與撤書房用意同也。

同坐視事

翁同龢日記。光緒九年元旦。召見於養心殿西暖閣。皇太后與上同坐御榻。太后在右。上在左。儼如宋宣仁故事。蓋前此所未有也。諸臣入。先叩賀皇太后天喜。用漢語。次叩賀皇上天喜。用清語。皆一跪三叩首。中官傳奉太后暨上賜八寶荷包各一。敬受。即懸於胸。一叩謝。然後上墊跪。諭以天氣清和。吉祥善事。皇帝好學。日近詩書。自明日起。當同在坐。以後早事皆擬親裁。諸臣亦頌揚數語。即退。又八日。入見。上亦在坐。寶相選擇。上接閱。頗用心。自首至尾。不少忽也。每一摺畢。太后降旨。樞臣承旨後。仍於上前覆述之。應放缺單。太后以硃筆授上閱之。是日凡五摺。兩單。四明發。爲時較久。凡三刻五分而退。

德宗親政

本紀光緒十三年正月。帝親政。翁同龢日記。光緒十三年正月十五日。皇上親

政。召見辦事。仰瞻天顏甚精采也。時太后仍訓政。又太后諭勤習批摺。又上云。現在看外省摺。皆手加簽。令軍機酌定再批。每日書房後。回宮看摺。又十五年二月初三日。上親政。御太和殿受賀。宜詔遇重要事。仍請太后訓示。又上月太后皇上召見。對以親政後。第一不可改章程。上曰。斷不改。又十月。上諭。各省藩臬。專摺奏事。蓋出自聖裁。近日讀列朝聖訓。有所得也。又十八年閏六月。山西巡撫阿克達春。到京。召見。以其奏對不能明晰。開缺另簡。大哉綸音也。又二十一年。四月。新放四川鹽道玉銘。會充庫兵。開木廠。又與中官連結。中官令赴粵海索錢。遂捐道員。中官毀之。乃忽有此除。物論譁然。今日奉旨召見。詢問政事。未能諳悉。開缺以同知候選。又十月。同係復直軍機。上英爽非復常度。剖決精明。事理切當。每遞一摺。上必問臣可否。蓋眷倚極重。恨才短無以仰贊也。又二十

一年。四月。發下殿試前十卷。展封。則第三。改第一。第十。改第二。上所特拔也。諭今年試策。有不拘舊式者。寫作均好。故拔之。又二十三年。十二月。上頗詰問時事。所宜先。並以變法爲急。退令擬裁綠營撤局員薦人材之旨。又二十四年。二月。上切責諸臣一事不辦。召對俄頃。直廬數時而已。

德宗大婚

本紀。光緒十五年正月。大婚禮成。翁同龢日記。光緒十三年五月。懿旨。大婚典禮。著戶部先籌銀二百萬兩。並外省預指二百萬兩。備傳辦物料之用。又著長春宮總管太監李連英。總司傳辦一切。前後提撥五百五十萬兩。又十四年七月。懿旨。定明年正月二十七日。行大婚禮。今年十一月初二納采。十二月初四大徵。又十月。懿旨。宣示立后。主副都統桂祥之女爲皇后。封原任侍郎長叙之

十五歲女他他拉氏爲瑾嬪，十三歲女爲珍嬪，又鳳秀之女，德馨之女，志顏之女，均賞大緞四匹，衣面一件，擦牌，又十五年正月二十四日，皇后敕奮，由東華門協和門入後左門，進乾清中門，黃亭一百座，無鼓樂，明日同，共二百擡，瑾珍二嬪敕奮，由後門入，又二十七日，子刻，皇后乘鳳輿，派奉迎十大臣，及步軍統領等，乘馬隨行，寅刻，進大清門，入宮，又大婚後，坤寧宮二日，即移養心殿，殿之西，曰體順堂，皇后所居也，遇齋戒期，后居鍾粹宮，皆中人所云。

視疾醇邸

本紀，光緒十六年十一月，上奉皇太后臨醇親王邸視疾，薨，復臨視殮，賜奠，翁同龢日記，光緒十三年十月，醇邸病，上垂淚，諭云，醇親王病重，語甚急切，並云宮內常派人問病，但歸時到太后處覆命，慶王欲與御前，同奏請上詣邸看視。

然究嫌疑之間也。詹事福懋疏奏。懿親有疾。宜臨省視。旋奉懿旨。與上何詣醇王府視疾。邸以厚褥鋪地。欲起跪而不能。欠伸而已。此上所述也。又十六年。醇邸病。皇太后皇上屢詣問。醇邸薨。臣等入見於勤政西室。上噉然長號。少頃。問用何服色。請懿旨。至邸。上醇素慟。哭入。行禮如儀。又二十二年。五月。醇親王溥晉薨。上咸容無語。與十六年情形大異矣。退而感歎。又上詣府奠祭。天容憔悴。

宴見外使

本紀。光緒十七年。初。與國來使。皆見於紫光閣。謂視如藩屬。屢以易地爲言。是年九月。始於承光殿觀見。翁同龢日記。光緒十七年。正月上。御紫光閣。見各國使臣。使臣入殿。凡七鞠躬。上以兩首肯答之。此次觀見之先。德使屢起駁難。不欲在紫光閣。並各帶繙譯。撤去面前黃案等。惟紫光閣一節不允。餘皆允。聞進

見時，天語清朗，夷使暨深成禮。又二十四年正月，上御文華殿，見各國使臣，初各國使臣擬乘輿馬入禁，上謂可曲從，又巴使入見，命上踏鞴，陳國書於御案。上上宣諭用漢語，此皆從前所未有也。又德親王亨利，見皇上於玉淵堂，上坐，命亨利坐於右偏，設食南配殿，上至慰勞，德兵舉槍擊鼓，兵官拔刀，以爲致敬，上立視諭云：兵皆精壯，甚可觀。數日，再見勸政殿，亨利摘帽鞠躬，上起立，與之握手，賜坐，並命送寶星。又德使覲見文華殿，上納陛，遞國書，上親宣答詞，不令慶親王傳宣，上亦佩寶星，蓋異數也。

面賜福字

翁同龢日記：光緒十八年臘月朔，上至頤年殿，而賜福字。皇太后南嚮坐，上南面立，前設案，筆墨具，羣臣以次歷階升，候於殿外，受賜者入跪，候上揮翰，至末

數筆。即連叩頭訖。福字從身上搭過。謂之滿身都是福也。壽字亦上親書。前數日寫就。旁一人捧而出。受賜者隨之。交懿勳殿太監。歸匣。搭至大院。涼乾再送。

甲午議戰

本紀。光緒二十年。命翁同龢、李鴻藻與軍機總署集議朝鮮事。詔宣戰。翁同龢日記。光緒二十年六月。議朝鮮事。上意一力主戰。並傳懿旨亦主戰。又北洋謂俄有十船可借調。上盛怒。令復電不得倚仗俄人。又二十一年正月。上問諸臣時事如此。和戰皆無可恃。言及宗社。聲淚並發。又三月。論割臺灣。上曰。臺割則天下人心皆去。朕何以爲天下主。孫毓汶以前敵屢敗對。上責以賞罰不嚴。故至於此。諸臣唯唯引咎而已。伏親皇上乾闥一振。氣象聿新。竊喜。又私自憾也。又四月。上和約事。徘徊不能定。天顏憔悴。所論大抵皆極爲難。臣恨不能碎

首以報。又東朝猶持前說。而指有所歸。上意幡然。有批准之諭。書齋入侍。君臣相願揮涕。此何景象耶。

參預新政

本紀。光緒二十四年。四月。召見工部主事康有爲。命充總理各國事務衙門章京。七月。內閣侍讀楊銳。中書林旭。刑部主事劉光第。知府譚嗣同。並賞加四品卿銜。充軍機章京。命參預新政。楊銳傳拜命之日。皇上親以黃匣緘一硃諭授四人。命竭力贊襄新政。無得瞻顧。凡有奏摺。皆經四卿閱視。凡有上諭。皆經四卿屬草。於是軍機大臣嫉妒。勢不兩立。及宮中變態已作。上召見。賜以衣帶。詔乃言位將不保。命速同設法救護者也。

手詔楊銳

楊叔驤事略。德宗召見。賜手詔云。近日朕仰觀聖母意旨。不欲退此老耄昏庸之大臣。而進用英勇通達之人。亦不欲將法盡變。雖朕隨時幾諫。而惹意甚堅。即如七月二十六日之事。聖母已謂太過。朕豈不知中國積弱不振。非退此老耄昏庸之大臣。而力行新政不可。然此時不惟朕權力所不能及。若必強以行之。朕位且不能保。爾與劉光第。譚嗣同。林旭等。詳細籌議。必如何而後能進此英勇通達之人。使新政及時舉行。又不致少拂聖意。即具封奏以聞。候朕審擇施行。不勝焦虛之至。欽此。按此殊論。宣統元年。其子林慶澍。呈繳於都察院。代奏留中。

開懋勤殿

譚嗣同傳。七月二十七日。皇上欲開懋勤殿。設顧問官。命擬旨。先遣內侍持歷

朝聖訓傳上言謂康熙乾隆咸豐三朝有開懋勤殿故事。令查出引入上諭中。蓋將親往頤和園請命云。至二十八日。京朝人人咸知懋勤殿之事。以爲今日諭旨將下。而卒不下。於時知上眞無權。及后與帝不相容矣。

稱疾

本紀。光緒二十四年八月。皇太后復訓政。上稱疾徵醫。詔捕康有爲等。楊深秀。楊銳。林旭。劉光第。譚嗣同。康廣仁。俱處斬。清史綱要。太后復臨朝訓政。置帝於瀛臺。稱疾徵醫。先是內廷徧傳帝病重。不能視事。至是復命中外保薦精通醫理之人。

帝在瀛臺

德宗居瀛臺。以涵元殿爲寢殿。香宸殿與之相對。爲皇后所居。非太后命不得

往來。德宗偶或登樓遠眺。宮監即報太后。一舉一動。皆有人密啓也。日惟以書史自遣。隨筆塗寫。四壁皆滿。近侍相傳。每好畫鬼怪或龜形。而書袁某名於上。張壁間。指殘之令粉碎。碎後復繪。日以爲常。迨西狩始止。見近人筆記。

西狩

本紀。光緒二十六年。七月己未。八國聯兵陷京師。庚申。上侍皇太后如太原。九月至西安。明年回鑾。西狩叢談。懷來縣知縣吳永。接謁太后。召見。時皇上立侍。服元色舊棉袍。寬襟大袖。上無外褂。腰無束帶。髮長至逾寸。蓋首垢而憔悴已極。太后命李連英引見。依式跪叩。皇上無語。又至西安。每見臣工。太后令帝問話。上始問外間安否。年歲好否。祇此二語。即一日數見亦如之。又內監對皇上。殊不措意。雖稱之爲萬歲。實弄如傀儡耳。按自京至懷來。僅三日。而云髮長逾

寸。此足見帝在瀛臺之情狀矣。內廷請髮有定期，乃至櫛沐失時，帝之處境，即此可知。是誰之咎耶？自回鑾後，聞帝起居始漸復舊，仍不能定制也。

回鑾祀天

本紀。光緒二十七年十二月。上回鑾祀天於圜丘。自戊戌年八月至於是。始親詣。

德宗崩

本紀。光緒三十四年十月壬申。上疾甚。太后懿旨。醇親王載灃之子。在宮中教養。復命載灃監國。爲攝政王。癸酉。上疾大漸。崩於瀛臺涵元殿。年三十有八。葬崇陵。遺詔。攝政王載灃子。入承大統。爲嗣皇帝。懿旨。命嗣皇帝承繼穆宗爲子。兼承大行皇帝之誥。慈禧外紀。太后初定嗣位。世續。張之洞。皆以宜立長君爲

請太后怒斥之始定議。

宣統本紀

宣統皇帝名溥儀。宣宗之曾孫。醇賢親王之孫。監國攝政王之子也。德宗崩。入爲嗣皇帝。閔穆宗兼承大行皇帝之祿。即位。紀元宣統元年。設軍諮處。攝政王代爲海陸軍大元帥。二年。設資政院。詔於宣統五年開國會。三年。改立責任內閣。定鐵路國有。川民爭路。武昌變作。湘滇贛皖江浙魯晉繼起。授袁世凱內閣總理大臣。全權議和。世凱奏與民軍議贊共和。並進皇室優待等條件。遂遜位。詔曰。帝冲齡。閔服。監國攝政。大事並白太后。大變旣起。遽謝政權。天下爲公。永存優待。遂開千古未有之奇焉。

宣統外紀

清帝外紀

本紀。宣統皇帝。爲德宗末生弟攝政王載澄長子。母蘇完瓜爾佳氏。光緒三十二年。正月十四日。誕於後海醇邸。入嗣位時。年三歲。至六歲。遜位。按遜位後記事。別有宣統外紀。分十章。一典學。二隆裕大喪。三崇陵工程。四復辟。五大婚。六清理內府。七出宮。八津圍。九瑣事。十增傳。分節詳述。如瑣事則記去辯及裁太監等節。附傳則記前後侍從各人事略。以所記均遜圍以後事。與此編體例不合。故別出云。

清后外傳錄目

太祖后妃	蒙古姐姐	大福金	大妃阿巴亥
太宗后妃	清寧中宮	孝莊文皇后	宸妃
東宮福金	寶土門福金	褻褻太后	
世祖后妃	廢后	孝康章皇后	董妃
孝獻皇后行狀	漢女爲妃	孔四貞	
聖祖后妃	孝恭仁皇后	定太妃	
世宗后妃	孝聖憲皇后	年妃	耿妃
高宗后妃	孝賢純皇后	納喇皇后	孝儀純皇后
慶貴妃養母	惇嬪	回妃	銀妃

仁宗后妃

孝淑睿皇后

恭慈皇太后

如太妃

宣宗后妃

孝全成皇后

康慈皇太后

孝欽顯皇后

文宗后妃

四春

孝貞顯皇后

蘭貴人

懿嬪

聖母皇太后

慈禧太后

老佛爺

那拉后

老祖宗

太皇太后

穆宗后妃

孝哲毅皇

瑜妃 珣妃 瑤妃

德宗后妃

隆裕太后

瑾妃 珍妃

宣統后妃

清后外傳

金 梁輯

太祖后妃

太祖后妃十四人。孝慈高皇后，葉赫納喇氏，元妃，佟佳氏，繼妃，富察氏，大妃，烏拉納喇氏，側妃，伊爾根覺羅氏，葉赫納喇氏，壽康太妃，博爾濟吉特氏，妃，哈達納喇氏，博爾濟吉特氏，庶妃，兆佳氏，鈕祜祿氏，嘉穆瑚覺羅氏，西林覺羅氏，伊爾根覺羅氏。

蒙古姐姐

實錄：孝慈高皇后，諱蒙古姐姐，葉赫貝勒楊吉努女也。初太祖如葉赫國，楊吉努識爲非常人，謂曰：有幼女，俟其長，當奉侍。太祖曰：汝欲結盟，盍以長女妻我。答曰：非惜長女不予，以幼女儀容端重，舉止不凡，堪爲君配耳。太祖遂聘之。戊

子秋始來歸。年十四。即太宗母也。癸卯秋。后病篤。思見母。太祖遣使至葉赫迎之。后兄貝納林布豫不許。及崩。太祖悼甚。殉以四婢。不飲酒茹葷者踰月。甲辰春。太祖以后病革時。欲見母未能。怒葉赫。率兵征之。克二城。

大福金

繼妃富察氏。莽塞杜諸姑女。老檔稱大福金。生皇五子莽古爾泰。皇十子德格類。及皇女莽古濟格格。天命五年。以私藏金帛。擅自授受得罪。詳見滿洲老檔秘錄。太祖曰。大福金罪無可逭。惟念所出三子一女。遽失所恃。不免悲愴。姑寬其死。遣令大歸。旋賜死。見寶錄。按福金一作福晉。或云吟屯二字轉音。哈屯。契丹語可敦。譯言后也。或云即夫人轉音也。

大妃阿巴亥

大妃烏喇氏諱阿巴亥貝勒滿泰女。即攝政王多爾袞母也。三朝實錄。孝慈皇后崩後。立烏喇貝勒女爲大福金。大福金美丰儀。而心未純善。常拂上意。雖有機巧。皆爲上英明所制。上知之。恐其後爲亂於國。預以書遣諸貝勒曰。我身後。必令之殉。及太祖崩。諸貝勒以遺命告大福金。大福金不欲從死。語支吾。諸貝勒堅請之。大福金始易禮服。飾以金玉珠翠珍寶之物。因涕泣謂諸貝勒曰。我年十二。事先帝。豐衣美食。二十六年。何忍離也。但吾二幼子多爾袞多鐸。幸。恩養之。遂以身殉。又有二庶妃。亦同殉焉。至順治年。攝政王旣薨。論罪。有取閱太祖實錄。令削去伊母事跡一款。後重修實錄。亦不載。迫殉事。按實錄。太祖幸湯泉。大漸。還京。使人召大妃。迎入渾河。未至瀋陽四十里。上崩。是太祖崩時。僅大妃侍左右。又順治年。追論攝政王罪狀。有親到皇宮院內。謂太宗帝位。原係奪

立等語，則當時似有儲位之爭，大妃之殉，或以此歟。

太宗后妃

太宗后妃十五人，孝端文皇后，博爾濟吉特氏，孝莊文皇后，博爾濟吉特氏，宸妃，博爾濟吉特氏，貴妃，博爾濟吉特氏，淑妃，博爾濟吉特氏，元妃，鈕祜祿氏，繼妃，烏拉納喇氏，側妃，葉赫納喇氏，博爾濟吉特氏，庶妃，納喇氏，奇皞氏，顏札氏，伊爾根覺羅氏，又氏未詳者二。

清寧中宮

孝端文皇后，博爾濟吉特氏，貝勒莽古思女，甲寅歸太宗，崇德元年，太宗受尊號，后以嫡妃冊立，稱清寧中宮，與永福宮莊妃，關雎宮宸妃，麟趾宮貴妃，衍慶宮淑妃，並封，皆以所居宮額，爲稱號也。

孝莊文皇后

孝莊文皇后，博爾濟吉特氏。科爾沁貝勒桑桑女也。崇德元年，封永福宮莊妃。生世祖及公主三。世祖踐阼，尊爲皇太后。聖祖立，尊爲太皇太后。仁慈愛人。每有偏災，輒發宮帑振卹。值三藩用兵，后念出征駐防兵士勞苦，盡發宮中金帛加犒。國初故事，后妃諸王貝勒福金貝子公夫人，皆有命婦更番隨侍。自后始罷。宮中逾祖制，誓御不畜漢女。性知書，世祖嘗稟母訓，述內則衍義。聖祖命儒臣譯大學衍義進，后善之，頒賜有加。又嘗作書誡聖祖，並勉以用行政敬承天意。虛公裁決，崇養兩朝。祝釐肆賚，獻詩揆頌。天下稱孝慈焉。康熙二十六年崩，年七十有五。遺誥曰：予幼承太祖登聘，獲奉太宗，贊襄內政，龍馭上賓，誓以身殉。諸王大臣，以世祖冲齡，勉留此身，撫育教訓。十有九年，重遭不造，願茲藐

孤。復抑初志。皇帝孝養備盡。予心甚安。屆當寢疾。進至。留得復奉太宗左右。夫亦何憾。皇帝宜勉自節。以萬幾爲重。又語帝昭陵歲久不可啓。魂魄戀汝父子。務擇孝陵近地安厝。遂葬昭西陵。節張采田。后妃傳。

又通考。孝莊皇后。順治元年。尊爲皇太后。八年。上徽號曰。昭聖慈壽皇太后。下嫁之說。實誣。后妃傳注。按張煌言寄零草。建夷宮詞。上壽觴爲合。遜尊。慈寧宮裏。爛盈門。春宮昨進新儀注。大禮恭逢太后婚。鈔本此詩。繫年庚寅。爲順治七年。貨錄。是年正月丁卯。攝政王迫封其妃爲敬孝忠恭正宮元妃。丁丑。納肅親王福金。攝政王以皇叔父納妃。繼正宮。當時典禮隆重。民間或有太后之稱。孝莊知書明禮。母儀天下。不待辨而知其誣矣。

宸妃

宸妃。孝莊后姊也。崇德初。封關雎宮宸妃。有寵於太宗。六年薨。太宗方攻松杏山。聞妃病先旋。比薨。慟甚。昏迷伏地。既而悔曰。太祖崩時。未嘗有此。天之生朕。豈爲一婦人哉。然燕閒遊曠。輒思慕不已。參政祖可法等。諫謂天佑我國。錦州垂克。宜以理抑情。帝不聽。躬自奠醴。外藩朝鮮蒙古。皆遣使來弔祭。追封元妃。

東宮福金

側妃。札魯特博爾濟吉特氏。父代青。始太宗立。孝端嫡妃。曰中宮大福金。又立西宮福金。惟東宮未備員。天聰六年。聞蒙古札魯特部落貝勒代青女賢。聘焉。時當革創宮闈位號簡略。但稱東宮福金而已。

寶土門福金

寶土門福金。察哈爾汗妻也。實錄。天聰八年。察哈爾國林丹汗妻。寶土門福金。

拂其國人來降，大貝勒代善等公議奏謂：「天特賜上，可即納之。」上固辭曰：「此福金，朕不宜納。貝勒中有妻不和睦者，當以與之。代善等復力勸，護送福金多尼庫魯克亦曰：「我等此行，乃送福金，非私來也。」皇上納之，則新附諸國與我等，皆不勝踴躍歡慶矣。」上思三日，因憶行師時，駐營納里特河，曾有雌雉飛入御幄之祥，此殆天意，於是始納之。衆喜皆望天拜謝，按察哈爾部下送福金入降，意尙親望。太宗初，堅辭而後納之，正以安衆心也。

褻褻太后

褻褻太后，察哈爾汗大福金也。實錄：天聰九年，先是郭爾圖塞真，送察哈爾汗大福金，褻褻太后至，上謂大貝勒代善宜娶之，代善不從，諸貝勒奏言：「此乃察哈爾汗有名多羅大福金，上宜自納之。」上曰：「朕先已納一福金，今又納之。於理

不合。諸貝勒言，此非有所欲而強娶之，乃天所賜也。再三陳奏，月餘，方允納之。

世祖后妃

世祖后妃十九人。廢后博爾濟吉特氏，孝惠章皇后，博爾濟吉特氏，孝康章皇后，修佳氏，孝獻皇后，董鄂氏，悼妃，博爾濟吉特氏，貞妃，董鄂氏，恪妃，石氏，恭靖妃，浩齊特博爾濟吉特氏，淑惠妃，科爾沁博爾濟吉特氏，端順妃，阿巴海博爾濟吉特氏，寧嫔妃，董鄂氏，庶妃，穆克圖氏，巴氏，陳氏，唐氏，鈕氏，楊氏，烏蘇氏，納喇氏。

廢后

廢后博爾濟吉特氏，科爾沁卓哩克圖親王烏克善女。順治八年，納爲后。后容止佳麗，性巧慧，好奢多猜嫉，積與帝逆。十年，議廢后，奏聞皇太后，降爲靜妃，改

居仰宮，王大臣等請建東西兩宮，仍后位號，帝不從，后竟廢。

孝康章皇后

孝康章皇后，佟佳氏，聖祖生母也。后，一等公圖賴女，幼入宮，爲世祖妃，年十五生聖祖。聖祖踐阼，尊爲慈和皇太后。康熙二年崩，佟佳氏以地氏國初隸漢軍，帝以后故，令圖賴一族入滿洲。

董妃

孝獻皇后董鄂氏，世稱董妃，實滿洲正白旗人，內大臣鄂碩女也。后以大臣女入選，順治十三年立爲賢妃，復進冊爲皇貴妃，十四年生皇四子，十七年薨，追謚爲孝獻皇后。世祖御製行狀及大學士金之俊撰傳，述記甚明，實錄通考並詳世族，野史所傳純出毀謗，不足信也。其誤或由狀傳僅言后姓董氏而未明

著董鄂，不知滿洲氏族，皆以晉譯。孝康章皇后，母覺羅氏，封公夫人。詔作焦氏。覺羅合晉曰焦，棟鄂合晉曰董，其例一也。又何可疑耶。鄂碩，清史有傳，滿洲棟鄂氏，以戰功累進一等精奇尼哈番。順治十三年，擢內大臣，十四年，以女冊封皇貴妃。進三年伯，卒贈三等侯，諡剛毅。

孝獻皇后行狀

世祖御製孝獻皇后行狀。后董氏，滿洲人。父內大臣鄂碩，后幼顯慈。年十八，以德選入掖庭，婉靜循禮，爲皇太后所嘉與。順治十三年，承慈命立爲賢妃，復進冊爲皇貴妃。其事朕，晨夕候興居，視飲食服御，曲盡罔不悉，或命之共餐，即曰：陛下厚念妾，幸甚。然教若與諸大臣，使得容寵惠乎。朕故類與大臣共食，朕每省封事，抵夜分，后未嘗不侍側，遇例報，朕寓目已置之，后輒曰：此雖奉行故事，

願安知無時變，需更張，且有他故，宜洞賜者，奈何忽之？及朕令后同閱，即復謝曰：妾聞婦無外事，豈敢以女子干國政耶？每當日譚後，必詢所譚，朕與言章句大義，后輒喜，朕有時親騎射，后必諫曰：陛下習武事，安不忘危，甚善，然馬足安足恃，深爲危之。朕覽廷讞疏，握筆猶豫未忍下，后必勉朕再閱，求可矜宥者，全活之。大臣有偶干罪戾者，朕或不樂，后曰：諸大臣即有過，皆爲國事，曷舜威詳察，以服其心，不則諸大臣弗服，何以服天下之心乎？初，朕或加譴讓，后猶申辨，及諷史至，妾后脫簪待罪事，翻然曰：古賢后身本無得，尙若彼，我往殊違恪順之道，罔即有宜辯者，第引咎自責而已。后事今后，克盡謙敬，朕以今后事皇太后，有違孝道，令羣臣譏，后聞之，長跽請曰：陛下若遽廢皇后，妾必不敢生，萬無廢皇后也。后于丁酉冬，生榮親王，未幾殤，后恬然曰：豈必己生者爲天子，始慊

心乎。噫，可謂明大義，不顧私戚，以禮自持，能深體朕心者矣。又金之俊奉教撰傳孝獻皇后，姓董氏，蒲洲人。父內大臣鄂碩，后生而警慧過人。讀女誡，列女傳等，一過輒不忘。稍長，開女工。于組紉，託織，如素習然。動履進止，咸中規程。秩然有母儀之度。年十八，以德入選，爲賢妃。進冊皇貴妃。事皇太后，曲盡奉養。如親子女。事上則小心翼翼，備極恭謹。凡飲食服御間，曲盡靡遺。后深識遠慮，見機明決，敢於犯顏直諫。有舉朝公卿所不克殫其忠藎者，上用是深嘉焉。后慈惠好施與，凡上所錫賚，必推而廣之。羣下無所靳，性愛節儉，服澣衣，屏金飾，簪珥多用骨角，約素異常。后又喜讀書，四書周易俱卒業，習書法，選造精工。后素不信浮屠氏，上嘗爲解譯心經，遂信向禪學。自嬰疾後，從未偃臥，但息心靜坐，及疾篤至大漸時，言語如常，一心不亂，惟持念佛號，端然嗟氣而化。后雖未及正

位宮中。而內政秩然。纖悉曲當。今一旦崩逝。上所以撫時。觸事。觀景興悲。追念不已。諡御製行狀。一字一淚。含毫酸咽。聊爲綴述。使後有所考云。

漢女爲妃

通考。妃石氏。澤州人。戶部待郎石申女。以漢籍入選。賜居永壽宮。后妃傳注。按寶錄。順治吾年。詔許滿漢通婚。漢官之女。欲婚滿洲者。令報部。故妃以漢籍得在選中。實特例也。永平府志。世祖稽古制。選漢官女備六宮。戶部左侍郎石申女。及笄。承恩賜居永壽宮。冠服用漢式。敕石申妻趙淑人。乘肩輿入西華門。至右門下輿。入宮。行家人禮。賜重筵。賞賚有加。後封恪妃。志乘之言。不無緣飾。而漢女爲妃。則確事也。

孔四貞

孔四貞，有德女也。實錄：順治十三年，諭禮部奉聖母皇太后諭，定南武壯王女孔氏，忠勤孺裔，淑順端莊，堪翊壺範，宜立爲東宮皇妃。爾部卽照例備辦儀物，候旨行冊封禮。后妃傳注考：孔有德，順治九年殉難，大兵復桂林，女四貞，以櫬歸京。初有德以四貞字孫延齡，時尙幼，特賜白金萬兩，歲俸視郡主，旣長，適延齡。見國史武臣逆臣傳。無名氏四王合傳：四貞入宮爲太后養女。及年十六，太后爲擇壻，四貞自陳有夫，蓋有德存日，已許配孫侶將子延齡矣。詔求得之。奉太后命爲夫婦，賜第西華門外，封四貞爲和碩格格，掌定南王事，遂制廣西軍。皆不言四貞曾被選，惟吳偉業做唐人本事詩，相傳爲四貞作。其首章曰：聘就蛾眉未入宮，待年長罷主恩空。旌旗月落松楸冷，身在昭陵宿衛中。與實錄合。盜待年而未入宮者也，或因四貞自陳有夫，遂罷冊禮歟。按實錄僅有候旨之

諭而未載冊封，必因此停止，無可疑也。

聖祖后妃

聖祖后妃三十九人。孝誠仁皇后，慈舍哩氏。孝昭仁皇后，鈕祜祿氏。孝懿仁皇后，佟佳氏。孝恭仁皇后，烏雅氏。溫僖貴妃，鈕祜祿氏。慈惠皇貴妃，佟佳氏。慧妃，科爾沁博爾濟吉氏。惠妃，納喇氏。宜妃，郭絡羅氏。榮妃，馬佳氏。敬徵皇貴妃，章佳氏。惇怡皇貴妃，瓜爾佳氏。平妃，慈舍哩氏。良妃，衛氏。宣妃，博爾濟吉特氏。成妃，戴佳氏。定嬪，萬琉哈氏。順懿密妃，王氏。安嬪，李氏。敬嬪，章佳氏。端嬪，董氏。僖嬪，慈舍哩氏。純裕勅妃，陳氏。通嬪，納喇氏。貴人，兆佳氏。郭絡羅氏。袁氏。納喇氏。陳氏。納喇氏。庶妃，高氏。色赫圖氏。石氏。陳氏。陳氏。張氏。王氏。劉氏。鈕祜祿氏。

孝恭仁皇后

孝恭仁皇后，烏雅氏，參領衛武女，世宗母也。康熙十八年，封德嬪。二十年，進德妃。世宗即位，尊爲皇太后，號仁壽。雍正元年，崩於永和宮。

定太妃

定妃，萬琮哈氏，郎中拖爾弼女。康熙五十七年，冊爲嬪。生皇十二子和碩履親王允禔。世宗即位，尊爲皇考定妃，稱定太妃。妃就養允禔王邸。高宗時，歲時節，必迎入宮，賦詩獻壽，稱爲盛事。年九十七薨。按賞錄，雍正十三年十二月，高宗諭莊親王、果親王，奏請各迎妃母於邸第，朕聞奏，心甚不安。今思人子事親，誠欲各遂其願，自今以往，歲時伏臘，令節壽辰，二王及各王貝勒，可各迎太妃於邸第。其餘日仍在宮中，則王等孝養之心，與朕敬奉之意，庶可兩全。自此諭後，母妃始無就養王邸者。

世宗后妃

世宗后妃八人，孝敬憲皇后，納喇氏，孝聖憲皇后，鈕祜祿氏，敦肅皇貴妃年氏，純懿皇貴妃耿氏，齊妃李氏，謙嬪劉氏，寧妃武氏，懋妃宋氏。

孝聖憲皇后

孝聖憲皇后，鈕祜祿氏，四品典儀凌柱女，高宗母也。事世宗雍邸，聖祖時，嘗隨孝敬后，見於避暑山莊，聖祖稱爲有福之人。世宗立，封熹妃，進貴妃，高宗即位，尊爲皇太后，號崇慶，時承平，久后母儀，尊養四十餘年，帝數奉南巡，每萬壽慶辰，捧觴躬舞，賞燈賜膳，親制詩畫，以申愛敬。乾隆四十二年，崩於長春仙館，年八十有六。王國運今列女傳，孝聖憲皇后，始在母家，居承德城中，幼貧，詣市買漿酒粟麪，所至店肆輒大售，市人敬異。十三歲，入京師，值選秀女，隨入觀，門者

初以爲在籍中，既而引見，十人爲列，始覺之，主者懼譴，令入末班，竟中選，分皇子府，得在雍邸。世宗疾，孝聖奉妃命，旦夕服事，遂得留侍。生高宗焉。按王氏博雅，號通掌故，而不知秀女入選例，遞名牌，詎得臨時妄指，何所記之俗陋也。

年妃

貴妃年氏，年遐齡女也。幼贖世宗藩邸，爲側妃，即位封貴妃。三年，妃病篤，上諭禮部，貴妃年氏柔嘉淑順，體素病弱，力疾盡心，贊襄內政，可封爲皇貴妃。是年十一月薨，追謚敦肅皇貴妃。按年羹堯，雍正三年獲罪，十二月，令自裁，其父年遐齡，兄年希堯，革職免罪，猶有推恩意也。

耿妃

裕妃耿氏，滿洲人世宗即位封裕嬪，進爲妃。高宗二年，封爲皇考貴妃。四十三

年。上以裕貴妃母妃九十壽，晉封裕皇貴妃，親奉冊寶，御書扁聯，御製詩章，詣裕皇貴妃宮行禮，稱爲宮闈盛事。四十九年薨，追謚皇考裕純懿皇貴妃。

高宗后妃

高宗后妃二十七人。孝賢純皇后富察氏。孝儀純皇后魏佳氏。皇后納喇氏。慧賢皇貴妃高佳氏。哲嫺皇貴妃富察氏。淑嘉皇貴妃金佳氏。純惠皇貴妃蘇氏。忻貴妃戴佳氏。慶恭皇貴妃陸氏。愉妃珂里葉特氏。循妃伊爾根覺羅氏。舒妃葉赫納喇氏。顯貴妃巴林氏。豫妃博爾濟吉特氏。容妃和卓氏。惇嬪汪氏。順妃鈕祜祿氏。婉嬪陳佳氏。怡嬪柏氏。恂嬪拜爾噶斯氏。愼嬪霍碩特氏。誠嬪鈕祜祿氏。恭嬪林佳氏。芳嬪陳佳氏。貴人西林覺羅氏。儀嬪黃氏。晉貴人富察氏。

孝賢純皇后

孝賢純皇后富察氏。父李榮保。祖米思翰。乾隆二年。以嫡妃冊立。性節儉。平居冠通草線絨花。不御珠翠。歲時例進帝荷包。惟以鹿羔襪。緝爲縫囊。仿先世關外之制。寓不忘本意。帝特加敬寵。十三年。帝奉皇太后東巡。后侍返蹕濟南。崩於德州。歸治喪。詔內外官縞素哭臨。禁齋髮百日。追謚爲孝賢皇后。先是。慧賢皇貴妃薨。定證時。后戲謂帝曰。吾他日期以孝賢可乎。至是。帝以夫婦相知。遂用之。后旣亡。帝追懷不已。感逝抒情。時見篇什。又爲述悲賦。以寫哀悼焉。后妃傳。

納喇皇后

皇后納喇氏。佐領那爾布女。以側妃侍高宗潛邸。卽位二年。封嫺妃。十年。進貴妃。孝賢后崩。擢六宮事。進皇貴妃。十五年。冊立爲皇后。三十一年。薨。帝下詔曰。

皇后自册立以來，尚無失德。去年春，奉皇太后南巡，性忽改常，不能恪盡孝道。比至杭州，舉動尤乖心理，跡類瘋迷。因令先歸，在宮調攝。經今一載，病劇遽奄。論其行事，即當廢黜，朕仍存其位號。但喪儀可依皇貴妃例行。后未薨時，外廷頗有異議。後且傳爲溺死德州舟次。實錄明載回宮一載。始因病逝。上諭又述其病狀，謂自行剪髮，國俗所最忌，並言自此不復立后，心事光明正大，蓋亦以有異議而發云。

孝儀純皇后

孝儀純皇后，仁宗母也。本姓魏，包衣管領下人。以抬入滿洲旗，稱魏佳氏。內管領清秦女。乾隆十年，封令嬪，進爲妃。二十四年，進貴妃。三十年，進皇貴妃。四十年，崩。謚令懿皇貴妃。六十年，東宮建，帝行內禪禮，追謚爲孝儀皇后。

慶貴妃養母

慶貴妃陸氏。陸士龍女。仁宗幼時。爲妃所鞠育。及即位。妃已前薨。嘉慶四年。乃下諭曰。朕自冲齡。蒙慶貴妃養母撫育。與生母無異。宜加進崇封。於是追封爲慶恭皇貴妃。

惇嬪

惇嬪汪氏。都統四格格女。始以貴人封惇嬪。進惇妃。生皇十女固倫公主。後以貴嬪婢使。仍降爲嬪。乾隆四十二年諭。昨惇妃將伊宮使喚女子。賚處致斃。若不從重辦理。不足使備位宮闈之人。咸知啓畏。第念曾育公主。姑從末減。即著降封爲嬪。以示懲儆。

回妃

清后外傳

容妃和卓氏。回部台吉和札賚女。乾隆二十六年。以貴人封爲嬪。三十三年。進容妃。五十三年。薨。按世傳高宗回妃。當卽指此。王國運今列女傳。準回之平也。有女籍於宮中。生有美色。專得上寵。號曰回妃。然準女懷家國破亡之恨。陰有逆志。因侍寢而驚宮御者數矣。詰問。具對以必死報父母之仇。上益悲壯其志。思以恩養之。太后知焉。每召回女。上輒左右之。會郊祭齋宿。子夜忽出。太后乘平輦。直至上宮。入便閉門。宦侍奔告。上遽命駕還。叩門不得入。以額觸扉。臣御驚號。聞於內外。太后常門坐。促召回女。絞而殺之。待其氣絕。撫之已冷。乃啓門。上入號泣。俄而大寤。頓首太后前。太后亦持上流涕。左右莫不感動泣下。海內聞者。皆歎息相謂。天子有聖母也。后妃傳注。王氏書。好任意出入。此所記回妃事。亦不詳所本。且準部元裔。不得概稱回女。其說已自相歧出。姑錄之。以廣異

開云云。順天府志實月樓。相傳高宗爲香妃寢。令西域回部。移住長安街。名曰回子營。俾妃登樓南望。如見故鄉云。又浴德堂。有浴室。亦傳爲香妃築。堂在武英殿右。地屬外朝。詎有妃侍遊浴之理。惟近由故宮。發見香妃戎服圖等多幅。則當時自有號香妃者。大抵妃侍承寵。偶加號稱。不必定屬回妃也。

銀妃

梵天塵叢錄。銀妃。青州黃氏。小字杏兒。有美名。高宗南巡。聞之。密輦入宮。承恩寵。封銀妃。及香妃至。寵幸甚於妃。妃妬恨。誘諸太后。賜香妃死。上不復幸妃。妃遂有長門之歎矣。按此與香妃同一無考。惟近見有銀妃晚妝圖。流傳海外。想亦寵妃寫照。偶題佳號。而青州黃氏。則野說也。

仁宗后妃

仁宗后妃十四人。孝淑睿皇后喜塔臘氏。孝和睿皇后鈕祜祿氏。和裕皇貴妃劉佳氏。華妃侯佳氏。恕妃完顏氏。莊妃王佳氏。恭頤皇貴妃鈕祜祿氏。淳嬪董佳氏。信嬪劉佳氏。簡嬪圖佳氏。遜嬪沈佳氏。恩貴人烏雅氏。榮貴人梁氏。安嬪蘇完尼瓜爾佳氏。

孝淑睿皇后

孝淑睿皇后喜塔臘氏。和爾敬額女。宣宗母也。仁宗即位。奉太上皇帝命。以嫡妃册立爲皇后。嘉慶二年崩。上諭。皇后薨逝。蒙皇父敕旨。照皇后典例舉行。第思朕日侍慈聖。諸取吉祥。皇后册立未久。此七日內。圓明園辦事人員。俱著常服。惟不掛珠。此禮以義起。天下臣民。自當共喻朕崇奉皇父尊隆尊養至意。册諡孝淑皇后。

恭慈皇太后

孝和睿皇后鈕祜祿氏。一等侯恭阿拉女。嘉慶元年。封貴妃。二年。孝淑皇后崩。上皇命貴妃繼中宮。先封皇貴妃。敕旨曰。皇后逝已百日。皇帝中宮。不可久曠。今貴妃。係朕前選。賜皇帝爲仰福晉。即冊封爲皇貴妃。俟二十七個月後。再舉行冊立皇后典禮。四年。立爲后。宣宗即位。尊爲皇太后。號恭慈。屢崇進徽稱。道光二十九年十二月崩。上哀慟不已。席地設苦。明年正月。上崩於慎德堂。苦次。

如太妃

如妃鈕祜祿氏。主事善慶女。嘉慶十年。以貴人封如嬪。十五年。進爲妃。宣宗即位。封皇考如貴妃。道光二十六年。進皇貴妃。文宗立。諡曰。如皇貴妃。承侍皇祖多年。皇考加崇位號。年齡最尊。宜晉隆稱。尊封爲如皇貴太妃。帝屢詣問安。咸

豐十年薨，追諡恭順皇貴妃。

宣宗后妃

宣宗后妃十八人。孝穆成皇后鈕祜祿氏，孝愼成皇后佟佳氏，孝全成皇后鈕祜祿氏，孝靜成皇后博爾濟吉特氏，莊順皇貴妃烏雅氏，和妃納喇氏，彤妃穆舒魯氏，祥妃鈕祜祿氏，珍妃赫舍里氏，恬妃富察氏，常妃赫舍里氏，佳貴妃郭佳氏，成貴妃鈕祜祿氏，順嬪不詳何氏，恆嬪蔡佳氏，豫嬪尙佳氏，貴人李氏，那氏。

孝全成皇后

孝全成皇后鈕祜祿氏，顯齡女，文宗母也。始爲嬪。道光三年，封全妃。五年，進貴妃。十四年，立爲皇后。二十年崩，諡以順。孝醇，全足賅一生，應即諡爲孝全皇后。

康熙皇太后

孝靜成皇后博爾濟吉特氏。花良阿女。道光六年。以貴人封靜嬪。七年。進靜妃。十四年。進靜貴妃。二十年。封皇貴妃。文宗幼失母妃。鞠養勤劬。及即位。尊爲康熙皇貴太妃。問安侍膳。隆禮尤備。屢奉鑿與游幸。咸豐五年。妃病篤。上尊號爲康熙太后。崩。帝哀慟號呼。摘冠綬。剪髮。成服。冊諡曰孝靜。仍以妃禮葬。並諭恭親王奕訢。勿庸恭理喪儀。且罷機務。按恭王爲孝靜后子。傳以喪禮過崇。不合帝意。遂出軍機。王閤選祺祥故事。恭忠親王母康熙妃。文宗慈母也。全太后以文宗託妃。妃舍其子而乳文宗。故與王如親兄弟。即命王入軍機。而冊康慈爲太貴妃。王頗以尊號太后爲言。帝默不應。會太妃疾。帝問安。妃以爲恭王。即曰。他性情不易知。勿生嫌疑也。帝知其誤。自此始有猜而王不知也。及病篤。

王泣跪，言待封號以暝，帝應曰：「哦哦。」王稟傳旨，令具冊禮，上慙而依。上尊號，遂令王出軍機，而減損太后喪儀。按罷，直詔以辦理喪儀，疏忽爲詞，即斥其專擅也。至乳文宗一語，則誤。皇子生，例用乳母乳之。后妃皆不自乳，且孝全崩時，文宗年已逾十齡矣，蓋與恭王同時撫育也。

文宗后妃

文宗后妃十九人。孝德顯皇后薩克達氏。孝貞顯皇后鈕祜祿氏。孝欽顯皇后葉赫納喇氏。莊靜皇貴妃他他拉氏。玫貴妃徐佳氏。英嬪伊爾根覺羅氏。雲嬪武佳氏。瑋常在。琿常在。逾常在。婉嬪索綽羅氏。祺貴妃佟佳氏。駿嬪。容嬪。璿嬪。玉嬪。吉妃。禧妃。慶妃。均不詳何氏。

四春

王闈運仰明園詞注。宮中例無漢女。純皇時常采進。依買婢妾之例。不挑選也。文宗時。有四人承寵者。分居牡丹春。海棠春。武陵春。杏花春。各亭館。內府號曰四春。按此亦無考。妃嬪承寵。偶以館名。亦或有之。不必定爲漢女也。

孝貞顯皇后

孝貞顯皇后。鈕祜祿氏。郎中穆揚阿女。咸豐二年。以貞嬪進。貴妃。冊立爲皇后。穆宗踐阼。尊爲母后。皇太后。上徽號曰慈安。與孝欽后同垂簾聽政。稱東西兩宮。時政權秉自孝欽后。但端拱而已。然關於軍國大計。偶行一事。天下莫不稱頌焉。同治八年。山東巡撫丁寶楨奏。太監安得海。矯旨出都。立命嚴密擒捕。就地正法。並申諭約束太監。光緒七年。崩於鍾粹宮。上諡曰孝貞顯皇后。后妃傳原按。近人依託宮闈。流言無實。尤莫甚于譚氏筆錄。所載孝貞暴崩事。夫既云

顯廟手敕焚毀，敕語何從而知。食盒外進，又誰確見。惲氏曾事東朝，橫造影響，無驗之言，後之覽者，宜深聞之。又翁同龢日記，光緒六年二月，慈禧聖體違和，召見辯事，皆慈安皇太后獨御簾，十餘年來，此爲創見云。

孝欽顯皇后

孝欽顯皇后葉赫納喇氏，道員惠徵女，穆宗生母也。后幼入宮，封蘭貴人。咸豐四年，進懿嬪。六年，生穆宗。進懿妃，又進懿貴妃。穆宗即位，尊爲聖母皇太后，號慈禧。與孝貞后同聽政。同治十二年，始歸政。穆宗崩，立德宗，復訓政。十五年，始撤簾。二十四年，后復臨朝。二十六年，各國兵入京師，后携帝西狩，明年還京。三十四年，德宗崩，后以醇親王載灃之子嗣立，尊爲太皇太后。明日，后亦崩，葬定東陵。

蘭貴人

實錄咸豐四年內閣奉諭旨。貴人那拉氏。晉封爲懿嬪。玉牒作蘭貴人。或謂后小字曰蘭。故當時操擬進呈文字。相戒不用蘭字。按妃嬪封號。既定字樣。不復更易。懿爲封號。則蘭以名冠。亦可解也。

懿嬪

實錄咸豐四年。貴人那拉氏。封懿嬪。六年。穆宗生。進懿妃。又進懿貴妃。冊文。畧曰。咨爾懿妃那拉氏。賦性柔嘉。秉心淑慎。祥開麟定。恩奉龍章。瑞毓螽斯。吉符燕喜。旣蕃禧之茂介。宜顯秩之攸加。是用晉封爾爲懿貴妃。錫之寶冊云云。

聖母皇太后

本紀。穆宗立。尊母后聖母。並爲皇太后。垂簾聽政。命恭親王奕訢爲議政王。領

軍機。按是時。孝欽后母以子貴。中外皆稱曰。聖母皇太后。

后妃傳。文宗臨崩。以印章二。賜孝貞后及帝。后曰。御賞。帝曰。同道堂。凡發諭旨。分鈐起訖處。軍機處密扎。兩印均大行所賜。母后用御賞印。印起。上用同道堂印。印訖。凡應用硃筆者。用此代之。遞旨亦均用此。以杜弊端。翁同龢日記。擬旨繕進。呈閱後。上下用御賞同道堂二印。爲憑信。按同道堂印。後由孝欽后執用。想因穆宗年幼。故孝欽代鈐。母后聖母。兩宮分負其責焉。祺祥故事。凡擬旨。上覽發。以同道堂小印爲記。又謂文宗嘗晏朝。孝貞后以違祖法。責侍寢者。上還嘆曰。此自我過。彼且恕之。后奉詔。帝慚。即解玉印賜后以謝。同道章自此始。按此誤記。同道堂印。確由孝欽執用也。

本紀。御史董元醇。請皇太后權理朝政。初文宗遺命。以載垣等贊襄政務。太后

意在臨朝。御史董元醇疏請兩宮太后權理朝政。載垣等擬旨嚴斥。太后大怒。爭而後發。軍機處密札董請垂簾。擬旨痛駁。遞上摺旨均留。又呼有兩時許。鄭等始出。仍未帶下。探知是日見面大爭。老杜尤肆挺撞。有若聽信人言。臣不能奉命語。太后氣得手顫。次早始發下。怡等笑聲徹戶。不久即有大變。八人斷難免禍。其在回城時乎。再聞西邊定要臨朝。後來東邊轉灣。大要是姑且將就耳。遂密召恭王赴行在。

本紀恭親王赴行在。叩謁粹宮。實奉密召。軍機處密札恭邸今日大早到。適趕上殿。爰行禮伏地大慟。祭後太后召見。恭王請與內廷偕見。未許。遂獨對。約一時許。方出。肅輩頗有懼心。見恭王未嘗不肅然改容。連日頗爲歛戢。近日八位見起不過二三次。時亦甚暫。足見自有主宰。原札肅輩作宮燈輩。當時隱語。謂

肅字形也。清史綱要，恭王至，太后召見，杜翰昌言於衆，謂叔嫂當避嫌，且太后居喪，尤不宜召見親王，肅順稱善，然恭王終設計獨見太后，遂密謀誅載垣等，並密擬拿問各旨，以備到京即發，議定，恭王先還，太后即下還京之旨，載垣等力阻不聽，乃議命肅順護送梓宮，載垣等扈從，太后等由間道還，既至，下詔褻載垣等罪狀，恭王捧詔宣示，載垣端華二人厲聲曰：吾輩未入，詔從何來，恭王命侍衛搶出，幽之宗人府，時肅順方次密雲，擁妾臥，逮者毀門入，械至京同議罪。

實錄。穆宗奉皇太后還宮，以力阻垂簾，治載垣端華肅順等罪，諭曰：前因御史董元醇、陳請皇太后暫權朝政，深合朕意，雖我朝向無皇太后垂簾之儀，朕以國計民生爲重，豈能拘守常例，所謂事貴從權，特面諭載垣等，著照所請，該王

大臣擬旨時。擅自改作。是誠何心。又朕於熱河行宮。特旨召見恭親王。帶同大學士桂良周祖培。軍機大臣文祥。乃載垣等。肆言不應召見外臣。擅行阻。跋扈專擅。肆無忌憚。著即傳旨拿問。又諭。閣部會同定擬載垣等罪名。載垣端華。均賜令自盡。肅順著斬立決。以爲大逆不道者戒。旗祥故事。御史請垂簾。肅順言。按祖制當斬。票擬上。留不下。於是軍機三日不視事。后怒而始發。次日大臨。后見醇王福晉而泣。令醇王入見。及至。肅順斥之退。官監三問始引入。密令召恭王。恭王自京至。對非還京不可。后乃傳旨回鑾。既至京。詔發罪狀。斬肅順而賜怡鄭二王死。一時謂之三囚。又云。初文宗出狩。自都啓行。供張無辦。后妃不得食。惟以豆乳充飯。而肅順有食擔。獨供帝御酒肉。后以此已惡肅順矣。

實錄禮親王世鐸等奏違旨會議垂簾章程。兩宮皇太后。皇上。同御養心殿。各

設案。皇太后前垂簾。召見內外臣工。引見京外官員。御前大臣輪派一人。帶領進見。又諭現在一切政務。兩宮皇太后躬親裁決。繕擬諭旨。仍應作爲朕意。仍書朕字。又諭各直省及軍營奏報。呈遞兩宮慈覽。發交議政王軍機大臣。於當日召見時。請旨繕擬。閣定頒行。

庸盒筆記。當時稱東宮德優。大誅賞。大舉錯。悉主之。西宮才優。主判閱章奏。裁決庶政。而召對。臣下諮詢利弊。悉中窾竅。東宮則喃喃若無語。然關於軍國大計。及舉賢進能。每行一事。天下無不額手稱慶云。

實錄。同治四年。恭王以議政忤太后意。太后米諭。指爲妄自尊大。日無君上。暗使離間。取巧妄陳。母庸在軍機處議政。革去一切差使。旋以諸臣奏請。仍命在軍機大臣上行走。撤議政名目。麒麟故事。初兩宮聽政。恭王既被親用。每日入

朝。輒立談移晷。宮監進茗飲。兩宮必曰。給六爺茶。一日。召對頗久。王立御案前。舉甌將飲。忽悟此御茶也。仍置故處。兩宮哂焉。孝欽御前太監小安。方有寵。多所宣索。王戒之。明日進膳。則悉用粗惡者。孝欽訝問。以六爺責言對。愾曰。乃約束及我。日用耶。御史蔡諱。聞之。劾王貪恣。后遂怒發罪狀。諱有曖昧難述之語。朝論大驚疑。而外使亦詢軍機事所由。用是得解。復召見。王痛哭陳謝。復直如初。王自是益謹。

慈禧太后

本紀。穆宗崩。立德宗。奉慈禧安皇太后。居鍾粹宮。慈禧皇太后。居長春宮。兩宮皇太后。復垂簾聽政。后妃傳。后性剛果。既與孝貞再稱制。一時大事多決於后。及孝貞崩。后獨當國。罷軍機。罪言官。任太監。既諭歸政。又允暫緩。至帝大婚。始撤

簾而用人行政，仍隨時秉承，莫敢違焉。按是時皆稱曰：慈禧太后。或曰：西太后亦曰西宮。

實錄：同治十三年，上崩，慈禧安皇太后，慈禧皇太后，御養心殿西煖閣，召親王大
臣入。懿旨：醇親王奕譞之子，入承大統。翁同龢日記：上崩，太后召諸臣入，諭云。
此後垂簾如何，樞臣中有言宗社爲重，請擇賢而立，然後懇乞垂簾。諭曰：文宗
無次子，今遭此變，若承嗣年長者，實不願。須幼者乃可教育，現在一語即定，我
二人同一心，則即宜曰某。醇王驚遽敬唯，碰頭痛哭，昏迷伏地，掖之不能起。諸
臣承旨後，即下至軍機處，擬旨面遞，太后哭而應之。

實錄：德宗既嗣位，兩宮皇太后復臨朝，垂簾聽政，均照同治初辦理。並諭嗣後
內外臣工，應進安摺，著書三分，於兩宮皇太后及朕前呈遞。其應用清字者，俱

用清漢合璧。

本紀。光緒十年。慈旨以因循貽誤。罷恭親王。家居養疾。並盡易軍機大臣。翁同龢日記。光緒十年。恭親王同罷軍機。慈旨凡百數言。其洞心悅目矣。十月萬壽。恭親王請祝嘏。傳旨。恭親王不准隨班晉祝。又十八年十一月。例賞恭親王福字。諭撤下。毋庸賞給。又二十年三月。慈旨。恭親王領懇祝嘏。現在病未全痊。毋庸進內。以示體恤。九月。起恭親王直內廷。並督辦軍務。十一月。復爲軍機大臣。又二十二年十二月。慈旨。載灃之子溥偉。著繼與載澂爲後。並賞多羅貝勒。恭邸流涕拜命。按載澂爲恭王長子。早死。尙有次子。今命溥偉爲後。例襲王爵。外示優異。實則無異奪其親子世爵也。又二十四年閏三月。上侍太后。臨視恭邸。疾增劇。啜粥已不能收口矣。四月。薨。上愾然而哭。奉慈駕臨奠。太后大感慟。諭恭

親王勳德最隆，宜配享太廟，並賜諡曰忠。皇室見聞錄。凡內廷有昇出物件，應由敬事房先行照門。如未知照，不得放行。光緒初，有太后賜件，未經照門，護軍阻之，太監不服，互毆，奔奏。太后大怒，謂統領岳林應處斬，恭親王曰：岳林失察，罪止交議，護軍應斥革耳。太后曰：否則廷杖。王曰：廷杖乃前明虐政，不可效法。太后怒曰：汝事抗我，汝爲誰耶？王曰：臣是宣宗第六子。太后曰：我革了你，王曰：革了臣的王，爵革不了臣的皇子。太后無以應，始如議。然怒極矣。召南筆記。慈喜惡恭邸深，度王代請祝嘏。太后曰：予聞名且首痛，不許。及疾甚，太后問何食。曰：僅啜粥。遂賜上用粥十數品，命遞試何者合味。再製賜。王嘗數口，已不能下咽。遂增劇。翁記啜粥不能收口，蓋意有所指也。

本紀。光緒十年，罷恭王，諭軍機處，遇有緊要事件，會同醇親王商辦。又諭：會商

事件。本爲軍機緊要而言，並非尋常諸事。概令預聞。醇親王再辭。諭俟皇帝親政，再降懿旨。始暫時奉命。后妃傳命醇親王參機務。然亦不假以事權也。初德宗嗣位。醇親王奏懇曲賜矜全。有爲天地容一虛糜爵位之人。爲宣宗留一庸鈍無才之子。等語。太后懿旨。以情詞懇摯。許之。仍命內廷行走。照料。五年。復乞疾。始允解職務。尋以廷議俄約。懿旨醇親王。並預議以聞。六年。又命醇親王管理神機營事務。十年。諭軍機處。遇重要事。會同醇親王商推行之。十一年。命總理海軍事務。十二年。巡閱北洋。十三年。懿旨醇親王以親王世襲罔替。朝廷大事。仍備顧問。十四年。吳大澂請救議尊崇醇親王典。禮。懿旨斥之。十六年。醇親王薨。上奉皇太后臨邸視殮。皇太后賜奠。召南筆記。醇邸馴謹。不似恭邸之忤太后。然亦不免疑忌。臥疾時。上欲臨視。左右不敢爲請。後以御史奏。始奉太后

詣視不能獨晤也。太后問病狀。對以內熱。賜冰水。飲後增劇。王患傷寒。不宜寒飲。遂致命也。

清史綱要。光緒十二年。醇親王巡閱北洋海口。派總管太監李連英隨往。御史朱一新奏。恐蹈唐代監軍覆轍。請防宦寺流弊。愆旨以原奏稱深宮或別有不得已苦衷語。飭明白回奏。奏上。以謬執降主事。

老佛爺

本紀。光緒十三年。上親政。十五年。皇太后歸政。后妃傳。十五年始撤簾。建頤和園。爲願養祝釐所。又增葺西苑。常臨幸駐蹕。遇慶典。屢崇進徽號。按是時。以天下養。皆稱曰老太后。宮中則稱曰老佛爺。

本紀。光緒十四年。上奉皇太后始幸西苑。十七年。頤和園葺工。上奉皇太后臨

幸自此始。李鴻藻傳。太后駐園。德宗間日一往侍起居。言官有言其不便者。太后大怒欲黜之。鴻藻爲解乃止。翁同龢日記。光緒十一年。遂旨著御前軍機。會醇親王。踏勘三海應修工程。又慶邸獨轉告吾輩。諒其苦衷。蓋以昆明易渤海。壽山換滌陽也。按此指以海軍費修園工。李文忠全集。與醇邸往返函有三海工程。急需二十四萬兩。先由海署存款借撥。並息借洋款八十萬。文銛崇禮崇厚文錫文麟報効三十萬。海緒增潤一百萬。神機營海署七十萬。又派閩江海各關。按年報効。又商兩江兩廣湖廣四川四督。湖北江西各撫。報効。可集二百萬之數等語。似合西苑及頤和園工程而言。實數無考。相傳有三千萬八千萬之說。皆無考也。又翁記。十四年六月。太后移居儀鸞殿新室。九月。太后幸萬壽山。十一月。合肥以火輪車五。進太后。紫光閣鐵路成。試行。十五年三月。太后至

願和園於龍王堂看水操。蓋水師學堂新教成者。龍王堂在水中央。隔昆明湖。有隄。隄上列砲隊馬步隊。湖中具小船。船有輪砲。各演陣式。以爲美觀也。十八年。萬壽入祝。散時。賜坐火輪車。以人推挽。由豐澤園出福華門。又賞燈。燈在儀鸞殿。太后寢宮也。萬燈照耀。中設電球。前列燈坊。先看福祿壽圓。繼以龍燈。四刻畢。又十九年。四月。皇太后硃筆圈出吳樹茶陳冕。擬撰願和園一切扁對。並恭書之。聞陳修撰託人如此。又排雲殿。太后寢宮。即在殿西室。又西苑多榆樹。今年檢生蟲。一日墮太后衣襟。整手。乃命凡檢盡伐之。於是百餘年之樹。無子遺矣。又二十二年。三月。慈禧至圓明園之含輝樓。閱解馬解馬者。精捷營馬技也。又八月。入園賞戲。夜出乘舟。御前軍機。坐翔雲輪船。停湖心。上侍太后。御龍舟。蓮花萬朵。周於四隅。如紅線浮隄上。旣而明燈擁一方臺至前。則戲臺也。演

戲一劇，隨放花砲，亦極曼衍變幻之觀。戊初二刻散。

后妃傳注。初命建頤和園，諡曰萬壽山大報恩延壽寺，爲高純皇帝侍奉孝聖憲皇后三次祝嘏之所。清漪園舊名，擬改爲頤和園，殿宇一切，量加葺治，以備慈輿臨幸。又諭慈駕往來游豫，所有一切應行事宜，著各該衙門預備，復於昆明湖，置捧日翔雲恒春小火輪，樂壽堂及西苑瀛秀園，分設電燈。

本紀。皇太后五旬萬壽，上率王以下文武大臣等詣慈寧宮慶賀。翁同龢日記。光緒十年。太后五旬慶典。長春宮連日演劇。中官攝笛。近侍登場。亦罕事也。有小伶長福者。長春宮近侍也。極佞巧。醫者薛福辰。汪守正。來祝。特命賜贍。賜長春宮觀劇。即寧壽宮賞戲也。近支王公。內府諸臣。皆與。滿洲命婦。多報病。惟福錕。崧中。巴克坦布。三人之妻。入內。聞終日侍立。進膳時。在旁伺候一切。此次典

禮所費約六十萬。戲內燈盞等俗名切末。已用十一萬。他用知矣。本紀光緒二十年。懿旨。六旬慶辰。停止頤和園受賀。先是以皇太后六旬萬壽。預飭查照乾隆年間。歷次慶典籌備。定於頤和園受賀。自園至西華門。蹕路所經。平治修葺。點設景物。內外各進報効。見於奏報者。共銀一百二十萬六千九百兩。旋以中日戰起。諭停慶祝。仍在宮中受賀。

翁同龢日記。光緒十九年。六月樞廷會商明年慶典。請准王公內外大小文武官。報効銀兩。九月。懿旨。查舊樣造金鞦。鞦高一丈三尺八九寸。西直門外門洞僅能容兩邊。恐擦及端也。十月。聖壽節。受賀。連演劇七日。皆外班戲。今日四喜部。餘多新班。大約闖巷靡曼之音。淫哇之曲。無不雜陳也。又太后移居寧壽宮。在十二月。上以內務府請撥六十萬摺。令親議駁。次日令發寧壽宮工款。昨被

嚴旨。而今邀慈允。且鉅欸漫銷。無可考。究駭人聽聞。又二十年八月。慈旨。停辦點景。經壇戲臺等事。宮中受賀。又諭一切點景。俱暫停辦。俟來年補祝。十月。慈寧宮受賀。演劇。皇極殿賜宴。上親進舞。各國使臣。文華殿觀祝。又記。本朝不設教坊。雜伎。其領於內務府者。曰昇平署。皆中人也。乾隆時。所製法曲。詞臣等撰進。如張得天。輩。骨乘筆焉。嘉慶時。有蘇揚人。投身入內者。往往得厚賞。至道光時。一概屏絕。昇平署遂封禁矣。咸豐季年。中官習戲者。頗多。亦嘗傳民間。戲班。在內供應。同治時。稍稍開禁。至光緒十七八年。而大盛。闔巷歌謠。村社諧笑。亦漸入曲。而各戲班。排日承應。其教曲者。支月織。賞頂帶。戶部有籍。可稽者數十人。其始。廷臣賞戲。無外班。近年。則專用外班。內官所演。不過吉祥舊樣而已。即如近日。一四喜。一同春。皆外班也。誠此以見風氣推移之速。

那拉后

本紀。光緒二十四年，皇太后復臨政。帝稱疾徵醫。二十五年，以溥儀爲穆宗嗣，封皇子。二十六年，義和拳亂，八國聯兵陷京師，上奉皇太后如太原。按自戊戌政變時，皆稱曰那拉后，或直曰西后，不免有微詞焉。

本紀。皇太后復垂簾。於便殿訓政。按太后自戊戌三次臨朝，與帝同坐，或獨召對，不復垂簾。凡御座，皆后中坐而帝側侍，不問定例。惟大朝仍帝獨御。然以稱疾停年節升殿，大朝亦僅見也。

后妃傳。光緒二十四年，帝用康有爲言，銳意變法。朝政多更置，后倉卒自頤和園還宮，下詔復訓政。以有爲密謀規制，誅其黨。凡帝所蓋革皆復之。命榮祿轄武毅新建諸軍，衛近畿。又移董福祥所部甘軍駐南苑。隱有廢立意。明年遂以

端王載漪之子溥筠爲穆宗嗣。號大阿哥。中外駭然。二十六年。拳亂起。載漪等主之。攻使館。各國師至。后與帝扶掖出西華門。遂西幸。蹕長安。明年。約成。乃還京。

庚子傳信錄。七月二十一日。天未明。太后青衣徒步。泣而出。上及后。皆單袷。隨之。至西華門。乘驪車。從者載溥溥筠。載勳。載瀾。剛毅等。妃主宮人。皆委之而去。是日。駕出西直門。馮玉崑以兵從。暮至貫市。上及太后。不食。已一日矣。民或獻麥豆。時天寒。求臥具不得。村婦以布被進。貫市李氏。富商也。從取驪騎以行。二十二日。至空道。延慶州知州秦奎良進食。二十三日。太后易奎良轎。暮至懷來。縣令吳永。供張甚辦。太后方御葛衣。永進衣裘。擢道員。二十四日。上及后皆易轎。駐沙城。自此如太原。九月。至西安。駐蹕。西狩叢譏。皇太后抵懷來。乘肩輿。其

後馱驕四，皇上與倫貝子共一乘，次皇后，次大阿哥，次總管李連英，各一乘。太后叫起，問姓名縣城，忽放聲大哭，謂予與皇帝，歷行數百里，連日不得飲食，采稊稽桿，與皇帝共嚼，昨夜僅得一板橙，與皇帝貼背共坐，今見爾，猶不失地方官禮數，難道本朝江山尚獲安全無恙耶。至太原，以撫署爲行宮，一切陳設，均乾嘉年巡幸五台所備辦，乃皆如新製。太后喜聞外事，每召見，輒令隨意說話。至西安，每召見，太后與皇上同坐一匝，太后在左，皇上在右，皇上不能自發語，宮廷體制，外似甚嚴，內並不十分祇肅，內監需索更甚於京，回鑾，至開封，懿旨，溥筠撤大阿哥名號，聞溥筠在宮時，一日突拳擊德宗，至仆地不能起，哭訴后前，僅以家法責二十而已，至保定，改乘火車，抵馬家堡，復乘輿，入正陽門，洋兵城上立觀，有脫帽致敬者，太后仰視，似以含笑答之，大駕直進大清門，還宮。

老祖宗

本紀光緒二十七年。上奉皇太后回鑾。兩宮見各國公使暨其夫人等於養性殿。二十八年。上奉皇太后謁東西陵。二十九年。百官豫請來年皇太后七旬萬壽。報効廉俸。三十年。皇太后萬壽節。上詣排雲殿。進表賀。按皇太后自回鑾。常駐圓宮中。稱曰老祖宗。聞傳旨飭用此稱也。

慈禧外紀。回鑾後一星期。遂依條約所定。接見列強使臣於大殿。太后仍如昔日。坐殿上大寶座。皇帝寶座稍低。又接見公使夫人等。太后態度和藹。尤能感人。以後公使夫人等。常入宮接見。招待既勤。皆至欣樂。此足見太后聯絡邦交之手段矣。凡西人之進見者。但觀太后儀表之尊嚴。神態之誠懇。自各悅服。莫知其然而然也。按慈禧外紀。爲英人所撰。又有美畫女慈禧畫像記。太后御體。

長不及五尺，然鞋底厚有六寸，登座後，望之巍然，予思畫者爲中國至尊，無上慈禧太后之聖容，責任如何重大，尋命留駐宮中，於是爲宮中惟一之外人。太后廣額豐頤，髮黑齒白，壽已六十九，如一四十許之美婦，降座觀象，欣喜評論。頗中窈窕，每日下朝後，或茶會，或觀劇，愛犬而不喜貓，見則不快，三海頤和園，皆新修，小艇游湖，有汽舟，太后雖主守舊，而見有新事物，亦喜用之，太后深沉多智慮，極機警，興味恣然，善籠絡人心，宮中稱爲老佛爺，自回鑾後，又稱老祖宗，太監頗有權勢，李連英待太后最久，又有蘇太監，職位相並，聞太后用人，常擇二人最反對者，使之並立，每議事，亦許各陳所見，而折衷之，太后自信爲用人最善之術也，太后善書畫，亦善織，衣服手飾，日新月異，無一從同，人之富於美的性者，未見有過於太后者也，秋節後，太后設園游會，東請公使，及夫人等，

第一日男賓，第二日女賓，女賓覲見，德菱女士，通譯姓名，太后富於記憶力，見一面，即久識，不待唱名，又傳歐洲馬戲，進宮演藝，太后注意犬戲，皇帝則注意於馬及騎車諸技，太后坐至演畢，始起，又近見太后，焦灼不寧，長歎揮淚，意必有難事，後始知滿洲俄軍撤兵，衍期交涉，甚棘也，太后萬壽，皇帝固請慶祝，並上尊號，每上尊號二字，例應年增二十四萬兩，太后尊號，已有十六字矣，大內諸皇族及諸大員眷屬，入宮最勤者，爲慶王福晉及其格格，老醇王側福晉，及醇王福晉等，榮祿夫人亦常進宮，其女即醇王福晉，脫能生男，將來或即入繼光緒之大統，按其言果驗，可見外人測事之密也，又中國饋賜之禮，最爲重覲，各使夫人等入見者，太后必予以貴重禮物，開園游會時，亦如之，每逢令節，常有贈賄，其駐使遇有移調，則必贈以賄禮，予在大內久，亦得后贈不少，至稱榮

幸焉。太后入宮傳者多誤。咸豐二年六月。選立妃嬪。太后選入常在之列。後生皇子。即同治帝。故得先帝窀。按太后初選常在。足補官書之闕。此所記詳述年月。必聞之近侍。當可信也。

太皇太后

本紀。光緒三十四年。德宗崩。詔攝政王載灃子。入承大統。爲嗣皇帝。慈禧皇太后懿旨。命嗣皇帝入闈。穆宗。兼承大行皇帝之統。尊聖祖母慈禧皇太后爲太皇太后。兼桃母后爲皇太后。先是太皇太后。並亦猶豫是日崩。

后妃傳。德宗崩。后夜出書。以醇親王載灃之子。嗣穆宗。兼桃大行皇帝。授載灃攝政王。是夕。病劇。明日崩。遺詔曰。予以薄德。祇承文宗冊命。備位宮闈。穆宗幼冲。與孝貞顯皇后。同心撫訓。削平大難。穆宗卽世。大行入闈。不得不再允訓政。

前年宣布預備立憲。今年頒示立憲年限。萬幾待理。心力俱殫。夏秋以後。時有不適。復遭大行皇帝之喪。悲不自克。遂至彌留。回念五十年來。憂患迭經。兢業之心。無時或釋。攝政王及內外諸臣。其協心翊贊。固我邦基。嗣皇帝尤宜以國事爲重。有厚望焉。后臨制凡四十七年。壽七十有四。

慈禧外紀。太后皇帝皆病。不能御殿。帝病沉時。請太后選一嗣子。太后即召見諸大臣於儀鸞殿。雖體已不支。然太后強毅之性。勉自鎮定。說話仍如往日。聲音宏亮。其堅果不改常度。見者皆驚。遂定立醇王之子。即封醇王爲監國攝政王。帝崩。太后病亦愈。重命草遺詔。猶改定數句。彌留時。既昏。忽又清醒。最後一言。乃出人意外。其言曰。以後勿再使婦人預聞國政。語畢遂暝。

穆宗后妃

穆宗后妃五人，孝哲毅皇后，阿魯特氏，慧妃，富察氏，瑜嬪，赫舍里氏，珣嬪，阿魯特氏，瑤嬪，西林覺羅氏。

孝哲毅皇后

孝哲毅皇后，阿魯特氏，尙書崇綺女，同治十一年，冊立爲后，十三年，穆宗崩，封號嘉順皇后，明年，崩於儲秀宮，謚曰孝哲毅皇后，御史潘敦儼，陳請更定謚號，謂后之崩，在穆宗升遐百日內，道路傳聞，或稱悲痛致疾，或云絕粒傷生，以母儀之德，而有首陽之風，奇節不彰，何以表德，太后斥其言謬妄，罪之，后謚如故，按世傳帝崩，后以受太后責言，誓以身殉其父崇綺，進藥，乃崩，考后崩時，崇綺方派赴喀爾喀車臣汗賜奠，特諭傳知，即行回京，傳說不足信也。

清史綱要，穆宗崩，封皇后爲嘉順皇后，后爲尙書崇綺女，端莊謹默，動必以禮

不得寵於太后。太后以穆宗崩，訓資備至，后本已勵極，誓以身殉，不復食，遂崩。距穆宗之崩，未百日也。

清朝全史。同治帝雖西太后所生，而對於東太后，嚮慕尤深。帝大婚前，東太后意在崇綺之女，西太后意在鳳秀之女，遂命帝自決。帝乃擇東太后所擬定者爲后，西太后因之不擇。傳聞大婚之夕，皇后應對頗稱旨，帝命后背誦唐詩，無一字誤，益垂寵愛。然帝之欣幸，即西太后之失望也。乃誠帝曰：鳳秀之女，屈爲慧妃，宜加眷遇。皇后年少，不嫻宮中禮節，宜使學習，勿常往后宮，致妨其學習。帝自被嚴諭，遂不入后宮，亦不幸慧妃獨居抑鬱，常好徵行，得疾而崩。皇后亦自盡以殉。論者皆歸責於西太后也。按大婚之夕云云，據越縵堂日記，雖不盡可信，要無傷於大雅，故仍之。

瑜妃珣妃瑨嬪

瑜妃赫舍里氏。知府崇齡女。珣妃阿魯特氏。副都統賽尙阿女。同治十一年。同封嬪。進爲妃。封貴妃。瑨嬪西林覺羅氏。始封貴人。進爲嬪。封爲妃。復封貴妃。后妃傳。遜國後。瑜妃尊爲敬懿皇貴妃。珣妃尊爲莊和皇貴妃。瑨嬪尊爲榮惠皇貴妃。

德宗后妃

德宗后三人。孝定景皇后。葉赫納喇氏。瑾妃。珍妃。並他他拉氏。

隆裕太后

孝定景皇后。葉赫納喇氏。都統桂祥女。孝欽后之姪女也。光緒十四年。懿旨立爲后。德宗崩。尊爲皇太后。號隆裕。宣統三年。武昌事起。用袁世凱爲內閣總理。

與民軍會議。決定共和。遂下詔遜位。又一年崩。隆裕皇太后事略。遜位後。太后訓養皇帝。整飭宮闈。憂勤交迫。寢以不豫。癸丑正月十六日。病勢驟增。十七日丑刻。升遐。上諡曰。孝定景皇后。與德宗同葬崇陵。

瑾妃 珍妃

瑾妃。珍妃。他他拉氏。姊妹也。侍郎長叙女。光緒十五年。同封爲妃。珍妃有寵於帝。二十年。慈禧太后諫旨。以屢有乞請。與瑾妃同降爲貴人。二十一年。同復位號。二十六年。太后西狩。珍妃死於井。次年。懿旨。以上年倉猝不及扈從。殉難宮內。追贈珍貴妃。

文廷式傳。始瑾妃。珍妃。幼時。隨父任居廣州。從廷式受學。甲午。大考翰詹。上親擢廷式第一。由綰修選侍讀學士。二妃力也。後以被劾削職。康有爲戊戌入都。

遇上海得廷式密扎數通，交通宮禁，事覺名捕，瑾妃傳遜國後，尊爲端康皇貴妃。

宣統后妃

宣統后妃二人。皇后郭博羅氏，吉林將軍長順之孫女，總管內務府大臣榮源之女。淑妃額爾德特氏，尙書錫珍之弟錫璋之孫，知府端錦之女，按宣統大婚，及后妃事略，別詳宣統外紀。

金息侯梁刊著圖書價目表

清后外紀	一元二角	黑龍江通志綱要	一元二角
光宣小記	洋紙一元六角	盛京故宮書畫錄	八元
清宮史略	洋紙二元四角	辛亥殉難記	一元
滿洲秘檔	滿洲老檔秘錄 一元二角	三希堂法帖釋文	四元
瓜圃叢刊叙錄	正續 一元二角	四明園長春園圖	四元
清史稿光宣列傳	付印	內府一統秘圖	五十元

代售處 北平文奎堂

天津大公報代辦部

上海中國書店

各省商務印書館

金息侯梁書畫潤格

書潤

篆同

堂聯條橫

四尺一元
加一尺增二元

扇面冊頁

每付五元
過尺者倍

畫潤

松同
竹同

中堂條幅

四尺二十元
加一尺增五元

扇面冊頁

每付十元
過尺者倍

文潤

碑傳等類

每篇五百元
過千字者倍

序跋等類

每篇二百元
過千字者倍
題跋小品每件五十元

收件處

北平 榮寶齋各家
萃書閣

天津 文齋各家

上海 九華堂各家

利和公司
華商書局等處

